


BWENA KILISTÒ

BÙLWISHANGANA NE

DIKUUKWILA DYÀ MPÌNGU

 Eci's ncyèbè. Kantu kakesè aka mbwà Maman. Ùkàpèèshè...?... Nènku ùtùlongolola ne pashìishe kakesè aka...?...

Twasàkidila, Mwanèètù Neville, Mukalenge àkubènèshè.

Mwoyi wènù awu mu dindà emu, balunda bàànyì. Ndyèsè bwà kwikala baalùkile mu tabernacle mu dindà emu, tudyùmvwa bîmpè ne cyashima. Makèèlèlà mushààle wàwa ncìvwa nànsha mwà kwakula to. Mvwa mukwàcike kùdì kîshì kakesè kàdì munkacì mwà kunyùnguluka aka, nudi bamanye's, kàdì kàbwela pa muminu ne kàkupàcisha díyì, kàdì Mukalenge kunkwàcisha ne kumpikula ku lutàtu alu ki bwalu kaayi ndi mwà kwakula neenù mu dindà emu.

² Nènku tudi ne disànkà dyà ne kùdì tabernacle mulenga mùle tètè ne bantu biimàne ne kuulu. Mvw'a kujinga twikalaku ne ndambù wa nkwasà, bwà kupèèsha bantu bàdì biimane abu. Bìvwa mwà kutwenza disànkà bu twètù naayi, kàdì ndi ngèèla meeji ne yònsò mmisòmbela. Ndi mumanyè ne kanwèna mwà kuswa bwà kulwa kusòmba ne bânà aba ku cyoshelu eku ne kwikala bakome nyimà mu mùshindù mukwàbò ewu to.

³ Mpindyewu, kukaadi ndambù wa matùkù ùndì munkacì mwà kulonga pa bwalu-bulonda, ki mémè kudyàmbidila ne pàmwàpa mu dindà emu pamutù pàà kuyiisha mvwa mwà kulongesha ànu katancì nàka pa Díyì dyà Nzambì. Nènku mpindyewu netwikale pàmwàpa mwà kunènga ndambù, nànkù nêngiikale...bàmwè bàà kunùdì bààfwànyìnakù kushintakajangana ne aba bàdì biimane kuulu, anyì cintu kampànda, nebiikale bushùwà bîmpè bu nwènù mwà—nwènù mwà kwenza nànkù bwà kubàpèèshakù ndambù wa diikisha.

⁴ Nènku mpindyewu bààbùngì bàà ku balundà, bàà ku balundà bàànyì mbalwè, bàmwè bàà kùdìbo bùùmukila ntàntà mile, lwà kwìnshì ku Georgie kwàka, mu Ohio mwàmwa, mu Tennessee, myaba mishìilèshìilàngàne, mu Illinois, mu Missouri, mu Michigan, mbafùmine kàbìdì ku Chicago, bafùmineku ànu bwà kulwa mu disangisha dyà kaatabernacle kakesè bu aka nùnkù. Bìdì bîmpèèsha dyanyisha divulè bwà bantu bu nànkù. Nènku kí ng'ànu aci nkààyacì to, kàdì ndi muswè kwamba nùnkù ewu, kaciyi bwà bwalu bwà... kàdì mbwà ditanta dyà Díyì dyà

Nzambì ne: pàmwè ne muntu yònsò wa ku bantu abu kabèèna ànu bàlwa pàtupù to kàdi bàdi bàtwàla byàdikumì byàbò bwà kubyèla mu èkèleeziyà bwà dyambulwisha.

⁵ Mpindyewu, aci's cidi ànu balundà bàà lulamatu. Kwèna ànu mwà kupwà bantu bàà mùshindù awu mwoyi to.

⁶ Ne pashiishe mîngà misangu pàmwăpa bikèngela bwà ngâmbè cintu kampànda cyà cibàsunsulula, kàdi nudi numòna cidici cyumvwija dîbà adi's. Mu mwoyi wèbè kùyi muswè kucyènta to, kàdi pààbì's kùdi Cintu kampànda cidi cyamba ne: "Wèwè . . . cidi ne cyà kwenjiibwa," nwamònu's, pa nàнку udi ne cyà kucyènta.

⁷ Nèнку pa kubàmòna balwa bafùmine myaba yònsò ne—ne bàteeta kusadila Mukalenge, ne biitabuuja mudimu wà bwambi ùdi Mukalenge mumpèeshe ne bangeeyemena bu musadidi Wendè bwà ne ncyèna mufwànyine kubâmbila cintu kampànda cyà mafi to, dîbà adi ne meeji matòoke à mwoyi mujimà ndi bulelèlèla ne cyà kwenza ne mwànyì mwònsò mùndì mumanye bwà—bwà kudiisha misùukà yà bantu aba; mumanyè ne kabèèna bàlwa mwab'ewu ànu bwà kwikalabò bàbàmòna, bendeshila màshinyì ààbò mu mikùnà ne tukùnàkùnà tubwikila kùdi mabwe à mashika, ne bapwekela mu njila mipàte patapata, ne bàna bààbò bapangila cyàkudyà ne tulù, ne mushèeta wàbò wà bilâmbà mutèeka mu ndekeelu mwà kàshinyi amu. Nèнку, nudi bamanyè's, abi's mbikolè byà kacya.

⁸ Kàdi Bible mmwambè bwà bantu bàà mùshindù awu, lwà mu Mukànda wa Ebèlù, nshapità wa 11 ne: "Nànsha buloba kî mbukumbànyine bantu bàà mùshindù awu to." Ndi—ndi ngâmba nàнку bwalu ki cidi mu mwoyi wànyì.

⁹ Ne bààbúngì bàdi kaaba aka mu New Albany ne mu Louisville, ne pabwípì mu nyungulukilu emu, mu Kentucky mwàmwa, ne myaba mishìllàngàne kayiyì yà ntàntà mulemùle to, kàdi nànsha nàнку bàdi ne lulamatu bwà kulwa, bendeshila màshinyì mu mabwe à mashika, mu nêjè, ne mu cinyì cikwàbò, bwà kufika kaaba aka.

¹⁰ Mpindyewu, dyàlumingu didì dilonda edi's mmulàadilu wà Noël. Ki mèmè kudyâmbidila ne mvwa . . . mvwa ne mukenji wà Noël bwà èkèleeziyà, kàdi mvwa—mvwa ne njiyà yà mùshindù awu bwà bàna bakesè abu, ndi ne cyà kwamba ne bu bwòbò . . . bu mèmè mwà kwikalapù, dîbà adi bàna bakesè bàvwa bafwànyine pàmwăpa, bààbúngì bààbò bàà kule, mbafwànyine kupangila Noël wabò ne bikwàbò. Nàнку mbifwànyine kwikala bu bikolè kùdi bàna bakesè abu. Kàdi kumpàla kwà kuya . . . Mpindyewu, twètù . . .

¹¹ Ndi mumanyè ne twètù bàà mwab'ewu katùtu tulongesha bàna bèètù balela bwalu bufwikakaja bwà bwena bwà Taatù Noël abu to. Katùtu twitabuuja mu dilondela muntu bwalu bwà mashimi to, nàнку kanwàkushima bàna bèènù balela nànsha.

Cintakanyi cyà mùshindù awu, aci's mbwalu bufwikakaja mu bwòbù, bwà cintu bu nàнку cyàngata kaaba kàà Kilistò mu Noël.

¹² Nènku Noël mmujìmjìje . . . Noël kacyèna kàbìdì dikuukwila to; ncyanga, dinwa dyà maalà, dinaya dyà twarta, dipicisha dyà díbà mu dinwa dyà maalà ne bisànkasanka, ànu bumpàngaanù bwà dikèma ebu. Ne kabyèna . . . Nènku mwva muswè bwà . . . Pàmwápa paanyimà pàà Noël mémè nêngààkulè cyàkàbìdì pa Noël, nudi numòna's, bwà ne kabìpangishi bânà . . . Kàdi kwèna mwà kwambila bânà bakesè aci mùshindù awu to. Bàdi bàmona bânà bakesè dilòòlò dyà Noël bàpeta màtábishi àà Noël ne bikwàbò mùshindù awu, kabèèna bacyùmvwà to. Nwamònu anyi? Bàdi ànu . . . mbatekète bikolè. Nènku bìdì bitùkèngela kubàvùluka, bwà ne bàdi . . . bwà ne bàdi ne bintu byà dyàcimwè. Bìdì bikèngela bwà twètù kupwekela bwà kuvùluka bânà bakesè abu, bwà ne bwòbò biine . . .

¹³ Díyì dyànyì nditámbe bukolè—bukolè ku cikòlokolo, mwanèètù, ndibàndisha bikolè anyi? Nudikù mwà kunguumvwà bimpè paanyimà pààpa, kule kwaka anyi? Huh? Indílaayibi, ndi mwimane pabwípì menemene naaci. Ncikòlokolo kaayi cìdì cipicisha díyì bimpè, byònsò bibìdì, eci ne eci anyi? Ndi—ndi ngèèla meeji ne cyàcya nàka ke cìdì cimpè. Aci's—aci's . . . Mpindyewu, cyàcya cìdì bishi, nцитámbe bwimpè cyòci anyi? Mpindyewu mbilenga, mbimpè.

¹⁴ Mpindyewu, bânà bakesè bàdi ne cyà kuumvwà. Nudi bamanyè's, bàdi—bàdi bânà bakesè, ne tudì ne cyà kuvùluka ne twètù pèètù, tuvwa bânà bakesè.

¹⁵ Nènku ndi mvùluka ne patwàkadi bânà batekète, bàvwà mwà kupàtuka ne kuupula kiitwitu kajimà kàà nsànga mitòòke mwaba kampànda, ne maamù ùvwa mwà kukànga ndambù wa matalà ne kuàswika majingilakù. Ki cyònsò cívwa ku mucì awu. Kàdi bânà bakesè abu, nshèsheetè mikàyàbàle yà kale yívwa milembeleja muntwamu ànu bu . . . Ne, kaa, nènku pàmwápa ùvwa mwà kupeta . . . pàmwápa kaabùdìmbù kakesè kàà mbòmbò, ne mbòmbò mikesè yà mikolè ayi, (ne yìbìdì anyi yìsàtù bwànyì, ne yìbìdì anyi yìsàtù bwà Humpy, ne yìbìdì anyi yìsàtù bwà ewu), ànu tupese tukesè twà mbòmbò, ne tuvwa mwà kuyilama ditùkù dijimà, tuyifùba, nudi bamanyè's. Ne kuyijingila mu kapesè kakesè kàà dibèji ne tuyèla mu mpaayà. Nènku twètù mwà kupeta kaacingoma kàà kale kacyòke, anyi—anyì kampungi kakesè kàà kwela, cívwa ncintu cinène, cívwa cìtùpikishisha mwoyi wètù ne disànkà.

¹⁶ Leelù ewu, mu bushùwà bwà bwalu, mbishìilàngàne. Bapèlè bàkaadikù ne ndambù mukèsè wa mfranga ne bàkaadi mwà kusumbila bânà bààbò bintu byàbùngì, bàdi bàvwàla bimpè be, bàdya bimpè be, ne nsòmbelu mwimpè be. Ne mu—mu byònsò, ngèèla meeji ne mbitámbe bwimpè, bwà mafutu à leelù ewu.

Nènku ki bwà cinyi, bânà bakesè, bikèngela nùbàlekèlè bapeta cintu kampànda.

¹⁷ Kàdi misangu yònsò kwikala batwishiiabwe bwà cyòci eci, kubàmbila ne kakùtukù cintu pàaci ne Taatù Noël to, bwalu kî mbîmpè to. Dîmwè dyà ku matùkù adi panshi aa nebàlwe kwebeja ne: “Kàdi bishi bwà Yesù, dîbà adi?” Nwamònu anyi? Nwamònu anyi? Pa nànkù bambilà Bulelèlè, ikàlà ne meeji matòoke ne muntu yònsò. Ikàlà Bulelèlè. Nènku, nangananga, kwèna mufwànyine kwambila bânà bèèbè cintu kampànda cyà mashimi to, bwalu mbafwànyine kukola ne kwamba. . . Bātu bàkwitabuujà bu mwena Kilistò, ne mbàswè bwà wèwè ku. . . Badi bìitabuujà ne cyùdì ubàmbila aci m’Bulelèlè. Pa nànkù ikàlà mutwishiiabwe ne udi mubambile Bulelèlè, pashiishe neàkole bîmpè.

¹⁸ Mpindyewu, ne pashiishe ndi muswè kupeta dilòòlò dikwàbò kwòkù mùshindù, anyi ditùkù dîmwè, ku tabernacle, kumpàlà kwà mèmè kubwela mu bidimu byànyì byà mudimu bilwalwà ebi. . . anyi, cidimu cyànyì cyà mudimu.

¹⁹ Nènku piikalàbi ne ndiswa dyà Nzambi, ndi muswè kuteeta kupeta masangisha à dyàmwàmwà dyà mbú cidimu eci, bwalu ndi nguumvwa dijinga dyà cyòci aci. Nangananga mu Swis- . . . mu Suède ne Norvège, ne matùnga àbùngì à Scandinavie—Scandinave, ne kubwela mu Asie. Ndi nguumvwa ne tudi ne cyà kwikala mu disambila ne mwètù mwònsò bwà bintu ebi, bwà twikale ne cyà kuyiila njila wa Nyumà Mwîmpè ne mùshindù ùvwaYe mwà kutùlombola awu, ne bintu bìdì bikèngela bwà twètù kwenza.

²⁰ Mu dilonga maalu-malonda à kumpàlà à èkèleeziyà, à Broadbent, ne à Hazeltine, ne nsèkè yàbò yàbùngì pa bwalu abu, *Baataatù bàà ku Nicée*. . . Ne makèlèlè awu ndi mfùma ku dijikija bwalu bulonda bwà mwoyi wà Martin Munsantu mu kaabujimà ne èkèleeziyà wa Kàtòlikè wàkabenga kumuvwija munsantu; Nzambi wàkamuvwija munsantu. Nànkù bàdi. . . bwà nsòmbelu wendè munène, ne mùshindù ùvwa bimanyinu bimwèbîmwè ne maalu à kukemà àlonda muntu awu ànu mu nsòmbelu wendè mujimà; mùshindù wàkabiiishaye bantu bafwè bàbìdì, kwipata nyumà mibi, kwakula mu myakulu myenyi, ne kumòna bikèènà-kumòna ne bikwàbò, nènku mmuntu munène kaayi’s wè. Kàdi, nànsha nànkù, mu mùnsokòntò menemene wà bukolè bwèndè ùvwa mu didìpwekesha kumpàlà kwà Nzambi. Ne tudi tusangana leelù ewu ne èkèleeziyà, ùcìdì ànu ulongesha bukolè bwèndè ne ùlongesha bimanyinu bwà kulondabi mwena kwitabuujà, nànsha nànkù tudi tubàsangana kàbìdì bàditàmbisha ne: “mèmè ndi munène, kaawèwè kakesè,” nènku abi, kabyèna—kabyèna bu Èkèleeziyà wa ku mbangilu to, nudi numòna’s. Bàvwa bantu bapwekèle, ne bàà musangeelu muntu ne mukwèndè, ne bàà kalolo, buumvwa. Ne mbishiilàngàne bikolè leelù ewu.

Nènku ndi ndikonka pìikalà byàbúngì byà ku cyôci eci kabiyi bitulalùle ku m—mwoyi mulelèlà wà—wà Mukenji ewu, bwà ne, tudi bàswè kudìpwekesha twètù biine. Dìlamàayi . . . Panùdì nutàmba kudìpwekesha, Nzambi neàtambe kukwata neenù mudimu bikolè.

²¹ Mwua ndonga maalu mafwikakaja ne myanu yònsò eyi, Noël mene's mbwalu bufwikakaja. Kacyèna . . . Kakwèna cintu cilelèlà bwà bwalu bwà Noël nànsha. Noël kàvwa nànsha mutèèdìbwe mu Bible to, kacyà kabàtuku bakuukwile ditùkù dyà dileidiibwa dyà Kilistò to. Cintu bu nàнку kacìvwaku nànsha. Aci's ndiyi diswika dyà Kàtòlikè kàà cyena Loomò kàdi kí ndilongesha dyà bwena Kilistò nànsha, kakwèna Mufundù bwà bwalu abu mwaba nànsha wùmwe mu Bible ne munda mwà bidimu lukàmà byà ntwadijilu paanyimà pàà Bible, nwamònu's, kakwèna cintu nànsha cimwè bu aci to. Cintu's mbwalu bufwikakaja ànu bwètù ebu. Taatù Noël, bungèndàmùshingà pa bwòbù, bikwàbò byònsò, cintu cyònsò mu kaabujimà ncikajikile mu nsangilu munène.

²² Nwènù baalùkile ne balonge mbangilu wàci ne bapweke mpindyewu, nudi mwà kumòna mwaba utùvwà. Kakwèna cintu nànsha cimwè cishààle to, cintu nànsha cimwè kacyèna mwà kukwàcisha to pakuumusha Dilwa dyà Mukalenge. Kwajiki. Kakwèna cintu nànsha cimwè mpindyewu cidi mwà kutùkwàcisha mu cimvundù cinène eci to pakuumusha Dilwa dyà Mukalenge.

²³ Eci ke lubòte lùdì lùkontonona mikàbà yà mèyi ayi anyi? Pàmwàpa mbìmpè bwà mèmè kukontonona cintu cijimà eci, anyi ànu kubènga kucipàtula, bwalu ncipapè bibi bikolè. Kàdi ndi ngàmba eci bwà . . . Bàdi munkaci mwà kukwàta mikàbà yà mèyi mpindyewu anyi? Kanùpàànyishiku eyi mikàbà yà mèyi to, nwamònu's, eyi mikàbà yà mèyi kí nyà dipàànyisha to. Bàdi mwà kuyèla mu èkèleeziyà mujimà, anyi bikwàbò, kàdi . . . bwalu yidi . . . neyitwale cimvundù, bulelèlà ànu bwètù ebu. Nwamònu anyi? Pa nàнку yìlaminaayi ànu too ne patwàyìlongolola mùshindù mushiilàngàne.

²⁴ Mpindyewu, bangabanga ne twètù kulenga diyiiisha, nènku muntu yònsò ateetè bwà kwikala wèla meeji ne mucyankàme ne mwèndè mwònsò. Ncyàkunengesha maalu bikolè to, kàdi ndi muswè kwangata díbà dyàbúngì bwà . . . kucìbweja menemene, bwà nwafika ku dicimòna bulelèlà. Mpindyewu, twànjiibi kumpàla . . . Mpindyewu, kwòkù cintu kaciyi mu cyôci to, ngèèla meeji ne, kùdikù mwà kwikala . . .

²⁵ [Mwanèètù Neville ùdi wàmba ne kùdi yimwè nkwasu munda mutupù—Muf.] Èyowà, bwejàayi bainàbànza bàdi biimane lwà ku luseke kwàka abu munda emu. Kùdi kaaba mwab'ewu bwènù nwènù bânà bètù bà bakàji. Èyowà. Ùmwè ngwòwò ewu ànu lwà kumpàla eku. Nkwasa nyèyè ewu ànu lwà

paanyimà apa. Kùdi bânà mwab'ewu ku cyambilu eku, muntu yéyè muswè kujuuka kuulu bu mwânà mukese, bwà kushiilaku muntu mukwàbò nkwasà, muntu mukulumpe udi mwimàne kuulu awu. Mòna's, kùdi mwaba pa—pa cyambilu mwab'ewu mene bwà bânà, nàнку bakulumpe bàdi mwà kupeta nkwasà. Bainābānzà bàdi biimàne kuulu lwà paanyimà pàà dikunji pààpa. Bu nwènù. . .Ndwà paanyima pààpa lwà mu ditumba emu, kàdi bìdi. . .mbitāambe kwimana kuulu mwaba awu. Bu nwènù mwà kuswa bwà kwimana. . .

²⁶ Kùdi bāmwè pa cibumbà cyà ku cyambilu apa. Mpindyewu, bāmwè bàà kunùdi nwènù bânà bèètù bàdi baswè kubànda kunweku, bânà aba bàdi ne. . .Umwe nyéyè ewu musómbe kaaba aka ku luseke kwà Mwanèètù Way eku. Bandaayi kunweku mpindyewu, nupete nkwasà ànu lwà pabwípì apa, bwà muntu yònsò. . .nwamòna mwà kudyumvwaku bimpè, kudyumvwa. . .kwenza bwà wèwè kudyumvwa bimpè. Kaaba nkòkò aka mwab'ewu, Mwanèètù Shelby, lwà kuulu eku ànu apa pa cibumba cyà ku cyambilu eku mene, wèwè muswè bwà kubànda kunweku ne kusómbe ku luseke kwètù eku, ànu lwà kuulu eku. Nènku Mwanèètù Evans ne Mwanèètù Charlie, ne wèwè, s'ki—s'ki nkwasà ewu kaaba aka mene, ne mukwàbò ànu apa, ne yìbìdì—yìbìdì lwà apa. Bànda kunweku, mwanèètù wàwa wa ku. . .bànda ànu kunu, ùsombè mucyankàme bwà twāmòna mwà. . .kusómbe sha bantu bwònsò bapùwe ne mwètù pèètù mwònsò bwà—bwà disangisha, bwà kanùlu kucyòka ne kuzengela bwà diimana kuulu.

²⁷ Bāmwè bàà ku nwènù bânà bèètù bàdi lwà paanyimà. . . mwanèètù wa bakàjì udi lwà paanyimà mu cibweledi mwāmwa, mwimàne lwà paanyimà mu cibweledi mwāmwa. Udi. . . kùcici ànu mwaba. Mukwàbò ngwówò ewu, nkatambwa kàa pyàno kàdi muntu kampànda mwà kwangata, yéyè muswè kulwa kusómbe pa. Nebiikale bimpè. Ndi mmòna inābānzà paanyimà pààpa ufunkuna nkwasà wa munda mutupù ku luseke kwèndè aku, nàнку dībà adi's mbimpè. Bwà kudyumvwa ànu mucyankàme ne mwèbè pèèbè mwònsò mpindyewu.

²⁸ Nènku mpindyewu patùdi twenda tutèekiibwa pa myaba apa, twānjāayi. . .Kukaadi tusunsa tutwè ku makumi àbìdi, tusunsa makumi àbìdi ne túsàtù tupite pa dībà dikumi, mu ditùkù dyà dikumi ne mwandamutekète dyà ngondo wa ciswàmunène edi. Mvùla ùdi pambèlù, mu Jeffersonville emu mu dindà emu. Ne—ne pambèlù mpabì; kàdi tudi tudyumvwa bimpè munda emu, bilenga be, bamanyè ne tudi twenda tuseemena, ku Dilwa dyà Mukalenge dīdì pabwípì, ne tuseemena ku Cyendèlèlè. Ne tudi ne kusàkidila kuvule kùdi Nzambì bu mutùdi mu dindà emu bakùmbàne bwà kwimana ne kwabanyina mwena kwitabuuja, ne mwena bupidyà, Díyì dyà Nzambì udi ne mwoyi. Ndi mutwìshìbwe ne neciikalè ditùkù dinène bwà twètù bwònsò kuumvwa bintu byà Mukalenge.

29 Mpindyewu twinyikàayi mitù yètù katanci kakesè cyanààna bwà disambila. Nènku patùdi ne mitù yètù miinyika apa, kwòkò kwikala muntu udi muswè bwà kumuvùluka, ela ànu byanza byèbè muulu kùdi Nzambi, vùlukà dilòmba dyèbè mu mwoyi wèbè amu. Twasàkidilà.

30 Taatù wetù wa mu Dyulu, patùdi mpindyewu mu tabernacle, bwònsò basòmbèle panshì, cikòlokolo eci cyunzulula, ne byamu bikwàci byà mèyi munkaci mwà kunyunguluka, ne beena Kilistò munkaci mwà kusambila, malòmbà munkaci mwà kumanyishiibwa. Nènku munda mwà mbingu yìbìdi anyi yisàtù mwà ànu mu dilonga dìbà dyònsò bwà diyiiisha dyà leelù edi. Ànu ndambù mukesè wa mèyi àdi pàmwàpa Nyumà Mwimpè mufwànyine kwangata bwà kubweja cyena bwalu eci munda mwà myoyi ya bantu, bwà bààfwànyina kumòna cikondo citùdi ne mwoyi eci, ne kudilongolola bwà kutuutakeena ne Mukalenge Nzambi. Tudi baswè kusambidila babèèdi bèètù bwònsò ne beena ntàtù myaba yònsò.

31 Éyi Yesù, vùlukàku Èkèleeziyà Webè, Èkèleeziyà wa buloba bujimà, pa buloba bujimà mu dindà emu, bàmwè pambèlù mu meetu, bàmwè mu cibandabanda cyà dipàngadika, bàmwè bàà kùdìbo bàdi pa lusongo lwà mukunà. Ne mu buloba bujimà bânà Bèèbè mbaKweyemène ne bàdi munkaci mwà kuKusòka. Ne bu mwàkamba Yone wa kale, mu Cisanga cyà Paatèmò, ne: “Nànsha nàнку, lwàkù, Mukalenge Yesù.”

32 Nènku tudi bamanyè ne katwèna bapangile bwikadi bwà mwena lukunà to, yèyè ùdi misangu yònsò pabwìpi bwà kupangisha ne kwimanyika, ne bwà kwenza ní ncinyi ní ncinyi cyònsò cidiye mwà kwenza aci. Kàdi, Éyi Mukalenge, pèeshakù bânà Bèèbè diitabuuja mu dindà emu, bukolè bwà kujuuka kumutù kwà mwena lukunà, bwà kunzulula myoyi yàbò ne kuvwiya musùukà wàbò budimi bwà buloba bwà bufukè mùdi Dìyi dyà Mwoyi mwà kwikala dimyaminyiibwe, ne ditwàla disànkà dinène ne dinowa ditwè emu ne emu.

33 Ndi ndòmba, Mukalenge, bwà Wèwè kubènesha Dìyi Dyèbè ne basadidi Bèèbè. Filakù dikwàcisha kùdi dìyi dyànyì dizengèle edi bwà ngàkùmbana kushààla mukwàte ncyoncyoncyo ku dilaabiibwa dyà Nyumà Mwimpè. Ne pashiishe mu mulongo wa babèèdi, filaku bukolè ne diitabuuja, Mukalenge, bwà kakwikadiku muntu mutekète munkaci mwètù patwàpatuka mu nzùbu emu to. Enzàku nàнку, Mukalenge.

34 Tudi bamanyè ne tudi ne mwoyi ku cikondo cyà nshìikidilu. Nènku tudi tuKulòmba bwà kutùbènesha mpindyewu patùdi tutùngunuka ne kuKwindila ne tubala Dìyi Dyèbè apa. Mu Dìna dyà Yesù mmutùdi tulòmba emu. Amen.

35 Mpindyewu nèngiikalè mwà kubala myaba yìbìdi anyi yisàtù mu Mifundu, nènku ànu mùmwà mumanyishe dyàlumingu dishàale ne leelù mvwa ne cyà kuteeta kwakula pa ne: *Bwena*

Kilistò Bùlwishangana Ne Dikuukwila Dyà Mpingù. Ne aci ke cyena-bwalu cyètù bwà mu dindà emu. Nènku, mpindyewu, mèmè ncìtu mwena tèlòji nànsha, ncìtu mulongi wa Bible nànsha wa mafi to, ndi ànu muntu mupange mukàndà udi munange Mukalenge Yesù ne mwoyi wànyì wònsò. Ncyèna ndyàmba mùndi mwena tèlòji to anyi nteeta kwangata mwaba wà muntu kampànda to, kàdi ànu nteeta mu bupwekèlè bwà mwoyi wànyì bwà kuumvwija bintu ebi bìndi nguumvwa ne Nyumà Mwìmpè mmumbuulwilè, ne ndi ne cyà kubipèsha èkèleeziyà wanyì. Bwalu mbwà disànkà dyànyì bwà èkèleeziyà ewu kukolayè, bwà èkèleeziyà ewu àjaalàme bìmpè mu nyumà. Mbwà disànkà dyànyì bwalu èkèleeziyà ewu ùdi bwà disànkà dyà Nzambì, ne disànkà Dyèndè ndyànyì disànkà. Nànku ndi ne cyà kutàbaleela eci.

³⁶ Mvwa mbala bafùndi bàà maalu-malonda bàà mbangilu bwà Irénée ne bakwàbò abu, mwàkalamàbo èkèleeziyà wabò kàyì mukooyike ne bintu byà pa buloba nànsha, mwàkajuuka balongeshi bakulumpe abu ne kushàalabo bushùwà ne Èvànjeeliyò awu. Dìbà adi Bible kàvwa mufùnda mu mmwènekelu utùdi Nendè mpindyewu ewu nànsha, ànu too ne ku Dilongolola, ne pàakamùtèeka Luther pa mabèji. Kàdi bwòbò—bwòbò bàvwa ne cìvwàbo bàbìikila ne *Èvànjeeliyò ne Mùpostòlò. Èvànjeeliyò ne Mùpostòlò*, ne kushàalabo naaci.

³⁷ Mpindyewu, bwà myaba yètù yibìdi yitùdi twipacila bwà kubala mu dindà emu, ùmwè wà ku yòyi ùdi ùsanganyibwa mu Mukàndà wà Yelèmiyà, nshapità wa 7, nènku tubangila ku mvensà wa 10 too ne ku mvensà wa 18. Mwaba mukwàbò ùdi ùsanganyibwa mu Byenzedi 7:49. Nènku wèwè muswè kufùnda cyena-bwalu bwà eci, anyì cyena-bwalu cyà mu eci, Yelèmiyà 7, mbifwànyìne kwikala mvensà wa 18. Ndi muswe kutwàdija kubala kubangila ku mvensà wa 10.

Nènku kulwa ne kwimana kumpàla kwànyì mu nzùbu ewu, udi ubiikidiibwa ku dìnà dyànyì, ne kwamba ne: Tudi badiikàdile bwà kwenza byònsò byà ku binyangu ebi anyi?

Nzùbu ewu, udi mubiikidibwe ku dìnà dyànyì, mmulwe bwinà bwà biivi ku mèsù kwènù anyi? Mònaayi, nànsha mèmè ndi mucimòne, mùdi MUKALENGÈ wàmba.

Kàdi ndàayi mpindyewu mu kaaba kànyì kàvwà mu Shilò, mungàakatèeka dìnà dyànyì dyàmbedi, kàdi numòne cingàakawenzela bwà cikisu cyà cisàmbà cyànyì cyà Izalèlèlà.

Nènku mpindyewu, bwalu nudi benze byenzedi byònsò ebi, mùdi MUKALENGÈ wàmba, ne ngàkaakula neenù, kujwuka ne dindà bwè kwakula, kàdi

kanwèna nuumvwa to;...Ngaakanùbùikila, kàdi kanwàkandamuna to;

Ki bwà cinyi nêngenzelè nzùbu ewu eci, udi mubùikidùbwe ku dìnà dyànyì awu, munùdi nweyemena amu, ne mu mwaba ùndi munùpèèshe nwènù ne baatatwènù, bu mungààkenza ku Shilò.

...nènnwipate ku mèsù kwànyì,...mvwa mwà kwikala mwipate bânà bèènù bwònsò, Ndi mwipate bânà bèènù bwònsò, nànsha ndelàngànyì yònsò yà Efàlayimà.

Ki bwà cinyi wèwè kufucidi cisàmbà eci nànsha, kusambidi...bwà cisàmbà eci nànsha, anyì kùjuuki kuulu bwà kwela lubilà anyì masambila bwàbò nànsha, anyì kwenza dyakwilangana kùndi: bwalu ncyàkukutèèleja to.

Kwènà umòna cidìbo bènza mu cimenga cyà Yudà ne mu misèsèsù yà Yelusàlèmà anyì?

³⁸ Mpindyewu ndi muswè kwimanyika kumpàla kwà mèmè kubala mvensà wa ndekeelu wa cyôci eci. Lekèlaayi mbangishe kàbìdi mpindyewu. Nzambì utàndisha cisàmbà eci, ne wamba ne: “Kuteeci mene kubàsambidila to.” Ngànji kubangila ku mvensà wa 16 bwà kubala too ne ku mvensà wa 18 mpindyewu. Tèèlejàayi ne ntèmà.

Ki bwà cinyi wèwè kùsambididi cisàmbà eci nànsha, anyì kùjuuki bwà kwela lubilà anyì masambila bwàbò to, anyì kwenza dyakwilangana kùndi: bwalu ncyàkukutèèleja nànsha.

Kwènà umòna...Kwènà umòna cidìbo bènza mu cimenga cyà Yudà ne mu misèsèsù yà Yelusàlèmà anyì?

Bânà bàngula nkunyi,...baataatù bàteemesha tupyà, ne bakàji bàsopa citàpitàpi cyàbò, bwà kwenzela mukalenge mukàji wa mu dyulu tûtò, ne bwà kupòngolola milàmbù yà dinwà kùdi nzambì mikwàbò, bwà nuamòna mwà kunjuaula ciiji.

³⁹ Mpindyewu, ndi njinga kubuulula mpindyewu mu Mukàndà wa Byenzi, nshapità wa 7, ne kubangila ku mvensà wa 44, ne kubala too ne ku wa 50.

Baataatù bèètù bàakadi ne ntenta wa bujaadiki mu cipèèlà, bu mwàkadìye mutùme dîyi, wambila Mòsà, ne ùvwa ne cyà kumwenza bilondèshìle cileejilu cyàkamònaye.

Uvwa kàbìdi baatatwètù bàakalwa babweje ne Yesù mu bumpyanji bwà bàà Bisàmbà byà bendè, byàkiipata Nzambì kumpàla kwètù kwà baatatwètù, too ne mu matukù à Davìdi;

Yèyè wàkapeta luse kùdì Nzambi, ne kujinga bwà kupeta tabernacle bwà Nzambi wa Yakòbò.

Kàdi Solòmò ngwakamwibakila nzùbu.

Kàdi Mutàmbe bunène wa mu Dyulu kàtu ùsòmbela mu ntempèlu myenza ne byanza nànsha; bu mùdì mupròfetà wàmba ne:

Dyulu n'nkwasa wanyi wa butùmbi, ne buloba ncitéèkedi cyànyì cyà makàsà: nzùbu kaayi unwàngiibakila? mmùdì Mukalenge wàmba: anyi mwaba wa ùikisha dyànyì nngwèpì?

⁴⁰ Mpindyewu, nudi mwà kumòna ku dibala dyà Mifundu, ne, mwaba wùndì ntèeka meeji àànyì mu dindà emu, mpa “dikuukwila dyà mpìngù,” dyàmbedi, twamb'eku twamb'eku. Mbafunde bikesè bwà *dikuukwila dyà mpìngù*. Kakwèna mikàndà yàbùngì bwà kuumvwija dikuukwila dyà mpìngù to, cìdì dikuukwila dyà mpìngù, kàdi pààbì buloba mbùle ntèntè naadi. Ngèèla meeji ne cìdì cyènza nànkù, mbwalu kabàtu kacya badyùmvwije bulelèlè kùdì bantu to, kì mbamanye cìdìdì difwànyine kwikala to. Ne ndyèsè dyànyì, ne dyèsè dyànyì dinène mu nsòmbelu wanyi, mu dyenza dyà ngendu, bwà kumòna ndambù wa dikuukwila dyà mpìngù, bwà kumanya ne ncinyì.

⁴¹ Ne pashìishe mu dilonga dikuukwila dyà mpìngù, mu ndambù wa mbingu mishààle eyi, maalu mafwìkakaja, maalu mafwìkakaja à beena Ngelikà ne maalu mafwìkakaja à beena Loomò, pashìishe kungaalujaci bwà kumòna ni bàdi bashipa. . . ni mbatungunuke ne kulama cintu cimwècimwè ne mwoyi, kumòna dikuukwila dyà mpìngù ni dicìdì ànu mwàkadidì ku cibangidilu amu anyi. Leelù mu dyenza dyà ngendu, mmòna dikuukwila dyà mpìngù; ne pashìishe mmòna mùshindù wàkabangadi, mbala mùshindù wàkabangadi ku. . . mu matùkù à mbangilu; ndi mmòna ne kì ndishintùlùke nànsha.

⁴² Mpindyewu, nkaadi mufike mu Inde, Inde mmùle ntèntè ne dikuukwila dyà mpìngù. Bàdi ne bendedi bàà mu kapyà muntwamu ne bintu bishìilàngàne. . . Ngèèla meeji ne, mapingaja kampànda pangàakafika mu Bombay, bààkangaakidila mu mapingaja amu kùdì. . . ndi. . . muntu kampànda kungambila, mùmvwa ncìvwa mwà kumanya ne ewu ki nganyì anyì wàwa ki nganyì to, bàvwa ànu bàsanganyiibwa mu ntempèlu wa ba-Jains. Nènku cìvwa ntèndeleeleu mishìilàngàne anyì ndikumi ne mwandamutekète anyì mwandamutekète, kàdi ndi mutwishìibwe menemene ne cìvwa ntèndeleeleu mishìilàngàne dikumi ne mwandamutekète yàkatwilangana naanyì kuntwaku mu kadyòmbò kàà Dìyì, ne yònsò wa ku yòyì ùbengangana ne Kilistò òshà ne munu mwìkù. Ntèndeleeleu dikumi ne mwandamutekète mishìilàngàne's! Nènku yìvwa. . . Bààkatwenzeja bwà kuvùula bisàbaata byètu ku makàsà ku ntempèlu aku, bwà kubwela, ne bààkatùsòmbesha

panshi pa misàamu. Nènku bivwa bifwànyine kutwangata ndambù wa díbà bwà kulonda ndingudingu yònsò (mùndi ncibiikila) yìvwà yìkèngela bwà twètù kupicilamù ayi. Kàdi mulombodi wa cimenga wàkabwela neetù muntwamu, yèyè mene ùvwa Hindou, udi mwikàle Mùzùlùmaanyi.

⁴³ Kàdi's Mahomet ùvwa mupròfetà, ne wàkalwila mu mudìbù wà Ishàmèèlà wàkadi pènde mwànà wa Abraham.

⁴⁴ Nènku kùvwa nku mudìbu ewu kùvwa mutangidiki wa luumù wa pa buloba leelù ewu, kwòkò aku, nkwàkanyeemàye umwe wa ku bantu bààbò wàkamwela kadyòmbò mu ditembangana dyà makàndà mu Díyì. Nènku, mu dyànyì dimòna, mutangidiki ewu ùvwa mwà kwikala mwàmbe ne: "Mémè ncyèna ne mapà à dyondopa to, kàdi mubidi wètù wà beena kwitabuuja ùtu ne à mùshindù awu. Mpèeshèku mèbà makesè, kàdi néndwe ne muntu kampànda kaaba aka." Nwamònu anyi? Kàdi, mu bushùwà bwà bwalu, mu kwenza nàнку, díbà adi mutangidiki ùvwa mwà kwikala mudyeelè patòoke kùdì malongolodi àvwà àmutwà nyama ku mikòlò awu, nènku díbà adi yèyè ùvwa mwà kwikala mwipàciibwe.

⁴⁵ Ne pashiishe pa meeji miibìdì pa cyòcì, ncyèna ngiitabuuja mémè ne mvwa mufwànyine kulekela mwena bupidyà awu ùcimuna Díyì dyà Nzambi nànsha. Bu mémè mwà kwikala mucimùnyìibwe, mvwa mwà kushààla mwimane mwaba awu ne kuleeja diitabuuja dyànyì ne diitabuuja mu Nzambi bwà ne Yèyè ùdi ùshàala umwèumwè awu. Bu mwàkamba bàna bàa beena Ebèlù ne: "Nzambi wetù ùdi ne bukòlè bwà kutùsungila ku cikùtù cyà kapyà eci, kàdi nànsha nàнку katwàkwina mina mpìngù yèbè ayi to." Èyowà, ngèèla meeji ne cìvwa mwà kwikala cintu cyà citàmbe bukitù. Ne díbà adi kàbidì ndi. . .

⁴⁶ Mwikala mulongeshi wa cikunda wa tèòlòji ne mushindàme bìmpè mu Mifùndu, mùdì mutangidiki munène ewu, kàbidì muntu wa dikàndà mùdiye amu, ngèèla meeji ne mvwa mwà kwikala mumwelè kadyòmbò pa Díyì, bwà ne Yesù ní ùvwa Kilistò anyi to, anyi ní m'Mahomet uvwa mupròfetà, ne mvwa mwà kumujaadikilaci ku Bible wendè sungasunga. Bu cyòcì aci cìfwànyine kwikala dibìikila dyànyì (mu Bible) bu mùdìbi ne mmutangidiki, bwà kucyùmvwija, mvwa mwà kwikala mwangàte dinàngà adi pamutù ànu pàà kunyeemakù ne kwaluja makàsà paanyimà. Aci kuleejaci. . . Aci kacýèna cileeja bukitù bulelèlè bwà bwena Kilistò bwikala mwà kwimana mwab'awu, nànsha byà kumòna lufù. Nzambi ùdi ne bukòlè bwà kusùngila. Ngèèla meeji ne mvwa mufwànyine kwikala mumupingajila kadyòmbò pa bwalu abu.

⁴⁷ Kàdi bààkapwa mwoyi bwà kwela meeji ku Bombay pàvwà muntu mpofo awu, ba-Mùzùlùmaanyi abu, dilòlòlò adi wàkapetulula lumònú lwèndè mu masangisha awu. Kì mbafwànyine kubùtèèla nànsha.

48 Kàdi, nànsha nàнку, bwà bantu aba, kî mbeena lubombo to. Mbantu bàà meeji matòoke, bàà meeji matòoke ànu bu wêwê ne mêmè, ne misangu mikwàbò batùtàmbe ne twètù munwemu mu Àmèrikè emu. Kî mbeena lubombo nànsha. Bàdi bulelèlà bìtabuuja aci ne bàcyenza ne mwàbù mwónsò.

49 Lekèlaayi nupèèsheku kantu kampànda kakesè pa dikuukwila dyà mpìngù. ngápù ne mwoyi dínà dyà nzambi utu nzambi wa bendedi bàà mu kapyà awu, kàdi's ndupìngù lunène lule lwikale ne cyà cinène, cyà katankù. . .cintu kampànda cifwànàngàne ne kwìsù kwà muntu, cyenzè bu mmwènekèlu wa dibwe disonga dyà cyondòkò, ciikale ne maci male, manène bwà kutèeleja mpèkaatù yàbò yónsò ne bikwàbò. Ne mabwe manène à bilengà, à katankù menze bu tukànù twà ku maci ku èndè. . .ku maci èndè eku, tùdì, tufwànyìne pàmwàpa kuyiila mushinga wà cyàbìbìdì cyà mùliyò ku kàmwè, pàmwàpa's; aci's ncifwànyìne kwikala dinèkesha dyà mushinga, cidì mwà kwikala diwùpwekesha. Kàdi, kaa, bilengà binène byà mushinga mukolè bu abi ku lupìngù alu's!

50 Nènku nsaserdòsè wa ku ntempèlu ùdi ùtwala cidime mukwate ne luse awu, kabyèna bìkèngela bwà kwikalaye. . . ànu muntu wetù wa patupù ewu, kabyèna bìkèngela bwà kwikala muntu kampànda wa pabwèndè to. Ùdi ànu muntu wetù wa patupù ewu, cidime ùdi muswè kusàkidila nzambi wèndè awu bwà dinowa dímpè dyenza. Nènku, mu kwenza nàнку, ùdi ùleeja diitabuuja dyèndè mu nzambi pàdìye ùlwa ku ntempèlu apu ne ùbèneshiibwa kùdi nsaserdòsè wèndè awu.

51 Nènku díbà adi bwà. . .ùdìlongolola bwà kwendela mu dijiba dyà makàlà dyà dyonduke byàbùngì ne dyalàbàle bikolè, kàdi dipeepuja ne màkàpakapà too ne mùdì makàlà awu àshààla matòoke tòò ne kapyà. Mpindyewu, aci kî mmapìkù to, s'mbulelèlà. Ùyaaya kumpàla kwà lupìngù alu, ùtondela nsaserdòsè awu mpèkaatù yèndè, nènku bàmwicikijila màyì pambidi; màyì à cijila, ne bikwàbò, àdì nsaserdòsè awu mubènèshe.

52 Ne pashiishe, misangu yàbùngì, bàtu bàngata ndobo munène, ndobo wa mishipa, wa katankù, munène, pàmwàpa wa cyàbìbìdì anyì byà binaayi bisàtù byà cyàlà mu—mu bucyàmà, kuumukila ku lusongo ne—ne lwà paanyimà pàà ndobo awu apu. Nènku bàdi bàtèekapù kandundu kakesè kàà màyì, byenze bu kaacilengejilu kakesè kàà ku mucì wà Noël, ne kandundu kakesè, ne bàkùja ntèntè ne màyì bwà kukàneemesha bujitu. Nènku bàngata, mu bushùwà bwa bwalu, binunu byà ndobo ayì, kàdi bamwasayì mu mubidi wèndè amu, benda bàyìnana bakòka. Pàdìyi yènda ìbwela, mu mubidi wèndè apu, bàyìkòka, bwà kupìcila mu dikengeshiibwa bwà kusànkisha nzambi wèndè awu, lupìngù alu's. Kî mbèena lubombo nànsha.

53 Pashiishe, misangu yàbùngì, bàdi bàpàtula ludimi mukana

batwèpu difùmà ne nsomù, ùbwela mu ludimi amu ùbànda too ne mu dyùlù ne ùshààla mubilamè pàmwè, bàngata nshinga yà bwandà bàtelakaja mishìku pàmwè bwà ne bwòbò. . . yôyi myâmbè bintu bibi. Kàdi dikengeshiibwa bu nàнку's wè!

⁵⁴ Ne dîbà adi ùsòmbela panshì pabwîpi ne dijiba dyà kapyà adi. Bàshipa mbuji, bwà kutuuyisha lupìngù alu, bwà kulàmbula mwoyi kampànda bwà mpèkaatù yàbò. Kàdi's bivwa bikèngela wèwè kuumvwa mu—mutooyi wà bisuusù dîbà divwà mbuji awu ùshipiibwa. Bàdi bàtondelapu mpèkaatù yàbò ne bàshebeya mbùji awu, bàkùpa. . . bàngata mashi bu difuta dyà cibawu.

⁵⁵ Nènku dîbà adi mwenedi wa mu kapyà ewu, yèyè muumvwe bwòwà ne munyeemàkàne mu kapyà amu, ùdi ùdifwisha yèyè nkàâyendè bundù. Kàdi ùdi ne cyà kwenda bitùùlù bitùùlù ne bukitù mu makàlà à kapyà awu. Nènku míngà misangu, makàlà à kapyà awu àtu ne bwondòke bwà metèlè ànaayi ne citùpà. Ne pàmwàpa metèlè ànaayi ne citùpà pàmwàpa ànaayi ne citùpà mu bwòndòke ne pàmwàpa mu bule bwà metèlè makumi àbìdi ne mwandamutekète anyi makumi àsàtù ne àsambòmbò, ne ipacila, kaa, pàmwàpa metèlè àbìdi ne citùpà anyi àsàtù mu bwalàbàle. Kàdi mmakünze mashààle cìdìdìi. Kàdi kèèna ne cintu pambidi to pa kuumusha kaamukùsu, kiikàle ànu kapese kakesè kà dipùpilà kajìngila mu cìfùkà cyèndè amu. Nènku ùdi ùpàtuka naakù kwàka, ne byònsò ebi bìlembèlèlè, ne mashi bizòna, ne ndobo yà mishipa ne bikwàbò byònsò pambidi pèndè pajimà apu, ùdìbweja nkàâyende mu dyenzejiibwa kampànda too ne mùdi bitutu bitòoke bimupàtuka ku mishiku.

⁵⁶ Nènku ki yèyè ùlwàlwa ewu, wèndela mu kapyà aku, upàtukila lukwàbò luseke lwàlwa, kakàyi kamwenzele bwalu nànsha bukesè to, mupicile mu kapyà, kàdi pàmwàpa makàsà èndè mabwele mu bule *kampànda* (mikòlò) mibwele mu kapyà aku, bule bwa makàsà àbìdi anyi mapite apu pàdiye wènda wènda apu, wènda ùpulumunangana ne makàlà makünze à kapyà awu pa mubidi wèndè wà buntu awu, wèndela mu kapyà aku ne ùpàtukila ku lùngà luseke aku kakùyì bwalu to. Nudi mwà kumutàngila ku makàsà, kakùyì ní cijùji ní ndifyondoka to.

⁵⁷ Ne mu ditàngila nàнку, ke mèmè kudyàmbidila ne, pìikalà mulàmbù wà bènzela lupìngù lwà cimpàngaanù, ne mashi à mbuji, ne diitabuuja mu cintu cyà mùshindù awu bifwànyine kukùba mupàngaanù ku kapyà, ncinyi civwà Mashi à Yesù Kilistò mafwànyine kwenza bwà mwena kwitabuuja wa Nzambi udi ne mwoyi?

⁵⁸ Mpindyewu, dikuukwila dyà mpìngù ncintu cyà pabwàci. Munda mwà bikondo twàkadi ànu naadi, kacya ànu kwònsò. . . ngèèla meeji, ku cibangidilu cyà cikondo. Mpindyewu, bulongàme bwà dikuukwila dyà lupìngù edi's mmuntu wènda lupìngù alu, wimanyika lupìngù alu, pashiishe ùdi ùbwela

ne ùdìlongolola bwà dikuukwila dinène edi. Mpindyewu, ùdi wìtabuuja ne lupìngù elu ndwenza mu cimfwànyì cyà nzambì kampànda utuyì kacya kàyì. . . kàyì mwanji kumòna to. Yéyè kèna ne mmwènekèlu to, pa nàнку ùdi wìtabuuja ne ùdi mu cimfwànyì cyà lupìngù lùdiye wènzela nzambì ewu alu.

⁵⁹ Mpindyewu, aci kacìnuumùkù to! “Cimfwànyì” cìdi mu cimfwànyì cyà nzambì mufwìkakaja udiye wèla meeji ne ùdiku awu.

⁶⁰ Dìbà adi ùyaaya kumpàla kwà lupìngu elu ne ùpòna mikookwela yéyè mwine, ne wìtabuuja ne nzambì udi muntu wa kàyì ùmwèka awu ùdi ùtùluka ùbwela mu lupìngù elu, ne wìtabuuja ne ùdi wàkwila ne nzambì ku lupìngù alu, ne nzambì awu ùdi ùbwela yéyè mwine mu lupìngù mu ne ùmwandamuna. Ne bààbùngì bàà ku nwènu balongeshi aba bàtù bangate maalu mafwìkakaja. . . Nànsha nzambì ayi mene, yìvwa yìlwanganyishangana umwe ne mukwàbò, mùdìbo bàmba, ne bikwàbò byònsò, mu matùkù awu.

⁶¹ Mpindyewu, mu ngaakwilù mukwàbwò, nzambì awu ùdi ùumuka yéyè mene mu cipaapù cyèndè citàmbe-mfukilu aci, ùbwela mu lupìngù alu, ne wàndamwina mukuukwidi awu ku lupìngù alu. Ne mukuukwidi awu, mu disaluka kampànda dyà didyènzela, ùdi wèla meeji ne lupìngù alu lùdi lwakula nendè, ku mwoyi wèndè, ne mmufwidùbwe luse ku mpèkaatù yèndè ne bikwàbò, kupìcila ku lupìngù alu, bìdì bìleejà patòòke tòò ne ndyabùlù. Ndyabùlù udi wenza nàнку.

⁶² Nèнку kabèèna ànu bènza bintu ànu ku mpùùkapùùka nànsha; bàmwè bàà kùdìbo bàdi bènza nàнку, kàdi kùdi bàmwè bakuukwidi balelèlà bàà menemene bàà bintu abi. Cileejilu, ndi mwà kunùlondela maalu à mùshindù ùdi badémons abu bènza bintu byà mìshindù yònsò mu mpìngù ayi, yifikisha mashi ku dipàtuka mu bintu, ne bintu bikwàbò byònsò. Yòyì—yòyì yìdi—yòyì ayi ndémons!

⁶³ Nèнку wèwè kùyì wìtabuuja ne. . . kùdi bulelèlà dyabùlù to, kwèna wìtabuuja ne kùdi Nzambì to. Bushùwà, bikèngela wìtabuuje cìdi cibèngàngàne, kùdi cyà bushùwà ne kùdi cyà mafi. Pa nàнку kùdi démon mwena diinà, ne yéyè awu's mmupersònà. Kì *mmeeji* kampànda to, yéyè's *mmupersònà*.

⁶⁴ Mpindyewu, kùdi dilongesha dìdi dinyùnguluka dyàmba ne: “Dyabùlù ùdi ànu—ànu meeji mabi àudi naawù.” To, to, kabyèna nàнку to. Dyabùlù's mmuntu.

⁶⁵ Bantu bàmwèbàmwè abu bàdi biitabuuja ne “Nyumà Mwìmpè ùdi ànu m—meeji mìmpè àudi naawù.” Kàdi kwìtabikù aci to. Nyumà Mwìmpè m'Mupersònà, M'Mupersònà wà Kilistò mu mmwènekèlu wa Nyumà.

⁶⁶ Mpindyewu, bakuukwidi bàà mpìngù aba. . . Ne nudi ne Mifùndù yènu mìlongolola anyi myaba bwà Mifùndù yènu ayi. Ndi—ndi mufwànyine kuleedila ku yimwè yà ku yòyì mu katanci

kakesè emu, Mifùndu's, tudi bafwànyine kubala ndambù. Mpindyewu, bakuukwidi bàà mpìngù aba, bapòna mikookwela kumpàla kwà lupìngù alu, bèèla meeji ne nzambì udibò bàkuukwila awu mmuleejùwe mu lupìngù alu. Mpindyewu, nudi buumvwe aci anyi, cyà ne mukuukwidi awu kí mmwena lubombo to? Ûdi bulelèlà útwilangana ne cintu kampànda cidi mu lupìngù alu, bwalu cidi cimwalukidila, ùdi wènza cintu kampànda; ùcìpetela ku lupìngù alu, lwà bwalu lwikale nzambì mufwikakaja, kàyì mulelèlà Awu to.

⁶⁷ Ne misangu yàbùngì dyabùlù ùdi ùbwela mu bintu abi. Ne dyabùlù ùtu ùbwela mu masangisha misangu mikwàbò ne ùdyènza yèyè mwine bu Nzambì. Ndi mumòne eci mu mudimu wànyì wà bwambi.

⁶⁸ Mpindyewu, vùlukàayi ne, eci cidi ànu...tudi ànu tulongesha mu dindà emu. Nènku ndi muswè bwà èkèleeziyà ewu, pàndì ngùumuka bwà kuya mu mudimu wà bwambi mwab'ewu bwà kupàtuka kuya mu madimi à bwambi, Ndi muswè bwà nwènù kushàala ne mpaasàtà wenù ne kushàala ne Dilongesha didi dilongèshùbwa kaaba aka. Shàlaayi ne Dìyì edi, kanùDìshiyikù to! Shàlaayi nwènù ànu ne Dìyì nànsha cinyi cilwe anyi ciyè, shàlaayi ne Dìyì adi! Nwamònu anyi? Mpindyewu, ne ànu bwalu ndi ngùumuka. . .Ndi ànu umwe wa ku bampaasàtà kaaba aka. Mwanèètù Neville ùtu ùlongesha cintu cimwècimwè cìntù ndongesha aci, nàнку nùlwayì ànu kulwa ku èkèleeziyà bwà kutèeleja Dìyì.

⁶⁹ Ncyèna mumanyè kwàndombolàYe to. Mvwa ngàmabila mukàjàanyì mu dindà emu ku mèèsà ne: “Kùdi cintu kampànda munda mwànyì emu cidi cyèla mbilà mikolè bidimu byònsò ebi, ndi ne cyà kujingulula ne ncinyi aci.” Mpindyewu, ncyèna mumanyè ne njila kaayi walombolaCì to, kwàyàCì aku, kàdi kwàndombolàYe aku nendondè.

⁷⁰ Mpindyewu, dikuukwila dyà mpìngù, dicidikù too ne leelù ewu. Tudi tusangana. . .Ndi musangàne bantu bàlwa ku cyoshelu, ne malongesha mafofo à kùdi balongeshi bafofò, àmba ne: “Dikàngule ànu cyanààna, ùpwe bintu byònsò mwoyi, shiya mu meeji èbè mutupù. Neùlwe E—Eliyà. Neùlwe *cikampànda*, *cikansanga*, anyi *cikankènga*.” Mashimi kaayi's wè! Kwena ulwa kùdi Nzambì nànsha. . .Aci's nkukangwila nyumà yà dyabùlù yà mìshindù yònsò musùukà wèbè bwà kubwelayimù. Kwènjikù nàнку to. Udi ne cyà kuvùluka ne kùdi dyabùlù, ne yèyè ùtu ùtentula Kilistò mu katòba, mu kantu pàmwè ne kwònsò.

⁷¹ Mvwa mbala mu *Mwoyi wà Martin Munsantu* kùkaadi cikondo kampànda, bwà mwaba ùvwà nsongàalùme kampànda, ùvwà bulelèlà mudyambike, ki kwambayè ne Nzambì ùvwà mumubiikilè bwà kwikalayè umwe wa ku bapròfetà bàà kale abu ne: “Nwènù ntèèlèjaayi, ndi umwe wa ku bapròfetà bàà kale abu.” Nènku cilongelu aci. . .Martin, mu bushùwà bwà

bwalu, kàvwa mwà kutèèleja cintu cyà bu nàнку to. Pa nàнку kabààkaciitabuuja nànsa bwalu nsòmbelu wa nsongààlùme kàvwa ùpetangana naaci to. Ndekeelu wa byònsò kwambayè ne: “Nènnùjaadikilè ne ndi mubiikidiibwe bwà kwikala mupròfetà wa kale. Wa bwalu ànu nsongààlùme wetù ewu,” kwambayè ne: “kàdi ndi mubiikidiibwe.”

⁷² Nwamònu’s: “Mapà ne mabiikila kí mbyà dinyingaleela to.” Nwamònu’s, bàdi bàlaluka ku Diyì, kàdi paùdi ulaluka ku Diyì udi ukabwela ní mmu cintu kanà cyònsò nàka.

⁷³ Ke nsongààlùme ewu kwamba ne: “Bufùku ebu, mundankùlù mwàmba kukùla, Nzambi neàmpèèshè mùzàbì mutòòke, bwà kusòmba naawù munkaci mwènù bwònsò, bwà kuleeja ne mèmè ndi mupròfetà wa kale.” Ki bwòbò. . . butuku abu bòbò bwònsò kutèèlejabò, ke kununganabo ne: “bwelàayi,” ke bantu kutàmbakana. Nèнку nsongààlùme kupetayè mùzàbì mutòòke. Pààkuumuka mwenyi, kuyabò bwà kutàngila mùzàbì awu, ùvwa mùzàbì mushùwashùwàlè, mulelèlè, mutòòke, umwèka mwímpè mutàmbe.

⁷⁴ Kàdi, mwèpiskòpò mukùlumpè awu, kàvwa ànu mufwànyine kwitaba aci to. Kacivwa cimwènèka cijaalàme to, bwalu, kacivwa cìpetangana ne Mifundu nànsa (mùzàbì mutòòke).

⁷⁵ Kàdi pààkenzaye nàнку, kwambabo ne: “Twàngatàayi mùzàbì ewu tukiimàne naawù kumpàla kwà Martin Munsantu, muntu wa Nzambi awu.” Kàdi yèyè kàvwa muswè kwenza nàнку to. Kàvwa muswè kwimana kumpàla kwà mupròfetà mushùwashùwàlè awu to. Kàvwa muswè kuya kiimana to; kàdi kumwenzejabò ku makàndà bwà kuya. Nèнку mbenze ànu bàtwadija kuya nendè, mùzàbì kujìminawù ne kuyawù munga mwaba, kabààkamanya kwàkayàwu nànsa. Nwamònu’s, pàyaayabo naaci ku diteetangana dyà makàndà’s!

⁷⁶ Wèwè ne ngòlò mushùwashùwàlè kabyàkukutàcisha bwà kumanya ne mmwímpè anyì kí mwímpè to, neàtambe diteeta myaba yònsò. Ne Nyumà mulelèlè wa Nzambi neàtambe diteeta bwalu mmuteetela ku Diyì dyà Nzambi. “Pa lubwebwe elu Nèngiibakilepu Èkèleeziyà Wanyi.”

⁷⁷ Nkaadi mumònemòne bantu babwela mu dibìnduluka, bantu bimpè. (Mpindyewu nudi mwà kumòna bwà cinyi ncyèna muswè bwà mukàbà wà mèyi ewu—ewu kusùmbishiibwawù.) Nkààdikù mumòne bantu bimpè, ne beena Mpenta, bampaasàtà bàvwà kabàyi bumvwa to, bantu bàbìnduluka ne bàbwela mu nyumà, ne bikwàbò byònsò mùshindù awu, kàdi—kàdi benza bintu, ne ndekeelu wa byònsò bikabafikisha ku diya mu byondopelu byà bapaalè. Cìvwa ndikangula dyà mwoyi wàbò, bantu kabàyi bamanyè bwalu to, kàdi badémòns bàbwelamù ne bàshikamamù. Kùdi démon mulelèlè!

⁷⁸ Mvwa mbala kaaba aka mwàkalwabo kùdi umwe. . . ngèèla meeji ne ùvwa ng’Irénee anyì Martin, umwe wa ku bwòbò,

(bàmwè bàà ku balongi bàà Bible bàdi batùkine mu eci bampite mémè), wàkadì ne cifulu cyà butùmbi cyà ngòlò ku mutù kwèndè, mùzàbì mutòòke pambidi, bisàbaata byenza ne ngòlò ku makàsà, kwambayè ne: “Mémè ndi Kilistò, njikùlè Mémè!” Munsantu awu kàvwa mwà kwenza nàнку to. Mupròfetà mulelèlà wa Nzambi awu kàdi kwimana mwaba awu, mwindile. Ne kumwabilaye misangu yìbìdì anyì yisàtù ne: “Mémè ndi Kilistò, Njikùlè’s!”

Yèyè ne: “Kilistò wetù kàtu ùlwa mùshindù awu to.”

⁷⁹ Ncyà bushùwà, bikèngela ùmanyè Díyì! Shààla pa Díyì! Nwamònu’s, mvità minène yidi pabwipi. Mpindyewu, tudi banàye ne èkèleeziyà bidimu ne bidimu, kàdi díbà dyàkùmbanyi mpindyewu diikala Yanè ne Yambèlè mwà kukàndameena Mòsà bu mùdì Bible mwàmbè ne nebènzè nàнку. Nènku neciikale mvità yà nyumà, ndululu. Nekwikale ànu bàmwè bààtùnguka, èkèleeziyà wa dìngumba neàtùngunuke ànu ne kuya too ne mwàkabwelaye mu bukòòkeshi ne kutùnguka mùshindù ùyaayàye awu. Kàdi ndi muswè kwamba ne mwena kwitabuuja mulelèlà ùdi ùlwa mu cyalu cyà mvità aci, ne byàkadì bìmpè wèwè kwikala mutùkinemù ne kasukì ne mumanyè cyùdì munkaci mwà kwenza, cyanààna ùdi mufwànyine kwangata nyumà mubi ànu bipeepèle pèepèlè kàdi kùyì mumanyè to. Byòbì bibèngangana ne Díyì edi, kùbìtàbùùji to! Shààla ne Díyì adi!

⁸⁰ Dikuukwila dyà mpìngù, dikuukwila dyà mpìngù ndyà kale, ndyà kale munwemu mu États-Unis emu. Ne kukaadi bidimu, ba-Indiens Pueblo, ne lwà mu Arizona mwàmwa, bàvwa bàkuukwila lupìngù kampànda. Nènku, aci’s cìvwa, bàvwa—bàvwa ne nzambì wa mvùla. Ne nzambì wa mvùla awu ùvwa . . . bàngata n—nkùvu wa mu bitocì, ne bènzà cimfwànyì cyà nkùvu wa mu bitocì. Nènku bàvwa bàmutwa bikeji bikeji pambidi pèndè pònsò apu byenze bu ne ùdi ùpàtukila mu bitocì. Nènku bàvwa mwà kudyèla bwòbò biine kumpàla kwà nkùvu wa mu bitocì awu, bèèla meeji ne kùvwa nzambì wa mvùla ùpweka ùbwela mu cizubu cyà nkùvu wa mu bitocì ewu ne ùbààkwila ku nkùvu wa mu bitocì ewu. Bwalu bàvwa biitàbùùje ne . . . ùvwa musòmbèle mu bitocì ne mutaleela, ne yèyè ùvwa nzambì kumutù kwàcì. Bàvwa ne . . . cintu’s mbwalu bufwikakaja, ànu di—diitabuuja dyà budìngìbudìngì bwà ne ncilelèlà.

⁸¹ Mpindyewu, nènku bààkakuukwila baadémons mu kwenza kwà nàнку. Kukuukwila nkùvu wa mu bitocì, bèèla meeji ne ùvwa nzambì wa mvùla, kutwàlabò nyumà pambidi pààbò apu, bushùwà, bwalu mbamukangwile myoyi yàbò. Kàdi pààci nyumà mubi’s!

⁸² Ki mùdì bantu bààbùngì leelù ewu bàkangwila cintu cibi myoyi yàbò’s! Nudi bushùwà nupeta nyumà kampànda, kàdi misangu yàbùngì ùtu ùbèngangana ne Díyì, wàmba ne: “Matùkù

à bishima àkaadi mapite! Kakùtukù cintu pààci ne *cikampànda* anyi *cikansanga* to.” Vùlukaàyi ne, aci’s ndyabùlù mudyalùle mu bwena Kilistò. Nzambi àtùkwacisheku patùdi tubwela mu cyòci eci paanyimà pàà katanci, bwà nwènù kucimòna, nwamònu’s, bwà ne nnyumà mubi mudyalùle mu bwena Kilistò. Kàdi kí n’Nyumà wa Kilistò to, bwalu Nyumà wa Kilistò ùdi ùlwa ku Dîyi musangu wònsò. Yéyè kèna mwà kuvila Dîyi Dyèndè Yéyè mwinè to.

⁸³ Mpindyewu, pààkalwà bwena Kilistò ku Loomò, Loomò, mu cimenga mene cyà Loomò aci, mùvwa ntèmpèlù nkàmà yìnaayi yà cimpàngaanù munda mwà cimanu cyà kilòmèètà dikumi ne umwe aci. Ntempèlu nkàmà yìnaayi yà cimpàngaanù, ne yìvwa yà nzambi milùme ne nzambi mikàji. *Nzambi milùme ne nzambi mikàji*, “bakàji ne balùme.” Nzambi ayi, nkàmà yìnaayi mishìilàngàne. Ànji elàayibi meeji ku bwalu abu, nkàmà yìnaayi yà Kabàmbà’s!

⁸⁴ Mpindyewu, aci’s ke cyàkasangana Pòlò pààkayaye ku Loomò. Aci’s ke civwabò naaci kùdi Akulà ne Pisisikilà pààkatùmiibwabo buumukila ku Mpenta ne kwasa èkèleeziyà mu Loomò; ki mwàkalwàbo kubwela, mu dikuukwila dyà mpìngù dyà cimpàngaanù. Kùvwa bantu biipacila ku miliyò yìbìdi mu Loomò amu, mu cimenga cinène cyà Loomò; mbwena kwamba ne, bapika, ne bàvwa basòmbèle pa mpengà pà cimenga aci, ne bikwàbò, bantu biipacila ku miliyò yìbìdi. Kàdi bimanu bìvwa binyungùlukile Loomò bìvwa byà kilòmèètà dikumi ne umwe. Nènku munda mwà kilòmèètà dikumi ne umwe amu, lwà kwìnshi kwà mukùnà menemene, kùvwa ntempèlu nkàmà yìnaayi yà cimpàngaanù, bwà nzambi yà cimpàngaanù milùme ne mikàji.

⁸⁵ Mpindyewu, ndi muswe kwakula kaaba aka ànu bwà katanci cyanààna pa cintu kampànda cìndi mwangàte mu maalu-malonda, nènku ndi ne bùmwe mwab’ewu. Mùshindù wàkabwelabo mu dikuukwila, mmunyi mùvwàbo bafika ku dikuukwila? Mmunyi mùwà mumpàngaanù ùlwa bwà kukuukwila? Cintu cyà kumpàla civwàye wènza civwa nkuya ku ntempèlu ne kutwilangana ne nsaserdòsè, nsaserdòsè mumpàngaanù awu. Pashìishe ùvwa mwà kumupèèsha mulàmbù wà mfranga bùngì kampànda, ne pashìishe mulàmbù kampànda, wà nyama, bwà kutuuyija cilunji cyà nzambi uvwàye ne cyà kuyiikila nendè awu.

⁸⁶ Nènku misangu mikwàbò, mu ntempèlu kampànda, mùvwa mwà kwikala nzambi mipite pa umwe yà mishindù mishìilàngàne. Mùvwa mwà kwikala “nzambi milùme ne mikàji,” ne bikwàbò byònsò, mu ntempèlu umwe.

⁸⁷ Nànku nsaserdòsè mumpàngaanù awu. . . Yéyè ùvwa mwà kuya kùdiye ne kumupèèsha dambù wa mfranga, ne nsaserdòsè mumpàngaanù awu ùvwa mwà kumwalujila kandeyi, ànu

kandeyi kashile kàa mafutà kàa ciibidilu aku. Nènku dîbà adi mukuukwidi awu ùvwa wàngata kandeyi aku, paanyimà pàa mumanè kufuta nsaserdòsè mfranga, wàngata kandeyi aku ne ùya lwà ku cyoshelu kampànda cyà nzambì ewu uvwayè muswè kuyikila nendè awu. Ne pa cyoshelu apu pàvwa kapyà, mwaba ùvwa mulàmbù ne cyà kwoshiibwa. Ku makàsà à lupìngù, ntempèlu munène wa cyamu cyà kabanda awu, anyi—anyi lupìngù alu, ne wàngata ntempèlu ew-...kandeyi aka ne ùkàteemeshila ku kapyà kàa ku cyoshelu aku, kapyà kàa cyoshelu cyà lupìngù aku, ùvwa ùteemesha kandeyi aku ne ùpwekelela kwinshì kwà—kwà cyoshelu aku kumpàla kwà—kwà lupìngù alu, ne ùtèeka kandeyi aku pashì apu. Ne pashiishe paanyimà pàa mumanè kutèeka kandeyi pashì...

⁸⁸ Ngèela meeji ne mbwà nzambì kampànda munkaci mwà nzambì mikwàbò yònsò ayi wàmona mwà kumanya ne mmu lupìngù kaayi menemene mùvwàye ne cyà kubwela, nudi bamanye's, bwà kwalukila ne kuyiikila nendè. Bwà cinyi kandeyi, ncyèna mumanyè to. Kàdi ùvwa ùtèeka kàndeyi pashì, kateemeshila ku midilu yà ku cyoshelu ayi.

⁸⁹ Ne dîbà adi ùvwa mwà kwalukila pambèlù mu cibambalu cyà mwinshi cyà tabernacle aci, ne mwòmù amu ùvwa mwà kupona mikookwela kutwà mpàla pashì. Nènku kwòkù aku ùvwa mwà kutèeka musùukà wèndè wònsò, dikànda dyèndè dyònsò mu disambila dyèndè, ne kusambila nzambì munène wa mùshindù kampànda ewu, diitabuuja dyà budìngìbudìngì, nzambì wa mufwikakaja, kusambila nzambì ewu bwà kupweka mu cimfwànyi eci ne kwakula nendè.

⁹⁰ Mbàmbè ne “Umwe wa ku banfùmù bàà makalenge maalàbàle ùvwa ànu mwà kupòna mikookwela yèyè mwine kumpàla kwà cimfwànyi cyà Apòllos bwà ne ùvwa bulelèlè mwà kwamba ne mmumvwe mèyi àfùmina mu ntempèl-... ùmukila ku—ùmukila ku lupìngù alu, ùyiikilangana nendè.” Ùpòna mikookwela yèyè mwine's!

⁹¹ Udi mufwànyine kwamba dîbà adi ne: “Mwanèètù Branham, wàkuumvwaku díyi kampànda anyi?” Ncyèna ne ngèela mpatà ne wàkuumvwa to, kàdi dìvwa ndíyi dyà démon. Kakùvwakù cintu pààci ne Jupiter, nzambì kampànda, ne nzambì mikwàbò yònsò yìvwabò naayi ayi.

⁹² Kàdi bàvwa bàpòna mikookwela bwòbò biine, nènku bàvwa bàshàala mwaba awu ne bàkuukwila, bàkuukwila nzambì uvwa kàyi umvwika awu uvwabò kabàyi bamanyè bwalu bwèndè nànsha bùmwe to, pàvwa nyumà wèndè mu lupìngù lùvwàbo bèela meeji ne ndufwànàngàne nendè alu. Bàvwa bàmwenzela cimfwànyi, kàdi aci kupetaci luse lwèndè.

⁹³ Pashiishe bàvwa bàfila mulàmbù. Nànku pàvwàye ùdyùmva musalùke yèyè yònsò mu disaluka edi, ùvwa ùbànda kàbìdì kumpàla kwà lupìngù alu ne musangu ewu nsaserdòsè

mumpàngaanù ewu ùvwa ùmutwàdila cyàkudyà kampànda—kampànda ne cyàkunwà, ne kubitèèka ku makàsà à lupingù alu. Ne pashìishe. . . (Mpindyewu, ndi naaci. . . cifùnda kaaba aka pa dibèji edi, ndi ncibadilamù buludì. Nwamònu anyì?) Nènku ùvwa mwà kupweka ku makàsà à lupingù elu, ne wàngata ndambù wa mulàmbù wà cyàkunwà ewu ne kuwùbyùkulaku ndambù, ne kudyàku ndambù wa cyàkudyà aci ku mènù, ne pashìishe kubìpòngolwela pa makàsà à lupingù alu.

⁹⁴ Ncinyi cìwàye munkaci mwà kwenza? Munkaci mwà kubwela mu bwobùmwe ne badémòns; nzambì milùme ne mikàji. Ànu cimfwànyi ci—cileeeji cyà bwobùmwe bwà bwena Kilistò ne Kilistò, bàdya nkòòmuniyò. Aci cìvwa cyà mùshindù wà ne èkèleeziyà wa kumpàla anyi beena lwendu bàà kumpàla bàà Èvànjeeliyò (bààkalwà ku Loomò abu) basangane, ùvwa mu bantu aba mu mùshindù wà dikuukwila ewu.

⁹⁵ Baalà ùvwa nzambì mutàmbe kumanyika wa cikondo cyònsò, wa ku mpingù, ùvwa Baalà (B, a yìbìdì, l), yéye ùvwa nzambì-dìbà. Nènku pashìishe ùvwa ne—ne mukàji, nzambì-ngondo, nzambì mukàji, Ishtar, I-s-h-t-a-r, Ishtar. Ne bàtu bàcishindumuna kàbìdì ne: A-s-t-a-r-t-e, “Astarte.” Ùdi ùsanganyibwa pa dikùtà dyà cinjàanjà dyà beena Loomò. Ùvwa ùbùkidiibwa ne nzambì mukàji, nzambì mukàji ngondo, anyi “mukalenge mukàji wa dyulu, mamwèndè wa nzambì,” nzambì-ngondo. Ne nzambì-dìbà ùvwa Baalà.

⁹⁶ Èè, pàmwe ne bampàngaanù bwònsò bàvwa bàkuukwila dìbà adi. Nànsha mene ba-Indiens bàvwa bènza cintu cimwècimwè aci dìbà—dìbà ditwàkalwà, kujandula Àmèrikè ewu, pàakashiibwa Àmèrikè ewu. Kulwa, baataatù kulwabò munwemu, kusanganabò ne bàcìvwa ànu bàkuukwila dì—dìbà. Bwalu, mu eci, mmùvwàbo bàkuukwila.

⁹⁷ Mùshindù awu ke ùvwabo bàkuukwila nzambì milùme ne mikàji ayi mu Loomò, pàakafika bwena Kilistò ku Loomò.

⁹⁸ Mpindyewu, mu lwendu lwànyì, ndi mumòne ne dikuukwila dyà mpingù kí ndyànji kushintuluka nànsha. Ne nànsha bwena Kilistò bulelèlè kí mbwànji kushintuluka nànsha. Byònsò mbilamine myaba yàbì, ne nebìshaalè bilamè too ne ku Dilwa dyà Mukalenge Yesù. Pa eci ndi muswè kwakula ànu ndambù mukesè, bwà nwàpetakù cingènyingenyi cyàcì, nènku nwènù biikàle bàà nyumà nenùcìbàkùle bushùwà.

⁹⁹ Bwalu Baalà ùvwa nzambì-dìbà, èè, tûtô tùvwa twenza atu. . . Kàdi Yelèmiyà mmwàmbe apa, tuvwa bacyakùle katanci kakesè aka, bakàji bàakwoshila Baalà, nzambì-dìbà awu tûtô. Bwalu, nenùjandulè paanyimà ndambù ne, patùyaaya ne nshapità awu, nwènù mwà kumubala, ne bàdi bàmba ne: “Twètù katùyì bakuukwile Baalà to dìbà adi byà pa madimi byètù kabyàkwika to, bwalu Baalà ùvwa nzambì wa bufukè.”

Mu ngaakwilù mukwàbò ne: “Tudi bamanyè ne díbà ke dìtù dikolesha byà pa madimi.”

¹⁰⁰ Kàdi mupròfeta kubàmbilayè ne: “Mbwalu nudi balekèle Nzambi, ki bwà cinyi byà pa madimi byènu kî mbikolè to.”

¹⁰¹ Kàdi bwòbò bàkakuukwila Baalà, bàmba ne mbafwànyine “Kukuukwila, ne kumupèèsha milàmbù.”

¹⁰² Mpindyewu, Baalà yéyè mwikale nzambi wa cijèngù... (Mpindyewu, tààngilàayi eci, ku mwàkù ne ku mwàkù, nènku nenùpetè bìdi bishààlè, ndekeelu wa Mukenji ewu.) . . .nzambi ùvwa nzambi wa cijèngù, nzambi-dìbà, bàvwa ne malongu manène maalàbàlè à byamu byà kabanda àvwa mwà kuleeja díbà ne mafwànangane ne kapyà. Ne pashìishe dyàmpà dyàkamba Yelèmiyà edi divwà . . .bakàji mwà kwenzela Baalà tûtò etu, mu mùshindù wà ne twàkenjiibwa twà cijèngù bu díbà. Èè, díbà adi, divwà ditèekiibwa pa cyoshelu, cyoshelu cyà cimpàngaanù, bwà mèèsà à Mukalenge, ne dyenza dyà cijèngù bu díbà anyi bu ngondo, bwalu cìvwa nzambi-dìbà anyi nzambi-ngondo.

¹⁰³ Kùdi . . .Baalà ùvwa, mutwàmbi ne: “Ùdi nzambi wa bufukè bwònsò, ùdi ùkolesha bintu byònsò.”

¹⁰⁴ Mpindyewu, èkèleeziyà wa ku cibangidilu wàkalwa kukungamangana ne eci pààkabwelaye mu Loomò. Nènku èkèleeziyà wa cyena Loomò ùtu wàmba ne witabuuja, anyi èkèleeziyà wa leelù ewu, anyi èkèleeziyà wa Kàtòlikè wa cyena Loomò, udibò bàbiikila ne “Kàtòlikè . . .”

¹⁰⁵ Twètù bònsò tudi beena *kàtòlikè*. Tudi Èkèleeziyà wa kàtòlikè, tudi èkèleeziyà wa bàpostòlò. *Kàtòlikè* mbwena kwamba ne “wa buloba bujimà.” Ne twètù tudi Èkèleeziyà wa buloba bujimà wa Diitabuuja dyà bàpostòlò. Eyowà's, mukalenge. Kùdi dishiilangana pankaci pàà èkèleeziyà yibìdi eyi; umwe wa kùdiyi ùvwa wa kàtòlikè, wa buloba bujimà, wa *bàpostòlò*; mukwàbò ùvwa wa Kàtòlikè kàà cyena *Loomò*.

¹⁰⁶ Nènku byàkambiibwa ne Peetèlò . . .anyi bàvwa baciitàbùje, ne Peetèlò ki wàkaasa èkèleeziyà wa cyena Loomò. Ndi muswè Mufundu, ndi muswè kupeta mwaba ùdi mwà kwamba ne Peetèlò ùkaatukù mutwè makàsà mu Loomò ní mmu mùshindù kaayi wònsò. Bu mùdi èkèleeziyà wa cyena Loomò wàmba ne: “Yéyè ùvwamù kubangila ku cidimu cyà 41 to ne ku cyà 46.”

¹⁰⁷ Nènku, mu cikondo mene cìmwècìmwè aci, Claude ke uvwa mfùmù mukòdkeshi mu Loomò, yéyè ke wakenza ne beena Yudà bwònsò bùùmukè. Balàayi Byenzedi, nshapità wa 18, nènku nenùjandule ne Pòlò, pààkayàye ku Efèsò, wàkasangana Akùlà ne Piisikilà, bàvwa bulelèlè beena Yudà, ne bàvwa biipàciibwe mu cikondo cyà dikèngeshiibwa, ne bàvwa kaaba aka mu Palestine cyàkàbìdi bwalu Claude ùvwa mutùme dìyi bwà beena Yudà kushiyabo kaaba, nì beena Kilistò nì ba-orthodoxes. Aquila ne Priscilla bàakasa èkèleeziyà mu Loomò,

kàdi byàkakèngela bwà bwôbò kuumukabù bwà dibàndishiibwa dyà Claude adi, ùkaavwa mwipàte èkèleeziyà yònsò . . . anyi beena Kilistò ne beena Yudà bwônsò mu Loomò.

¹⁰⁸ Mpindyewu: “Peetèlò mwikàle mwèpiskòpò wa èkèleeziyà,” nènku mèmè ndi mwà kunùleeja Mifundu, ànu buludi too ne ku bidimu biipacila ku makumi mwandamutekète byôbì bikesè, bwà ne Peetèlò kacya kàvwakù mupàtùke mu Palestine nànsha. Ànu mu Mifundu’s! Kàdi nwamba nwènù ne “Peetèlò wàkashiipiibwa mu Loomò, ne bàakakòsela Pòlò mutù mu Loomò.” Aci’s ndiyi diswika. Ndi mubale mikàndà yònsò yà bafwile diitaba yìndiku mupetè, kàdi kakwenakù nànsha ùmwè wà ku yôyi ùdi wàmba cintu kampànda bwà Peetèlò anyi Pòlò (anyì umwe) ne mbashiipiibwe mu Loomò to. Pa kutàngila mikàndà milelela yà kumpàla yà bafwile diitaba yitùdi mwà kubala, kakwèna nànsha ùmwè wà ku yôyi ùdi wàmba cintu nànsha cimwè bwà bwalu abu to. Yèyè kàvwamù to! Ndiyi diswika.

¹⁰⁹ Ndi kaaba aka bwà kwela bumpàngaanù patòòke, nànkù netu—netwenze nànkù ku dyambulwisha dyà Mukalenge ne Dìyi Dyèndè, nwamònu’s, kunùleeja ànu mùshindù ùdi èkèleeziyà. Nudi nwela mbilà bwà “Kàtòlikè!” kàdi anjì indilaayi ànu tusunsa tukesè cyanààna.

¹¹⁰ Mpindyewu, mpindyewu, tudi tusangana ne paanyimà pàà Akulà ne Piisikilà (bilondèshile Mufundu) bamane kwipaciibwa mu Loomò, èkèleeziyà mukesè awu wàkashààla bu mwànà wa nshiyà, bwònsò bàvwàmù bàvwà bampàngaanù bakùdimùne mucìma bàkabwela mu èkèleeziyà wa cyena Kilistò cyà cyena Loomò awu, èkèleeziyà wa ku cibangidilu uvwa Akulà ne Piisikilà ne babàka bàbìdi bakwàbò bàsè èkèleeziyà ewu ne bamudiishe awu.

¹¹¹ Pashiishe tudi tujandula ne, mbenze ànu buumusha makàsà anyi, ke bwôbò kudyènzela bààbò bèepiskòpò nkàayabò ne kudyangacila dyàbò dilongesha, ne díbà adi kutèekabo . . . bwà kupetabo dyèsè dyà mfùmù wa bukalenge bwalàbàle, Constantin ne bàakalonda pashiishe abu, bwà kupeta dyèsè, bwalu byàkakèngela bwà kubwejamù bidimba bwà kwimanakana mu cindyàfù cyà cidiidi cyà ditùnga. Bàakabwejamù bidimba byà èkèleeziyà, ne kubàbwejamù ànu (“dipwàngàne”) pa ditonda cyanààna, kabàyi ne cikwàbò civwàbò bamanyè bwà Nzambì kutàmbidila mùdi bàmwè bàà ku bantu batùdi naabù mu Àmèrikè emu bamanyè to; ànu bu dijikula cyanààna, civwà ciikale cintu cinène cyà kwamba bwà kujikula Kilistò, mukwàbò Nzambì mushiilàngàne ne wabò nzambì sungasunga awu. Nènku mwòmbò amu kubwejabo, mu dìyi dikulù dyà èkèleeziyà wabo amu, mishìngà yà cimpàngaanù.

¹¹² Mpindyewu, nsaserdòsè wa cyena Loomò awu, pashiishe kubwejabo ciine eci ku dyangata ne dyenza dyà nkòomunyò.

Cintu cyà kumpàla cyàkajuuka cìvwa ndyenza dyà nkòòmunyò. Pamutù pàà tupese tucibulula twenze bu Mubidi wà Kilistò, bàvwa mwà kumwenza wa *cijèngù* mufwànàngàne ne dîbà anyì mufwànàngàne ne ngondo. Nènku too ne leelù ewu ùcidi ànu cijèngù's! Bushùwà. Cìcidi ànu cyostiyà cyà cijèngù, kàdi kaciyi cìpese cìcibulula cyà Mubidi Wèndè nànsha. Ncyà cijèngù ne cìfinùnùke. Nsaserdòsè yà cyena Loomò leelù ewu yìdi yitèèka cyostiyà cyà cijèngù aci pa cyàltar kàdi kucibiikila ne “Mubidi mwena diinà wà Kilistò.”

113 Mpindyewu, kùdi dikòkangana dinène pankaci pàà bàmwè bàà ku ba-Èpiscopaliens bàà milongo yà kuulu aba, ne bakwàbò. Ne èkèleeziyà wa Kàtòlikè ùdi pa cyena-bwalu aci, anyì cidi Mubidi *mwena diinà* anyì cidi *cìleeja* Mubidi. Kàtòlikè kàà cyena Loomò kàdi kàmba ne “cidi Mubidi mwena diinà,” bwalu aci cìvwa mubidi mwena diinà wà Baalà (nzambi-dîbà awu) uvwa udìleejila pa cìpese cyà cyamu cyà kabanda aci ke kucyènzabo cyà cijèngù. Mèèsà nànsha àmwè à beena Kilistò kâtukù ne dyàmpà dyà cijèngù to!

114 Pashiishe bàvwa baswè kutàngila ku esètè, ne bikwàbò, mwàkenzàbo mu dikuukwila dyà cimpàngaanù amu; ne kubwejamù bakàji, ne bikwàbò, ànu mutùbò bènza misangu yònsò amu, mùtù bampàngaanù bènza nzambi mukàji amu, ne bikwàbò. Mpindyewu mbuumushe ànu Astarte kàdi kupingajapù Màriyà, kumuvwija mukalenge mukàji wa dyulu. Mbuumushe Jupiter kàdi kwaluja Peetèlò. Nènku byàkakèngela bwà kupetabo dîyi diswika kampànda, bwà kwenzabo nànkù bàvwa ne cyà . . .

115 Pààkalukila Akùlà ne Piisikilà, paanyimà pàà bidimu dikumi ne bisàtù byà bukòokeshi bwà Claude, dîbà adi pààkapinganabo bàakasangana èkèleeziyà wabò awu mutùkine yònsò mu dikuukwila dyà mpìngù, kàdi mudyunde muye ne penyì, mulwe cintu cinène.

116 Bwà kubwejamù eci, bàdi ne cyà kuumusha Bible kakùyi mpatà nànsha. Mpindyewu, mèmè ndi mwena Irelande, ndi ne cìdibo bàbiikila ne *Byenzedi Byà Diitabuuja Dyètù* bitù ànu bwà nsaserdòsè abi, ne bikwàbò. Kàdi ndi mumanyè eci ne, ne miyiiki yà pabwàyi ne bansaserdòsè, nsaserdòsè kènà mwà kukòkangana neebè pa Bible nànsha, Bible's ùdi ànu ùmwè wà ku mikàndà bwèndè yèyè. Pààkambà Mwèpiskòpò Sheen ewu kaaba aka, kùkaadi bidimu bitwè ku bibidi ne: “Muntu kanà yònsò wàkateeta kwitabuuja Bible awu, ùvwa bu ùdi munkaci mwà kwendela mu màyi à bitoci.” Bwòbò kabàtu baMwitabuuja to! Kubangabò mwaba awu e kwambabò ne: “Nzambi ùdi mu èkèleeziyà Wèndè, kí mmu Dîyi Dyèndè to.”

117 Nsaserdòsè wa lwà kuulu kwà njila ewu, wakalwa bwà muyiiki wà bàbidi ànu matùkù àdi panshì aa, lwà kuulu eku ku Mwoyi Munsantu, wàkangambila . . . anyì èkèleeziyà wa kuulu

kwà njila eku, ngǎpù ne mwoyi ne cìwya cinyi's. Ngèèla meeji ne bàdi bàcìbiikila ne Mwoyi Munsantu. Wàkalwa kúndi bwà bwalu bwà dibàtiiza, Mary Elizabeth Frazier uvwa mutwè cìmpìngà mwalukile bwà kashààla mwena Kàtòlikè. Yèyè ne: "Uvwa mumubàtiize anyi?"

Mémè kwamba ne: "Èyowà."

Yèyè kwamba ne: "Uvwa mumubàtiize bishi?"

Mémè ne: "Mu dibàtiiza dyà bwena Kilstò."

Yèyè ne: "Udi uswa kwamba ne ndyà mùshindù kaayi's?"

Mémè kwamba ne: "Kùdi dibàtiiza ànu òmùwèpelè dyà bwena Kilstò."

Yèyè ne: "Udi uswa kwamba ne nku diinyijangana dyà mu màyi anyi?"

Mémè kwamba ne: "Èyowà's, mukalenge."

118 Yèyè ne: "Wèwè kumwinyija mu màyi dîbà adi mu dîna dyà 'Taatù, Mwàna, ne Nyumà Mwîmpè's?"

119 Mémè kwamba ne: "Aci kí ndibàtiiza dyà bwena Kilstò nànsha." Mémè kwamba ne: "Dibàtiiza dyà bwena Kilstò nkwinijija mu màyi mu Dîna dyà Mukalenge Yesù Kilstò."

120 Yèyè kucifùnda. Kwambayè ne: "Udi mwà kudìcipa ne mucipu ewu, kàbidì, anyi kwakula nàнку kùdi mwèpiskòpò anyi?"

121 Mémè ne: "Yèyè kàyi mwà kwitabuuja dîyi dyànyì to, nàнку àbùlekèlè's." Mémè ne: "Ncyèna ndìcipa ku cintu nànsha cìmwè to." Nwamònu anyi? Ki yèyè ne. . . Kí mémè ne: "Kabiyi bwà kwikala ne dyambu to, mukalenge, kàdi ndi mumanyè ne Bible mmwambè ne: 'Kùcipi ní nkùdi maulu anyi kùdi buloba to, bwalu bwòbù nciètèekedi cyà makàsà Èndè,' ne bikwàbò. Katwèna ne cyà kwenza nàнку to."

122 Yèyè ne: "Bwalu bwà dikèrà, èkèleeziyà wa Kàtòlikè's ùvwa ne ciibidilu cyà kubàtiiza mùshindù awu."

Mémè ne: "Dîbà kaayi? Dîbà kaayi?" Nwamònu anyi? Kàdi bàdi bwòbò bàmba ne bàakacyènza.

123 Bwalu, bwà kwamba menemene, bàvwa, ne tuvwa bwònsò umwe ku cibangidilu, ne cìdi. . . ntwàdijilu—ntwàdijilu mmufùmine ku Mpenta. Ki cibangidilu cyà èkèleeziyà wa kumpàla mwabà kanà wònsò, muntu kanà yònsò ùdi mwà kwakula bwà bwalu abu. Èkèleeziyà wa beena Kilstò wàkabanga ku Mpenta, ne dilabula dyà mpenta, beena mpenta, dibàtiiza dyà mpenta. Byònsò mbifùmine ku èkèleeziyà wa ku muji ku Mpenta.

124 Mpindyewu, mònaayi. Mpindyewu, tudi tusangana dîbà adi ne byàkakèngela bwà kulalukabò kule ne dilongesha dyà Bible bwà kumònabo mwà kupeta bintu ebi bwà kusànkisha bamfùmù

bàà makelenga maalàbàle abu ne bikwàbò, bwà kubwejamu cimpàngaanù.

125 Mpindyewu, tàngilàayi. Peetèlò ùvwa mwena Yudà. Ncyà bushùwà anyi? Nudiku mwà kudifwànyikijila Peetèlò Munsantu wítaba meeji à kutèeka mpìngù mu èkèleeziyà, mwena Yudà uvwa mene mukandika bwà kukènzakana kutàngila lupìngù awu anyi? Nudiku mwà kudifwànyikijila yéyè wènza cintu bu nàнку awu anyi? Kì m'Peetèlò nànsa! Nudiku mwà kudifwànyikijila yéyè wàmba ne: “Mifùndu yànyi yònsò yà kale mu cibangidilu ayi yìvwa yònsò yà mafi, nènnyimanshe mpindyewu. Nènshàale ne mwoyi bu nyumà kampànda mu èkèleeziyà wa Kàtòlikè ewu, nènku nèngùikale mwà kwangata anyi...?”

126 Èè, mmufwànyine kwikala muntu mushintùlùke. Ki bwà cinyi, bwà kwenza nàнку, bìvwa bìkèngela bàbangè díyi diswika dyà ne “Peetèlò wàkajiiikiibwa mu èkèleeziyà ne wàkabàshìila Mèyi matùma wònsò, ne bwòbò ki bàvwà èkèleeziyà wa Kàtòlikè wa ku muji.” Kì mmwòmò to! Kakwèna Mufùndu nànsa ùmwè, kakwèna bwalu-bulonda nànsa bùmwe anyi cintu nànsa cimwè cidì cìcijaadika to; cintu nànsa cìmwè. Kabìvwa nàнку to.

127 Kàdi nsaserdòse mumpàngaanù wa èkèleeziyà wa kumpàla wa cyena Loomò awu ùdi ànu menemene mufwàràngàne ne umweumwe wa leelù ewu. Bàdi bìitabuujà ne dyàmpà adi mmubidi wa Kilistò, ne mu mùshindù kampànda Kilistò ùtu ùpweka ùbwela mu kapese kàà dyàmpà kàdi katèeka pa cyaltar apu (kàdi nkweze mufwànyine kupulumuna kuya naakù butùkù akù's). Nwamònu anyi? Itàbùùjà. . . Nènku ki bwà cinyi mwena Kàtòlikè ùdi wítabuujà ne udi ne cyà kuya mu èkèleeziyà bwà kukuukwila, bwalu “Nzambi ùdi mu èkèleeziyà awu.” Kì bwà cinyi bàtu bìinamija mitù ne bàdifùnda nkùrusè, pàdibo mu nyungulukilu wa èkèleeziyà, bwalu “Kapese kàà dyàmpà aku n'Nzambi.” Kì ncìngà cintu to ng'ànu cifwànyikijilu cyà nzambì-dìbà wa Baalà awu, kakwènakù Mufùndu nànsa wà kànà bwà bwalu abu to! Èyowa, cyostiyà cyà cijèngù cidì citèeka pa cyaltar apu aci.

128 Mpindyewu, ki bwà cinyi, kabàvwa bìitaba dilongesha dyà beena Kilistò dìvwà. . . Irénée, Polycarpe, ne bânà bèètù bàà ku cibangidilu abu, Pòlò. Tudi tujandula ne, muyiidi mukùlumpè ku bwònsò ùvwa. . . wakashàala ne mwoyi ntàntà mule bikolè, ùvwa n'Yone. Bààkamwipata mu bidimu bisàtù, kumwela mu Paatèmò, bwalu ùvwa ne ndongèshilù kampànda. Ùvwa ùsambuluja anyi ùjaadika Díyi dyà Nzambì, ùDitèeka kaaba kàmwe, ùtèeka Mikànda mifundilangana ayi kaaba kàmwe. Bààkamusanga wènza nàнку ne bamanyi bèndè bàà mabàla, ke kumwipatabù munda mwà bidimu bisàtù (paanyimà pàà lufù lwà mukalenge wa bumfùmù bwalàbàle awu bààkamwaluja), ke kushiishaye kufùnda Mukànda wà Bwàkabuulwibwà.

129 Ne kwakula bwà “Nzambì mu èkèleeziyà Wendè anyi Nzambì mu Dìyì Dyèndè?” Bible mmwâmbè ne Dìyì n’Nzambì.

Ku cibangidilu kwàkadi Dìyì, ne Dìyì dyàkadi ne Nzambì, ne Dìyì dyàkadi Nzambì.

Ne Dìyì dyàkavwijiibwa mubidi, ne dyàkasòmbela munkaci mwètù, . . .

130 Kàbìdì, dilongesha kanà dyònsò dyà èkèleeziyà kanà yònsò, diikalè dyà ba-Baptistes, ba-Presbytériens, ba-Méthodistes, beena Mpenta, anyi cyònsò cidìdì mwà kwikala aci, didì kadiyì dipetangana ne Bible ewu ku dileeta ne ku dileeta, ndyà mafi! Bwalu Yone wàkamba mu cisanga cyà Paatèmò, Nyumà Mwímpè, anyi Kilistò wàkulangana nendè, wàkamba eci: “Muntu ní nganyi yèyè muumùshe cintu kampànda ku Eci anyi musàkidileKù cintu kampànda . . .” Nànkù awu mmunyì muwikala mwà kusàkidila bimanyishilu byà dikuukwila dyà mpìngù dyà cimpàngaanù ebi, wenza nzambì yisàtù pamutu pa Umwe, ne bintu bikwàbò byònsò byà cimpàngaanù ebi bitu èkèleeziyà wa ku cibangidilu kàyìku mulongeshe abi ne bivwaye ùlwisha abi?

131 Nsangilu wa ku Nicée, ní Ûvwa bintu bisàtù anyi cintu cimwèpelè, dikòkangana dinène, bafwile diitaba abo kajuuka kuntwaku, bàmwè bàà kùdìbo ne—ne . . . Mulùmyànà kampànda, mwè—mwèpiskòpò awu, bayiishi bàà cyena mpenta, bwà kutentekela kwà babèèdì byanza, kumuswikabo mulonda wà kapyà ku mabòko lwànyimà ne kumupulumunabo cyànyimà mùshindù ewu. Bakwàbò, biimane, ki bàngata mwelè wa mwità bàbàtonkona mèsù, bafwànàngàne ne musumbà wà bafwile diitaba bàakangata luseke lwà Dìyì edi’s! Àlèluuyàh’s wè! Bààkasambakaja mashi àbo pàmwè ne bapròfetà bàà kale. Dìyì edi, mwanèètù, N’Dìyì dyà Nzambì.

132 Pààkakùdimunà bampàngaanù aba mucìma, bààkabweja bimanyishilu abi mu bwena Kilistò. Kabèèna kàbìdì mwà kukwàta mudimu ne Bible to, bwalu Bible ùdì wèla eci patòòke. Nènkù nebàkwambile leelù ewu ne kabèèna ne . . . kabèèna bàMwitabuujà to. Bàdì bàmba ne: “Ùdì ànu mwímpè, kàdì èkèleeziyà’s n’Dìyì dyà kumutù kwà byònsò.”

133 Èè, tudi tusangana cintu cimwècimwè aci mu Mpenta. Lekèlaayi kusingila “Kàtòlikè,” patùdì pèètù bapìile ànu byà mwomùmwe, ba-Méthodistes, ba-Baptistes, ne yònsò wa kùdìbo.

134 Nwènù ba-Méthodistes, bansantu bàà menemene abu, mbwà cinyi bunwàkashipeela Joseph Smith dìbà adi? Eci’s ng’Àmèrikè ne bukenji bwà kukuukwila. Ncyèna ngiitabuujà cyàkamba Joseph Smith to, kàdì kanùvwa ne bukenji bwà kumushipa to, mmwômò, ba-Mormon.

135 Nwènù ba-Baptistes, mbùngi kaayi bunùdì babwikìdije? Ne nwènù bakwàbò abu?

¹³⁶ Ne Mpenta, mupiile ànu bu bakwàbò abu, bashààle beena madileeki ne musumbà wà beena lubombo. Nènku pamutù pàà didìpwekesha ne bukolè bwà Nyumà, nudi ne Dìyì kanùyì ne Nyumà nànsha. Nènku nudi nutàmba kwenza bibi bitàmbe bu nwènù mwà kwikala bu bakwàbò abu's. Baalùkile buludi mu mishingà yàbò yà cimpàngaanù ayi ne mmwènenù yà mishindù yònsò yà búsàtù, ne bintàkanyì bikwàbò byònsò ebi, kanwèna mwà kubijaadikila ku Dìyì nànsha. Dìyì kadyèna dipetangana naabi to. Mbyà luse be, byà luse be!

¹³⁷ Pa nàнку pààkenzàbo èkèleeziyà wa kumpàla wa Loomò, bwena Kilistò abu, byàkakèngela bwà kushiyabò Bible ku luseka; bwà kwimanyika mishingà eyi, bwà kuyènzà, byàkakèngela kwikalabò ne nshindameenu kampànda, ki kwambabò ne: "Peetèlò nguvwa pààpa wa kumpàla wa Loomò. Ne yéyè ùcìdi ànu mùshindù awu," mùdìbo bàmba. Èè, twánjì ànu kwamba ne ke cìvwàye, Peetèlò mmufwànyine kudyatakaja Mèyì à ku Mpenta anyi? Nudikù mwà kudifwànyikijila mwena Yudà wetù ewu wàshisha mpìngù anyi?

¹³⁸ Nènku mpàndì mwà kunùjaadikila ku Dìyì difùnda mu Bible, ànu menemene matùkù ne bidimu, bìvwà Peetèlò kacya kàyìku muumuke mu Palestine to ànu musangu ùmwèpelè (pàakayayè ku Baabùlònà ùpìcila ku Euphrates), kacya kàtukù mudyàtè mu Loomò nànsha, ku Mifùndu, EMU MMÙDÌ MUKALENGE WÀMBA! Cyònsò aci mmwènenù wa cimpàngaanù.

Mpindyewu netùpatulè aci buludi mu cyena Mishòònyì.

¹³⁹ Tàngilàayi Mpenta, kàyì wàngata Dìyì to. Shààlaayi ne Dìyì adi nènku nènwikale babinge misangu yònsò; nwènù balekèle Dìyì adi, kanwèna ne kunwàya to.

¹⁴⁰ Mwab'ewu musangu kampànda ku masangisha manène menza ne cilongelu cinène cyà beena Mpenta, mukàjì kujuukilayè kuulu, wàkula mu myakulu, ne kwimanyika dibìikila dyà ku cyoshelu. Nènku dilòòlò adi pangàakaalukilà, Billy kutwilanganayè naanyì pambèlu pàpa, kwambayè ne: "Udi mumanyè mùdi bwalu anyi? Mukàjì awu mmwambà ne ùvwa ne mukenji mukwàbò ùvwaye ne cyà kufila dilòòlò adi."

¹⁴¹ Nènku mèmè kutàngila mukàjì awu (ne nsuki mibèbula, mulwate nkanzu mumwònyè byenze bu ne bàvwa bamupòngòlwèlemù, musòmbe mwaba awu munkaci mwà kudilongolola nsukì, ùbàndisha nsèsheete yèndè ayi), mèmè kumanya ne ùkaavwa pa kujuuka. Ke kujuukaye, nènku mèmè kwamba ne: "Sòmba panshi." Yéyè kutungunukayè. Mèmè ne: "Udi mungumvwè anyi? Sòmba panshi!" Kaa, ekèlekèle.

¹⁴² Ndi mwenze ànu mpàtuka dilòòlò adi, kutwilanganabò naanyì kùdì balùmyànà bànaayi anyì bàtaanu pambèlù apu ne mukàjì awu, bwòbò ne: "Udi mubungàmije Nyumà."

143 Mémè ne: “Dìná nyumà kanà yònsò ùndi mubungàmìje ne Dìyì dyà Nzambì ùdi ne cyà kwikala mubungàmìjìibwe.” Mémè ne: “Bible kènà wàmba ne nyumà wa baprófeta ùdi ùkòòkela muprófeta anyi? Pìikalàbi ne mukàjì ewu ùdi ùfila bujaadiki, cìdì cìikalangàne ciprófeta aci—aci. . . Dyakula dyà mu myakulu nciprófeta byòbì ne mbadyandàmune.” Mémè ne: “Dìbà adi indìle too ne pàndi njikija, pashìishe ùdi mwà kwakula.”

Yèyè ne: “Kàdi wèwè udi ulongesha Dìyì.”

Mémè ne: “Ki cìndì mwimanyìnekù ncyòci aci.”

144 Yèyè ne: “Yèyè ùvwa ne cintu kampàndà cyà cyashima ne cipyacipyà cìfùmina mu Dyulu, cintu kampànda cishìilàngàne ne Aci.” Pìikalà aci ní kí ndyalukila ku cyena Kàtòlikè kàà cyena Loomò to kàdi ncinyi’s wè!

145 Dìyì dyà muntu yònsò diikalè mashimi ne nyumà yònsò ikalè mashimi, kàdi Dìyì dyà Nzambì diikalè Bulelèlà. Dìyì dyà Nzambì didi kumpàla!

146 Lutàtù lùdiku leelù ewu ndwà ne, bàdi ne mabuulula mapite búngì ne bintu byà mafi. Bàdi bàpòna mikookwela kuntwaku kàdi bàkàngwila démons mwoyi wàbò, pamutù pàà kushààla ne Dìyì dyà Nzambì. S’ki mwaba ùdi lutàtù lùsanganyìibwa awu, ki bwalu mbwòbò abu’s. Bantu, bàà kweyemena, bàà meeji matòòke, bantu bímpè, kàdi kwèna ne ciwàbàmbila to. “Èè, tudi twitabuuja *cikampànda*, bu beena Mpenta.” “Tudi twitabuuja *cikampànda*, bu ba-Baptistes.”

147 Ndi ngiitabuuja Eci bwalu N’Dìyì dyà Nzambì! Ndi ngèèla muntu kanà yònsò kadyòmbò bwà kundongolola mu Cyòci aci. Nwamònu anyi? Ncyà bushùwà. Eci n’Dìyì! Shààla ne Eci, Eci ncilelèlà!

148 Pa nàнку kwenzabo èkèleeziyà wa kumpàla, èkèleeziyà wa kumpàla wa Kàtòlikè kàà cyena Loomò. Nènku pamutù pàà kubìikila ne. . . yèyè ne *mwèpiskòpò*, mwàkadìbo bàmbubìikila misangu yònsò, mpindyewu bàdi bàmbubìikila ne “Taàtù.” Bàcidi ànu benza nàнку. Nènku bàdi bàmba kaaba aka ne: “Nudi ne cyà kucìitaba, ne cyostiyà eci *ke* Mubidi wà Kilistò. Nènku, byòbì mene, nsaserdòsè ùdi nzambì, bwalu Nzambì mmwenzèjìibwe bwà kutèeleja dìyì dyà nsaserdòsè didi dikùdimuna cyostiyà eci cìlwa Mubidi mwena dìinà wà Kilistò.” Ne pashìishe bantu bàà meeji matwè bàlekela bàbàfìmfìnyika aci mu mabòdi! Kaa, èkèlekèle! Kaa, mmunyi. . .

149 Kàdi bakuukwidi balelèlà, bèèpiskòpò balelèlà, bààkashààla ne Dìyì. Kushààlabò ànu mwaba awu mu Nsangilu wa Nicée awu, kukwàtabo Dìyì adi ànu mwaba awu mene. Èyowà’s, mukalenge. Bààkabwela bu bafwile diitaba, bintu bikwàbò byònsò, kàdi bààkashààla ne Dìyì adi. Kabàvwa baswè dikuukwila dyà mpìngu nànsha dikesè to.

150 Nènku ndi muswè bwà muntu kampànda àndeejeku mwaba ùvwa Patrick Munsantu mwikalekù mwena Kàtòlikè kàà cyena Loomò. Cintu bu nàнку kacitukù to! Wàkatontolola èkèleeziyà wa cyena Loomò awu. Ùvwa mwànà wa balùme wa tùtwèndè wa Martin Munsantu. Mvwa munkaci mwà kubala kaaba aka, mu... mukàji kampànda nguvwa mufunde... Hazeltine, Mandamu Hazeltine, *Bitùpà Byangata Ku Nsangilu Wa Nicée*, wàmba ne wàkaya ku mbòdi ku Oxford bwà kupeta m—mbòdi bwà, kwangatamù: *Nsòmbelu Wa Martin Munsantu*, nènku mukwètù ewu kwamba ne: “Kàdi kabàvwa bamuvwije munsantu kùdi èkèleeziyà wa Kàtòlikè to.” Nànsha kakesè, yèyè wàkatontolola cintu aci’s! Nènku ke cyàkenza Patrick Munsantu. Muntu wàkashààla ne Dìyi dyà Nzambi kwibaka bilongelu byàbò sungasunga, kuumukabò ku bintu byà mùshindù awu.

151 Mpindyewu, tudi tusangana ne, ki mùdibi kàbìdi leelù ewu. Èkèleeziyà wa cyena Loomò ùdi ùtùngunuka ànu ne bisùkwità bimwèbimwè byà cijèngù abi, bèèla meeji ne Kilistò ùdi ùpweka ne ùbwelamù. Nènku, tèèlejàayi, nudi bamanyè ne nsaserdòse ùtu ùnwa mvinyò anyi? (Pàdìbi ne, bidi bikèngela kubyàngatabò kùdi muntu ne mukwèndè ne: “Wàkasambulwija dikopo kùdi muntu ne mukwèndè.”) Kàdi, mu mmwènekèlu wa cimpàngaanù, ki mùtù bansaserdòse bànwa mvinyò. Nwamònu anyi? Nucidi ànu... Byònsò abi mbumpàngaanù’s! Ànu menemene. Kabyèna bibàmbila bwalu to.

152 Bàdi bànwàmbila ne: “Ncyàkuyiikilangana neebà pa Bible nànsha.” Mwambi, anyi nsaserdòse awu, kungambilaye kuntwaku, wàmba ne: “Mukalenge Branham, udi uteeta kwakula bwà Bible kampànda, mèmè ndi ngààkula bwà èkèleeziyà.”

Mèmè ne: “Nzambi n’Dìyi!” Bushùwà. Mpindyewu, èyo.

153 Tudi tusangana mu cyòci eci, too ne ku ditùkù edi ne, ki bwà cinyi èkèleeziyà wa Kàtòlikè wa cyena Loomò ùdi ne cyà kuya mu èkèleeziyà bwà kukuukwila. Mbalongèshùibwe ne “Nzambi ùdi mu cyostiya cyà cijèngù eci, Mwenyi mu tabernacle.” Nwamònu anyi? Kanwènakù mwà kumòna ne aci mbumpàngaanù anyi? Bushùwà, mbwòbù’s.

154 Kanwènaayikù mwà kumòna ne bantu bàdi bìitaba ní ncinyi cyònsò—ní ncinyi cyònsò cidi cibèngangana ne Dìyi edi nkoci ùmwèùmwe awu anyi? Bible ewu, mu Bwàkabuulwibwà 17, kî mubùikile èkèleeziyà wa Kàtòlikè ne “mukàji wa masandi anyi”? Kî Mmubùikile beena Mishòdònyi ne maamù wa . . . ne yèyè ùvwa “mamwèndè wa bandumbà anyi”? Cintu cimwècimwè aci’s! Yèyè wàkapàtwila dilongesha mu lupànza lwèndè lwà bukooya bwà cinyangu cyà masandi èndè, manyaanu ne bukooya, dikwàtakaja

dyà buntu menemene edi, pamutù pàà Dìyì dyà Nzambi udi ne mwoyi didi dilelèlè na kadiyì disambakaja ne cintu to.

“Éyì Nzambi, ikàlàku neetù luse,” ki disambila dyànyì ndyôdi adi.

¹⁵⁵ Irénée wàkamba, mwawa mufunde tuntu kaaba aka twàkambaye, mwambe ne: “Dìyì dyà Nzambi didi bu musumbà mwîmpè wà bilengà binène bîmpè kumòna bivwà bipàtula bwà kwenza lupingù lwà Mfùmù munène, wa bukolè. Kàdi,” yèyè kwamba ne, “twitabàayi, mèyì maswika, màngumba, bidi byàngata bilengà bîmpè kumòna abi ne bibyènza mmwènekèlu wa mbwa, ne biseeswisha bapangi bàà Dìyì adi. Cyôci eci ke citùbo bènza bwà kunyangakaja njila yà Nzambi ne kutwàlaPù bundù.” Àlèluuyàh!

¹⁵⁶ Paùdi uteeta bwà kufikisha Dìyì dyà Nzambi ku dyamba cintu kampànda bwà kukùmbananganaci ne bulongolodi bwènù, udi munkaci mwà kuumusha bilengà abi Pambidi pàà Mfùmù kampànda munène bwà kwenza cimfwànyì cyà mbwa, anyì mukènge, anyì ngulube, anyì cintu kampànda, ku byôbi abi. Nènku udi useeswisha mupangi wa Dìyì.

¹⁵⁷ Àlèluuyàh! Kùdi bàmwè bàdi ne Nyumà wa Nzambi, bàdi bìlmanyina Dìyì divwale mubidi. (Nzambi, vudijaku milongo yètù.) Dìyì adi, kî ncintu nànsha cimwè to ànu Dìyì! Angata Dìyì adi mwaba wàkambamù Yesù ne: “Maulu wònsò ne buloba nebìjimine, kàdi Dìyì Dyànyì kadyàkujìminakù to.”

¹⁵⁸ Mwaba Ùdidi dyàmbè ne: “Nùbàtiize mu Dîna dyà Mukalenge Yesù Kilistò”; bàdi bènza “Taatu, Mwàna, Nyumà Mwîmpè,” nzambi yisatu ku Cyôci aci. Bàdi bàngata mèyì maswikà à mishindù yònsò, ne bàkwàtakaja bintu byà mishindù yònsò, ne dimyaminangana dyà màyì pamutù pàà diinyijangana dyà mu màyì. Bintu byònsò! Benzèlakù bitoci kampànda byà bikwàtakaja kùdi bantu, pamutù pàà kucitèeka mu Cilengà, munda mwà Mfùmù munène, Kilistò.

Kaa, Àlèluuyàh! Aci’s n’Nzambi mwandamukùke mubidi, Kilistò!

¹⁵⁹ Bàdi bànyangakaja njila yà Nzambi. Bàlekela bantu bàbwela mu èkèleeziyà, bakàjì ne nsuki mibèbula, balaabe bilaabu, balwàte nkanzu yà yilendwishangana. Balùme bashààle bilùme-bikàjì byètù byà menemene ebi, bàlekela mukàjì ùbalombola kacya wàbanana ku dici. Bàlwa mu èkèleeziyà, bwà kunaya mubèlè ne manayi à dyàkalenga, ne bintu bikooyikè byà mishindù yònsò. Nènku bayiishi ne bakwàbò baye kudyànyika ku nsenga yà ku mpengà kwà màyì, ne bakàjì butaka balwàte bilàmbà byà kwowa naabi màyì kàdi ki bwòbò abu munkaci mwà kwowela, bànwà mfwankà, kàdi kudìbìkila mùdìbo “basadidi bàà Nzambi”; pàabi ntempèlu ewu nntempèlu wa cijila mulàmbula Nzambi, kàyì mulàmbula bukooya bwà buloba nànsha. S’mbulelèlè. Kàdi bàdi bàngata bilengà byà Nzambi

bwà kubyenza ngulube, anyi mukenge, anyi mbwa, anyi dyôbù, anyi cintu kampanda, kadi kubidiisha badi kabayi balonge, bapangi abu.

¹⁶⁰ Twasakidila, Doc. Mwya ne mukwàbò kaaba aka kadi ncivwa ànu mwele meeji bwà kukwàta nawù mudimu to, mùshwâlâ.

Èyowà, ki cidìbo bènza aci. Irénée ùvwa ànu—ànu mwambilemù.

¹⁶¹ Ncinyi cidi Nzambi wela meeji pa byònsò ebi? Kì mbyôbi ànu bimwè ne cyàkateetabo kwamba ne: “Kaa, kabyèna ne cidìbi biMwenzela” anyi? Bidi bushùwa ne cidìbi biMwenzela! Bidi ne bwalu.

¹⁶² Bwà cinyi Wàkambila Yelèmiyà bintu byàkambàYe dîbà adi abi? Bwà cinyi Wàkabyàmba? Bidi ne bwalu. Nzambi ùdi ne njila.

¹⁶³ Kadi ambabi tũng bu Mòsà mwambe ne: “Nèntuulè cifulu pamutù pàà bisàbaata byànyi”? Kàvwa mwà kwikala mumòne cikèèna-kumòna to. Bikèngela ùlwilè mu njila wa Nzambi. Nzambi ùdi ne njila.

¹⁶⁴ Kùdi bipite búngì bitùdi mwà kwamba. Twangataàyi ànu Mufundu ùmwè kaaba aka. Ndi naayi búngì cyanààna mifunda mwab’ewu. Tùbuululààyaaku mu Nombà 25, bwà katancì kakesè cyanààna. Nombà 25, tudi tumòna ní cidì—cidì ne bwalu kùdi Nzambi, anyi to. Tumònaàyi ní cidì ne bwalu, anyi ntwitabàayi eyi, mèyi maswika (ne bikwàbò) bìdi ne bwalu’s. “Yèyè’s ùdi Nzambi mwímpè, Yèyè ùdi ànu ùlèngulula cintu cyònsò nkòng.” Kàtu wènza nànkù to! Ùtu wèla mushoonyi ne ùzola kaludikilu, nènku udi mwenzèjìbwe bwà kulwilaKù.

Nènku Izàlèèlà wàkashikama mu Shitimà, ne cisàmbà kubanga kwenda masandi nè mishika nkunde yà mu Moàbà.

(Tèèlejàayi!)

Ke kubùkilabo cisàmbà ku mulàmbù wa nzambi yàbò: ki cisàmbà kudyà, ne kupòna mikookwela kumpàla kwà nzambi yabo ayi.

Ke Izàlèèlà kukadisanga ne Baal-peòlà: nènku ciiji cyà MUKALENGE kubindulukilaci Izàlèèlà. (Kabyèna bikèmesha to pàakambàYe ne “Kùsambididikù cisàmbà cyà mùshindù awu to”! Huh?)

Nènku MUKALENGE kwambila Mòsà ne: Angata bamfùmù bàà cisàmbà, ne ubwowè kumpàla kwà MUKALENGE batàngije mpàla ku dîbà, bwà ciiji cicolè cyà MUKALENGE cyùmushùbwe kùdi Izàlèèlà.

Ke Mòsà kwambila balumbulwishi bàà Izàlèèlà ne: Shebèyaayi ewu yònsò wa ku bantu bàdi... bakadisange ne Baalà-peòlà.

165 “Shebèyaayi yònsò wa kùdìbo!” Nzambì ùtu muswe kushàala ànu Nzambì, nènku Yèyè kàyi Nzambì to kààkwitabakù kaaba kiibìdì nànsha. Yèyè kènà ne cyà kulekela Baalà (ne dīyī diswika kampànda dikwatakaja kùdì bantu, ne dilongesha kampànda dyà muntu kampànda, anyi mmwenenu kampànda wa twitabàayi, anyi mmwènenenu kampànda wa—wa dingumba) wìmana mu njila Wendè nànsha, Yèyè ùdì Nzambì ne Ùdì ne bukolè bwà kujuudila Abraham bânà ku mabwe aa. Kènà ne cyà kwangata màngumba ènù nànsha. Kènà ne cyà kwangata bisumbù byènù binène ne bilongelu byènù ne bikwàbò abi nànsha. Ùtu wàngata cidìYe mwà kukwata mu cyanza Cyèndè aci, cidì kaciyi ne mushinga aci, ùcipwidijila mupùuyà wà Mwoyi mu cyòci ne cilwa cintu kampànda cidì mwà kuMusadila. Ki cidì ciMuvwiya Nzambì ncyòci aci. Cyà bushùwà, cidì ne mushinga kùdì Nzambì.

Wèwè udi wamba ne: “Kacyèna ne bwalu to.” Cidì ne bwalu! Cidì ne bwalu, menemene.

166 Paapà Leo Munène awu, wàkakòòkesha kubangila ku cidimu cyà 440 too ne ku cyà 461. Kaa, wàkeela meeji ne ùvwa wènta ànu menemene civwà cyakàne, kubwelaye mu èkèleeziyà... Kumpàla kwèndè kwàkadi Victor, ne yèyè ùvwa pèndè, nkweise. Nènku kubwelayemu, kàdì mùshindù mene wàkashipàye beena Kilistò ne bikwàbò byònsò.

167 Kàdì pashìshe nganyì wakatwàdija cyònsò eci, kucitèèka mu “mikenji” bwà kushipangana? Nudi bamanyè ne ùvwa nganyì anyi? Augustin Munsantu wa ku Hippo, ki yèyè wakacyènta menemene’s.

168 Augustin Munsantu wàkapeta mpungà musangu kampànda, ki mùdì bwalu-bulonda bwàmba, bwà kulwa muntu munène ne kùjijibwa tètè ne Nyumà Mwimpè. Wàkasòmbela paanyimà pàà bula apu, mu Lyons, mu France mwàmwa, ku cilongelu cinène kùvwà Irénée mulongeshe aku, ne bakwàbò ne Martin Munsantu. Wàkasòmba mu bula bwà tulaasà amu ne Nyumà Mwimpè kulwa kùdiye, kàdì wàkapidya bwà kuMwitaba.

169 Pashìshe cyàkalwàye ncinyi? Misangu yibìdì mutàmbe mwànà wa mu ifèrnò kutàmbidila mwàkadiye kumpàla, wàkapweka dyàkàmwè ku Hippo, mu Àfrikè, mwòmò amu kwasayè cilongelu cyèndè. Nènku civwa . . .

“Ndeejàayi!”

170 Ndi mwà kunùfikisha ku bwalu-bulonda abu. Yèyè ke wàkajaadika ne dīyī dyèndè, ne “Bìvwa bìmpè bwà kushipa dīnà mwabuludyanganyi yònsò uvwa mufwànyīne kubengangana ne mèyi maswikà à èkèleeziyà wa Loomò,” Augustin Munsantu wa ku Hippo awu. Kùdikù mumanyi wa dibàla wa Bible kaaba aka, anyi muntu kampànda udi mubalèku maalu-malonda, udi mumanyè ne aci ncilelèlè anyi, èlè cyanza muulu? Èyowà, nwamònu’s? Bàdikù bushùwà. Augustin Munsantu wa ku Hippo,

yêyè ke wakatùùla díyì dyà ndekeelu ne “Bìvwa bîmpè bwà kushipa baabuludyanganyi bàvwà bàbèngangana ne èkèleeziyà wa Loomò.” Kujaadika diyiisha dyà cimpàngaanù adi, dyà kuya kule ne Bible adi, ne kutèeka dikuukwila dyà nzambì-mwànà. S’nudi bamanye cidì cyènza ne bwena Kilistò bwikale. . .

¹⁷¹ Nudi bamanyè kùdì Noël mufùmìne anyì? Kilistò wàkalediibwa mu ngondo wa cisanga, kàdi cyàkenzàbo bwòbò ncinyì? Ndongolwelu wa díbà ùdì munkaci mwà kutekesha lwendu mpindyewu bu mùdìdì dyènda diya kule, ditùkù dyònsò dyènda dileepa ndambù, anyì diìpidika ndambù, ne diìpidika ndambù, nènku kubangila ku dyà matùkù makumi àbìdì too ne ku dyà matùkù makumi àbìdì ne diitaanu ke cikondo cyà mufikilu wà dilediibwa dyà nzambì-dìbà. Bidi ànu matùkù matwè ku àtaanu mwaba awu, ke cikondo civwàbo bènza manàyi à dicyonkomojangana naawu à cyena Loomò mu ciine cikondo aci, cyanga cyà mufikilu wà dilediibwa dyà nzambì-dìbà mu cikondo aci. Nènku mpindyewu nudi numòna cinùdì naaci mpindyewu anyì? “Bàākamba bwà kucyènza ‘nzambì-dìbà,’ tucyenzàayi ‘Mwànà wa Nzambì.’” Nènku cintu cyònsò mu kaabujimà ncimpàngaanù ànu kwìnè kwònsò aku! Ne bantu mu misèèsù balwàte bilaatu byàbò byà tulundu abi, eku bènda bàdinyònda bàcibuluka mu misèèsù, kàdi banyeemena mu makàjiinyi.

¹⁷² Nènku kaaba aka ditùkù adi mukàjàànyì ùvwa ùndondela ne: “Muntu kampànda wàkamba ne: ‘Ncyèna mumanyè cyà mèmè kupetela Papa to.’ Yèyè ne: ‘Mwanèètù wa balùme neàmupetèlè cisàngala cyà wiskí, ke mukwàbò kwamba ne ùvwa ne cyà kumupetela ndambù wa maalà à champagne.’ Ne mungà ne: ‘Èè, mèmè nèmupetèlè dibùki dyà—dyà karta.’” Cyanga cyà Noël, dikuukwila dyà cimpàngaanù, dyà dyabùlù’s! Èyo.

¹⁷³ Kàdi Augustin wàkacijaadika. Wèwè muswe kwosha dísu ku cyòci eci mu Schmucker, mifùndù yà Schmucker, S-c-h-m-u-c-k-e-r-s, mukàndà wà *Dilongolola Dyà Butumbi* wà Schmucker, cidìye mwambemù ncyòci eci, ne: “Kubangila ànu ku cikondo civwà Augustin Munsantu wa ku Hippo mwitabile èkèleeziyà wa Kàtòlikè díyì edi, aci kàdi’s kubàkangwila biibi bwàshì bwà kushipa cyònsò civwàbo baswè díbà adi, civwà cibènga èkèleeziyà wa cimpàngaanù awu. Nènku kubangila ànu ku cikondo cyà Augustin Munsantu aci, bidimu bitwè ku nkàmà yisàtù paanyimà pàà Kilistò, too ne ku cidimu cyà 1850, pààkenzeka dishebeya dinène dyà bantu dyà mu Irelande, kùvwa beena Mishòònyì mìliyò makumi mwandamukùlù ne yisambòmbò bàākashipabo kùdì èkèleeziyà wa Kàtòlikè. Aci’s mmu milubu yà dishebeya dyà beena diitaba dyà Loomò, ‘Mìliyò makumi mwandamukùlù ne yisambòmbò.’” Mpindyewu ndaayi nukakòkàngàne ne mufùndì wa bwalu-bulonda, yèyè’s ke udi mwambe nànu awu. Mèmè’s ndi ngambulula anu díyì dyèndè patupù. “Muntu yònsò udi ubengangana ne díyì diswikà dyà

Kàtòlikè!”

¹⁷⁴ Kí n’ *kàtòlikè* to, mwákù kàtòlikè, kabèèna—kabèèna bakùmbànyine dìnà adi to. Bwòbò bampàngaanù bàà cyena Loomò.

¹⁷⁵ Ki mbantu bàà mushinga mukolè abu to. Kùdi makumi à binunu byà bantu abu kuntwaku, ànu ne meeji matòòke mùdìbo amu. . . ànu mùdì mukuukwidi wa mpìngù kanà yònsò amu. Bàdi bèèla meeji ne bàdi bàkuukwila Nzambì, pààbì (patùdì twalukila ku Dìyì) bàdi munda mwà lupìngu kampànda ne mpìngu mibànyùngulukile. Nwamònu’s!

¹⁷⁶ Èyo, cìvwa ndìy-. . . dìyì diswika, mèyì maswika à cyena Loomò. Kàdi, tèèlejàayi, ndi njinga kwamba cintu kampànda kaaba aka. Nkààvwa mucipìtè’s.

¹⁷⁷ Mu cidimu cyà 1640, mu cidimu cyà 1640, pààkenzekà dishipangana dyà mu Irelande, ku bukòòkeshi bwà ba-jésuites ne nsaserdòsè yà cyena Loomò, beena kwitabuuja binunu lukàmà bàà Patrick Munsantu bààkashipiibwa. Bu Patrick Munsantu mwikàle mwena Kàtòlikè kàà cyena Loomò, dìbà adi mbwà ciny bààkashipa bantu bààbò sungasunga? Abu bàvwa beena mudimu bàà mu cyàpù, ne bikwàbò byònsò. Ncyà bushùwà. “Binunu lukàmà,” mu dishebeya dyà beena diitaba, “bààkashipabò bwalu kabàvwa bàpetangana ne dilongesha dyàbò nànsha.”

¹⁷⁸ Nkaatuku mufike mu yimwè yà ku èkèleeziyà ya Patrick Munsantu mu Irelande wa ku Nord. Èyowà’s, mukalenge. Ngaakapeta dyèsé dyà kuyimòna. Cìvwa ànu cizubu cyà kale cinène. Kabàvwa ne mpìngu ayi milembeleja, ne kudilaaba kwà bintakanyi ku makàsà to, ne kufuta mfranga bwà bantu abu kwalukila ne kubwelabo mu lupìngu alu nànsha. “Màriyà, mwoyi awu, Màriyà, ne mamwèndè wa Nzambì,” cintu cyà mwomùmwe ne cyàkenzelàbo Astarte aci’s (bàkikangana), nyumà wa Màriyà awu.

¹⁷⁹ Kùkaadi ànu bidimu bìbidì anyi bìsàtù èkèleeziyà wa Kàtòlikè wàkabanga dìyì diswika dipyadìpyà dyà ne “Màriyà wàkabiika ku bafwè ne mmubandè mu Dyulu.” Mbanganyi bàdi bavùlùke aci? Kaa, nwènù bwònsò nudi bavùlùke, bushùwà, bibèjibeji mbyùle tètè naabì. Mèyì maswika’s! Nciibakila pa mèyì maswika, ne kakwena kapese kàà Bulelèlà mwaba nànsha ùmwè to.

¹⁸⁰ Mpindyewu, nwènù beena Mishòònyì, bàdi bàbènga kwangata Dìyì dyà Nzambì abu, nudi pèènu ànu babì. Ndiyì diswika dyà èkèleeziyà wa beena Mishòònyì dìmweðimwè ànu mùdì dìyì diswika dyà èkèleeziyà wa Kàtòlikè, ne tudi bwònsò bapìile patùdì katùyì bàalùkile ku Dìyì dyà Nzambì udi ne mwoyi nànsha! Ncyà bushùwà.

¹⁸¹ Nwènù beena Assemblée de Dieu, nwènù beena Foursquare, nwènù beena bùmwe bwà Mpenta, beena búsàtù, anyi ní ncinyì

ní ncinyi cyônsò cinùdi mwà kwikala aci, alùkilaayi ku Díyi dyà Nzambi! Lekèkaayi yimwè yà ku mpingù yà cyena màngumba eyi, mpingù minène yà nyama yà ntambwe yà cyena màngumba. Bàdi bàdilowa nkààyabù (nyumà wa dyabùlù) munda mwà mpingù yà cyena màngumba. Nudi bamanyè aci anyi? *Dingumba* didi “lupingù”!

Wêwè udi wamba ne: “Udi mwena Kilistò anyi?”

“Mêmè ndi Presbytérien.”

“Udi mwena Kilistò anyi?”

“Mêmè ndi Méthodiste.”

“Udi mwena Kilistò anyi?”

“Mêmè ndi mwena Mpenta.”

¹⁸² Aci kî ncitàmbe kwamba ne udi “ngulube” anyi “mbwa” anyi “kasengela nshimbà” to, kacyèna ne cya dyenza naaDì to. Ncyà bushùwà. Cidi citùkèngelà leelù ewu cidi: nkwalukila ku Díyi dyà Nzambi!

¹⁸³ Mpindyewu, bàà ku benji bàà mudimu mu bisùmbishidi ne bantu bàà mushinga mukolè mu Irelande wa ku Nord, bu Patrick Munsantu...mwaba wùvwà bilongelu byèndè byônsò bìsanganyibwa. Nudi bamanyè ne, dîna dyèndè kàvwa Patrick anyi? Dîna dyèndè dîvwa Succat. Wàkakwàciibwa kùdi bàtùmbulà mucùkale mwànà mukesè; baayàayèndè bààkashiibwa. Nènku wàkaalukila, bwalu ùvwa mulongeshe mbwa bwà kulembayi ngulube ne bikwàbò, ki yèyè—yèyè—yèyè—yèyè kwenza nàнку, pààkenzaye nàнку, dîbà adi bwòbò... wàkapeta mùshindù wà kwalukilaye kumbèlù kùdi tatwèndè ne mamwèndè. Ke kubangaye cilongelu kampànda. Kàdi cilongelu cyà mu Irelande wa ku Nord kacyàkiitabakù paapà bu mupinganyi wa kumutù wa Nzambi nànsha, kabàvwa bàciitabuuja to. Bààkashààla ne Díyi. Nzambi àbèneshèku munsantu mubènèshèibwe awu, Patrick Munsantu, muntu munène awu.

¹⁸⁴ Nènku nudi nubùmva bàmba ne “Patrick Munsantu wàkiipata nyòka yônsò mu Irelande.” Balàayi bwalu-bulonda bwà nùmonè ne cívwa ncinyi. Patrick Munsantu ùvwa witabuuja dyakula dyà mu myakulu. Patrick Munsantu ùvwa witabuuja dikwàtà dyà nyòka anyi dinwà dyà bintu byà lufù; nènku pàvwàye mwà kubàkula nyòka ne umuumusha mu njila wèndè, kwambabo ne: “Ùdi wipata nyòka mu Irelande.” Bìvwa mbwalu ùvwa witabuuja mu dikwàtà dyà nyòka ne byanza, ne kakùvwa cintu nànsha cìmwè cívwa cifwànyine kumwenzela bibi to. Èyowà, kaa, s’ncyà bushùwà.

¹⁸⁵ Kabàvwa ne...myaba minène mitàmbe yà kulwa kukuukwila to. Kàdi ncinyi cívwa cifwànyine—ncinyi cívwa munsantu mufwànyine...Ncinyi cívwa Irénée mufwànyine kwenza leelù ewu? Ncinyi cívwa Patrick Munsantu mufwànyine

kwenza leelù ewu, bwà kumòna nkàmà yà miliyò yà ndola mitèèka mu cyena Kàtòlikè kà cyena Loomò, bwà kwibaka èkèleeziyà minène ne mpìngù yà ndola ne bikwàbò byònsò ànu mùshindù ùmwèùmwe ùdi beena Mishòònyì bènza amu?

¹⁸⁶ Ngaakaakula dìyì kampànda ditùkù adi kàdi cyàkalèndwisha bantu bwònsò, ki bwà cinyì ndi mulamà mukàbà wà mèyì ewu. Nwènu bàlekèlaayi ànu kwàbò kwà tàlàlàà, mpofò ùlombola mpofò, bàlekèlaayi bàkapòne mu ciinà. Ki cintu cimwèpelè cinùdi mwà kwenza aci, nwamònu's. Pangaàkabàmbila bwà bwalu bwà mabiikila à ku cyoshelu, kakùvwa cintu bu nàнку mu Bible cyà ne “mabiikila à ku cyoshelu to.”

¹⁸⁷ [Katùpà kàà mukàbà wa mèyì munda mutupù—Muf.] . . wa cijila Cyèndè. Mu didipwekesha twètù biine ku lufù Lwèndè, tudìjingulula ne katwena cintu to, pashìshe Nyumà Mwìmpè ùbwela ne ùtùtùtumuna. Ne twètù katwèna tudyèyemena twètù biine to, bwalu katwèna mwà kwenza cintu nànsha cimwè to, kàdi twètù Nèndè tudi mwà kwenza bintu byònsò.

¹⁸⁸ Twètù, mu cimfwànyì Cyèndè, cimfwànyì cidi ne mwoyi cyà Nzambi udi ne mwoyi. Cyùdi wenza ncinyì. . . Paùdi udilekelela kùdi Nzambi ne Nzambi ùbwela munda mwèbè, cidi cikuvwija cinyi? Cimfwànyì cidi ne mwoyi cyà Nzambi. Kì ndupìngù lufwè lushikika mu ditumba nànsha; kì ndingumba kampànda mu ciimamwèndè wa bukalenge mu Washington mwàmwà to, mu—mu—mu Nsangilu wa Maèkèleeziyà; huh-uh, to, aci's ndupìngù lufwè, lupìngù lufwè ne twitabàayi mufwè. Kàdi cimfwànyì cidi ne mwoyi mmu muntu-nkààya!

¹⁸⁹ Muntu kampànda ùvwa ulongesha dìngà ditùkù, anyi ùvwa ne tuntu tukesè tufùnda, kàdi muntu kampànda kwambayè ne “Muntu yèyè kàyì musùngidiibwe to, ne. . . Mulùme yèyè musùngidiibwe kàdi mukàjèndè kàyì musùngidiibwe to, mbàfwànyine kuya mu Dyambwibwa anyi? Mukàjì awu kènà mwà kuya mu Dyambwibwa to, kakwàkwikala cintu pààci cyà ne mukàjì ùyaaya mu Dyambwibwa ne bwalu bàdi umwe to.” Macimbu's wè! Yesù wàkamba ne: “Nekwiikale bàbidi mu bulàalu, kàdi Nèngàngate umwe ne kushiya mukwàbò.” Mbwalu bwà nkààya pankaci pèèbè ne Nzambi, kufila mubidi wèbè; nànsha maman, papa, bàna, ní ncinyi ní ncinyi cikwàbò baDyàkidile anyi to. Amen!

¹⁹⁰ Éyì Nzambi! Buloba ebu boonèke, bwà manyaanu, bwà bukooya; èkèleeziyà eyi yà manyaanu, yà bukooya yidi miditwe mènà à èkèleeziyà eyi; malongolodi à manyaanu, à bukooya aa; twitabàayi yà manyaanu, yà bukooya eyi yidi yilwishangana ne Dìyì dyà Nzambi ayi. Éyì Nzambi, twàlakù muntu mukèsè kampànda mupwekèle mu mwaba kampànda ne ùbàkezùlèku, ne ùbàbàndisheku mu myaba yà mu Dyulu ne ùDileejè, Nzambi

wa Bukolè bwònsò. Amen. Mùshindù mwine ùdici cilwè cintu cikooyike's wè!

¹⁹¹ Tudi bavwijiiibwe baabanyanganyi bàà cijila Cyèndè. Twètù, mu cimfwànyì Cyèndè, tudi bimfwànyì bìdì ne mwoyi byà Nzambi udi ne mwoyi. Dìbà adi, bafwè mu twètù biine, babiishiiibwe Nendè pàmwè, (tèelejààyi mpindyewu, tèelejààyi eci), Dìyì Dyèndè divwijiiibwe kàbìdì mubidi munda *mwètù*. (Kaa, Mwanèètù Neville!) Tàngilà's! Ncinyi ciinè aci? Kì nanzambi kampànda mukwàtakaja, wa mu cingenyinyenyi musòmbe mwaba awu to, kàdi Nzambi udi ne mwoyi. Nzambi udi ne mwoyi ncinyi? Dìyì munda mwèbè amu munkaci mwà kuDìvwija dilelèlè. Yoyòyò! Butùmbi kùdì Nzambi's wè! Kaa, ndi mumanyè ne nudi nwela meeji ne ndi munsantu mubùnguluki wa mu malaba, pàmwápa ke cìndì. Kàdi, kaa, mwanèètù, udi ucimòna anyi? Bucìmunyi pa dìngumba dyònsò, bucìmunyi pa bumpàngaanù bwònsò, Nzambi udi ne mwoyi mumwènèshiiibwe mu ntempèlu udi ne mwoyi, ne Dìyì dyà Nzambi (dìdì Nzambi adi) ndivwijiiibwe mubidi munda mwèbè. Bwà cinyi? Udi musòmbe mu myaba ya mu Dyulu, mucimune bintu byònsò, mu Kilistò Yesù. Amen!

Kaa, ndi ànu munange Aci's. Ndi ne cyà kutupika cintu kampànda ne kutùngunuka.

¹⁹² Mpindyewu, tèelejààyi. Pashiishe mushààdile wà mu beena kwitabuuja Bèndè, nànsha wèwè bule kaayì—kaayì, anyi bukesè bwà bishi—bishi, cyònsò cyùdì aci, mushààdile wa mu beena kwitabuuja Bèndè (munda Mwèndè) ùdi ne bukòokeshi pa bubì bwònsò. Nwamònu anyi? Tàngilààyi! Kilistò ùdi Mutù wa Mubidi. Ncyà bushùwà anyi? Èè, mwaba wònsò wùdì Mutù awu mubidi ùdi naaWù. Butùmbi's wè! Kuyaaya mutù wànyì aku ùyaaya ne ne mubidi wànyì. Nènku mwaba ùdi Yesù awu, Èkèleeziyà ùdi Nendè. Amen! Yèyè kèna ùpàtuka mu Dìyì Dyèndè to; Ùdi ùshààla mu Dìyì Dyèndè, ùDitàbaleela, bwà kuDimwènesha. Èkèleeziyà Wendè ùdi Nendè.

¹⁹³ Nènku, tàngilà, wèwè udi wamba ne: “Kàdi, Mwanèètù Branham, mémè's ndi mushààdile awu's.” Abi's mbiyacuili byà makàsà Èndè. Kàdi, vùlukaàyi ne, Yèyè wàkacimuna neebè, kucimuna neebè kantu ne kantu, nànsha mùdì bidyacuili byà makàsà Èndè amu. Bubèèdì bwònsò, dyabùlù yònsò, bukòlè bwònsò, nànsha lufù lwinè, bìdì mwinshì mwà makàsà èbè, mu bukòokeshi *bwèbè*. Butùmbi's wè! Ncyèna ndyumvwa bu ne mvwa ne bidimu makumi ataanu ne bìbìdì mu dindà emu to. Eci's m'Bulelèlè. Mémè ànu mwà kufikisha èkèleeziyà ewu bwà kumòna cyòci aci, mwanèètù, netwikalè èkèleeziyà mucimunyi. Beena kwitabuuja mu Yèyè, bubì bwònsò mu bukòokeshi Bwèndè. Kaa, butùmbi's wè!

¹⁹⁴ Nèngiikale mwà kukenketa ndambù, nèntwàdijilule musangu ùdi ùlonda.

195 Tèelejàayi, tèelejàayaaku eci. Wèwè udi wamba ne: “Mwanèètù Branham, ncyèna ne bukolè to.” Nànsha mémè’s. Ncyèna ne bukolè nànsha bukesè to. “Èè, Mwanèètù Branham, mémè ndi kalèndèlèndè.” S’ke mûndi pàanyi. Kàdi ncyèna mweyèmène makàndà àanyi to, kî mmakàndà àanyi nànsha. Ndi mweyèmene bukòòkeshi bwànyì, nwamònu’s, bukòòkeshi bwànyì bumpèèsha. Kî *mmémè* udi ne bukolè to, ncyèna ne bukolè to. Yèyè ngudi ne bukolè, kàdi mémè—mémè ndi Wendè.

196 Mwab’ewu, bu mùdi eci, twàmbèbi cileejilu ne, ki mashinyi àlwalwà ènda apweka ne mùsèèsù aa, mu disangu dyà mùsèèsù Mwinaayi ne wà Broadway mu Louisville ne: “vuum, vuum, vuum, vuum,” ànu ne lubilu lukolè lwà kacya, lwà kilòmèèta makumi citèemà ne yìsambòmbò ku díbà mu mùsèèsù wàwa, bantu bwònsò munkaci mwà mbilu yà kacya, bàsàkilangana, balwijakajanga. Kaamuntu kampànda kakesè kapatuka mwaba awu, kèèla cianza muulu, kàdi, mwanèètù, bitofù bidi bidila. Èè, kaamuntu kakesè aku kakèèna ne bukolè bukùmbane mwà kwimanyika nànsha dimwè dyà màshinyi awu nànsha, kàdi kòkò kàdi ne bukòòkeshi. (Butùmbi’s wè!) Kî mbukolè bwàkù nànsha. Èè, kàmwè kàà ku tùshinyi atu kwòkù mwà kukàtuuta, s’nkafwànyine kukàvingutula. Kàdi kèlèbi ànu cianza cyàkò aci muulu’s! Bwà cinyi? Bendeshi bàà tùshinyi bàdi bajingulula cilàmbà cyà mudimu aci.

197 Kaa, mwanèètù, bàdi bàjingulula cilàmbà cyà mudimu aci, bàdidisha bitofù. Bwà cinyi? Tàngila bukòòkeshi bwèndè. Tàngila cidi paanyimà pèndè apu. Ndongolwelu mujimà wa cimenga ùdi paanyimà pèndè. Makànda à mikenji yà cimenga àdi paanyimà pèndè apu. Cilàmbà cyà mudimu aci’s ke cidi cicleeja. Yèyè’s mmushilàngàne, èyowà’s, mukalenge, bwalu’s mpùlushi.

198 Yèyè mwelè lubilà ne: “Imànà!” Èè, kàmwè kàà ku tùshinyi atu kwòkù katùngùnùka ne kuya “vuum,” s’kàdi kamubooya ànu mùshindù awu. Kàdi’s mbìmpè kabàteeciku kwenza nànkù to, tàngilàayi cidi paanyimà pèndè apu aci. Nebàdidishe bitofù ne kwimanyika. Kabyèna nànsha bikèngela bwà kwambayè cintu to, ànu kwela cianza cyèndè aci muulu. Aci ki cidi cicyènta, bushùwà. Bukòòkeshi bwèndè bùdi bufùmina ku dikolesha dyà mikenji, byònsò bidi paanyimà pèndè. Yèyè nkàayèndè, yèyè mmutekète, kàdi nciyì cidi paanyimà pèndè aci? Aci ke cidi mùtootò . . . cilàmbà cyèndè, mmuvwàle cilàmbà cyèndè cyà mudimu aci bilenga byà kacya.

199 Aci’s ke cidi . . . kî ndupìngù, kàdi ncidi muntu-nkààya ne cyà kulwàtá. Tùlwatàayi byà mvitá byònsò byà Nzambi, amen, cifulu cyà lupàndù, ngabu munène wa katankù ewu (wa bunène bwà ciibi) wa diitabuuja. Kaa, mwanèètù. Kî ncidiye to, kàdi ncidiye ùleeja.

200 Ke cidi mpùlushi . . . kî mmuntu mukèsè udi mwimanè kaaba aku awu to, yèyè’s mmuntu wetù wa patupù ewu, kàdi cidieye

ùleeja aci!

²⁰¹ Byà Mvità byètù n'Yesù Kilistò. Èyowà's, mukalenge. Démons yònsò yidi yidyata bitofù byàyi pàdiyi yimòna Aci. Pàdiyi yimòna byà mvità bijimà byà Nzambi abi, dibàtiiza dilelèlè dyà Nyumà Mwîmpè, amen, yìDimòna difùmina buludi ku Nkwasa wa butùmbi wa Nzambi, bavwàle byà mvità byònsò byà dibìikà Dyèndè dyà ku lufù. Amen.

²⁰² Kî nne *wêwè* ngudi ne dikàndà to, kwèna cintu nànsha címwè to, bwalu mbwà cidi paanyimà pèèbè apu aci. Bwà cinyi? Udi mufwè. Udi mubwele mu cilwilu, udi mubwele mu cisumbù cyà bampùlushi, udi ne cyà kutàbaleela dilama dyà mikenji ne kukontonona démons eyi. Neyà bushùwà, wêwè udi mu cisumbù cyà bampùlushi, cintu cyònsò mu kaabujimà's cidi paanyimà pèèbè apu. Nwamònu's, udi mudijingùlù bu mufwè, kwèna cintu nànsha címwè to, kwèna mufwanyine kwimanyika cintu nànsha címwè to. Kàdi mbukòòkeshi bwèbè bùdi bukupèèsha abu, bwalu udi mubiike ku lufù ne musòmbe mu myaba yà mu Dyulu mu Kilistò Yesù, dyabùlù's ùdi ùjingulula aci. Bintu byònsò bìdi bikwàta bitofù byàbi díbà didi byanza abi bìbànda muulu.

²⁰³ Martin Munsantu, musangu kampànda mu bulà kampànda... Kwàkadi muntu kuntwaku ùsùnsulangana (dyabùlù), ùvwa ùtwangana nsùmù yà mènù ne ùjoomona bantu mapùndà à nyiinyi mùshindù awu, ne bantu bàvwa bàya mbilu, ùvwa ùteeta kubàshipa. Ùdyàpula dipùndà dinèn... ùvwa ne mènù manène, à masongòloke bu mibanga yà nzevu, ùvwa ùtùùlangana minyiinyi ùuja matàma ntèntè mùshindù awu bu mùvwàye ùyumbakaja bantu.

²⁰⁴ [Katùpà kàà mukàbà wà mèyi munda mutupù—Muf.]... mu bakuukwidi amu. Nènku matùkù àkadyànjlàye kumòna, ne kumanyayè ne bìvwa bifwanyine kwikala mùshindù ewu, pàvwàYe Yèyè mwine mwà kwipaciibwa mu èkèleeziyà Wèndè Sungasunga, èkèleeziyà wa Laòdikiyà. Kwambayè ne: “Mònaayi, Ndi mwimanè ku ciibi nkookola.” Bulongolodi abu bwàkadi buMwele pambèlù, ne mbacyènze leelù ewu, kàdi mMwimàne ku ciibi bwà kukookola.

²⁰⁵ Éyi Nzambi, swàkù bwà bidimba byà Mubidi Wèndè bìjingululè leelù ewu ne tudi mu Èkèleeziyà mucìmunyi. Tudi—tudi mu Kilistò. Tudi basòmbe kumutù kwà bintu byònsò byà pa buloba ebi.

²⁰⁶ Mbwà cinyi bùdi bakàjì bèètù bàjinga kukòsela nsuki yàbò? Nzambi, bìdi bìleeja ne kùdi cintu kampànda cibi. Mbwà cinyi bùdibò bafwanyine kujinga bwà kuditàdika mu bintu byà mmwenekelu wà ùsalulangana masandi? Mbwà cinyi bùdi bantu bètù ne nzala mu myoyi yàbò bwà kutèèleja mu—mulùmyànà bu Elvis Presley anyi—anyi bàmwè bàà ku baa Rickys aba, anyi bikwàbò, bàjuuka mwaba awu ne cindàlà cyà kale ne mijiki yà

kale yà bèèla mbilà mikolè ayi ne kufikisha nsongàakàjì yètù ku didìkùpa ne kuleeja bivwàlù byà mwinshi, ne bikwàbò? Nzambi, ne pashiishe mwànà wa balùme awu ùdyàmba mùdiye mwena Mpenta! Éyì Nzambi, ncinyì cìdì . . .Tàngilàayi Pat Boone ewu udi udyàmba mùdiye wa mu Èkèleeziyà wa Kilstò ne bintu byònsò bya bushààdile, byà manyaanu . . .Éyì Nzambi, ùdìbìkìla mùdiye yèyè “wa mu Èkèleeziyà wa Kilstò.”

²⁰⁷ Nzambi, nyèwù tujungulula ne citaata cyà bukòokeshi eci kí ndìnà dyà dngumba kampànda nànsha, kàdi mbukolè—bukolè bwà dibìikà dyà ku lufù dyà Kilstò mu nsòmbelu yònsò wa muntu ne muntu nkààya yònsò ewu. Nzambi, swàkukù bwà cisambà eci mu dindà emu cilwangeane bwà kubwela mu Cyòci aci. Nènku mukàbà wà mèyi ewu wòwò ne cyà kuyakù mu ditungà mùdi bantu bàsanganyibwa, Mukalenge, enzàku bwà bàmanye ne kabivwa byamba bwà budimù nànsha, bwalu ndi mufwànyine kwikala mu bubì mèmè mwinè, kàdi mbwà ne Èkèleeziyà wàmòna mwà kwikala mucimunyi ne kujingululayè kaaba kèndè. Bwà bàáfwanyina kumòna mwaba ùdi mpingù yònsò eyi . . .Mwaba ùdi èkèleeziyà wa Kàtòlikè ùpàtukila patòoke ne ùcìvwija “lupingù,” beena Mishòònyì bàcìvwija “bulongolodi,” ànu bibì menemene; bàvila Dìyì ne: “Biikàle ne cimwènekèlu cyà difwànà dyà Nzambi, kàdi bàvila Bukolè bwàdi.” Éyì Nzambi, mùshindù mwinè wùdì Dìyì Dyèbè dilelèlè, Dìyì dyònsò’s wè!

²⁰⁸ Mpindyewu tudi tulòmba, Taatù, bwà Wèwè kutùfwila luse ku mpèkaatù yètù, ne swàkukù bwà Mukenji ewu ùtùkine mu ndondo wa myoyi. Nènku swàkù bwà bantu . . .Swàkù bwà èkèleeziyà ewu, bu mùdi tabernacle mukese ewu mpindyewu munkacì mwà mudimu wà diibaka dyà nzùbu wa èkèleeziyà, swàkù bwà kabàtàngidikù ku cintu kampànda cyà cilenga kumòna to, kàdi nangananga bwà kukùba bantu. Nzambi, swàkukù bwà kàbàbangikù kutàngila ne kwamba ne: “Twètù tudi bàà mu tabernacle munène udi ne musàkà bu dikùmbì kumutù awu” to. Nzambi, enzàku ne ciikale cizubu cyà munda mutupù. Swàkù bwà kabùùmushikù mèsù àbò ku Cyena-bwalu, cyà Yèsù Kilstò to. Swàkù bwà Yèyè ikale Ewu udi ùja ntèmpèlu wabo, ne dìbà adi bukolè ne kapyà kàa Nyumà Mwimpè nebiponè pa cyoshelu cyà myoyi yàbò. Ki mwaba ùdi cyoshelu cyà bushùwà cisanganyibwa, Mukalenge, mmu mwoyi wà muntu nkààya yònsò ewu.

²⁰⁹ Ndi ndòmba mu dindà emu bwà ne Dìyì edi dineemè bujitu bukolè pa cyoshelu cyà mwoyi wònsò mu mùshindù wà kabàyiku mwà kukùmbana bwà kuya kule naaDì to, bwà bàlwa ne meeji makezùke ne bàtwila Èvànjeeliyò, biitabuujà Méyi; ne kabàyi bàkàngula mwoyi wàbò ku makolè à dyabùlù nànsha (anyi masaluka, anyi mbilà yà mitwe, anyi ditumpika, anyi—anyì dimwèneshiibwa kampànda, mmwènekèlu kampànda wa mubidi, anyi cintu bu nànkù awu), kàdi ku Nyumà wa

Kilistò mulelela, mushùwashùwâlâ wa dinanga, mwikalâ Ye mwâ kuDimwènesha mu dinanga ne bukolè.

²¹⁰ Enzàku nàнку, Mukalenge. Ondòpàku babèèdi ne beena ntàtù. Tudi tulòmba mu Dìnà dyà Yesù. Amen.

Ndi muMunangè, ndi muMunangè
Bwalu Yèyè wakannanga kumpàla
Ne wàkampetela lupàndu
Ku mucì wà Kàlvariyo.

... Ndi muMunangè
Bwalu Yèyè wakannanga kumpàla
Ne wàkampetela lupàndu
Ku mucì wà Kàlvariyo.

²¹¹ Ne mitù yetù miinyika, mbanganyi bìikalâ mwâ kutèeka mwoyi wàbò pa cyoshelu ne kuwùvwija budimi bwâ Nzambì, bwâ Wàmònâ mwâ kumyamina Dìyì Dyèndè pa cyoshelu cyâ mwoyi wèbè, wìkala mwâ kutwala nsòmbelu wa dibìikâ dyâ Kilistò ku lufù? Nudikù mwâ kwela byanza muulu kwamba ne: “Nzambì, ndi njinga eci ne mwoyi wànyì wònsò anyì”? Nzambì àbèneshè myoyi yènù yìdi ne nzala, makumi ne makumi.

Bùtùùle mwaba awu, bùtùùle ànu mwaba awu,
Twâla bujitu bwèbè kùdi Mukalenge ne
mutùùdilebù mwaba awu;
Twètù mwâ kweyemena katùyì twela mpatâ,
Yèyè neàtùkwàcìshè bushùwâ;
Tutwalâayi bujitu bwètù kùdi Mukalenge ne
tubùtùùle mwaba awu.

²¹² Ànu mu mwoyi wèbè amu, wàvùluka Kilistò Musùngidi, wàvùluka ne Yèyè wàkakufwila. Nènku wèwè mwâ kufwâ mu wèwè mwìnè, aci's necìshiye mubidi wèbè munda mutupù, cìshiye musùùkâ wèbè munda mutupù, necìshiye mwoyi wèbè munda munda mutupù ku bintu byònsò byâ buloba ebu ne bisànkasanka byàbù byònsò, dibâ adi Kilistò... neùbiike Nendè pàmwè.

²¹³ Pawikalâ kùyì mubàtìjìibwe mu Dìnà dyà Yesù Kilistò to, ciinâ cyâ mâyì ncyòci eci cyùle tètè ne mâyì mwaba ewu. Nènku, paùdi ubiika upàtuka mu mâyì aa, udi ubiika bwâ kwenda ne Kilistò mu lwendu lupyalùpyâ. Wèwè udi mufwè dibâ adi, kucyèna kàbìdi... ciijì ne byònsò mbiyè. Udi cifùkìibwâ cipyacìpyâ mu Kilistò. Dìbâ adi Yèyè ùdi ùkujuula ku Nyumâ Mwímpè ne ùkutèeka mu myaba yâ mu Dyulu pàmwè Nendè, kuulu kule menemene kwâ makolè à buloba ebu.

²¹⁴ Nànsha wèwè mukesè wa bishi, ní udi mukàjì mukesè musukwidyanganyi wa bilàmbâ, ní udi—ní udi ànu mwanèètù wa balùme utu kàyì yèndè... kàyì mumanyè nànsha ABC to, cyùdi aci kacyèna ne cidici cishintulula to. Wèwè udi mu Kilistò, ucìmuna bintu byònsò. Ne bukòokeshi bwèbè bùdi kumutù kwâ

démon yônsò ne bukolè bwônsò bùdi naabù dyabùlù abu. Wèwè udi mu Kilistò, mucimùne.

Panùdi ne mitù yènù miinyika apa:

215 Ndi mumanyè ne kùdi mwanèètù wa balùme kampànda mulwè kaaba aka mu dindà emu, Mwanèètù Slink (Ngèela meeji ne bàtu bàmbubikila ne “Sink, Jim Sink”), ùndi ngèela meeji ne ùdi. . . Ne mwanèètù wa balùme ewu mmumanyike bu mulongeshi wa Dìyì edi. Kí mmwómò anyì, Mwanèètù Sink? Bidi bikèngela bwà twètù kumutentekela byanza mu dindà emu kumpàlà kwà twètù kusambidila babèèdi, bwà kumujidila bu mwambi (umwe wa ku bânà bèètù bàà balùme) bwà kupatuka kuya mu maèkèleeziyà bwà kuyiisha Èvànjeeliyò.

216 Mwanèètù Jim Sink, udikù mwà kubàndila kunweku ku cyoshelu anyì? Lwàkù, Mwanèètù Neville. Mwanèètù Junie Jackson, udi kaaba aka anyì? Yônsò wa ku bambi bakwàbò bàà Diitabuuja edi abu?

217 Mwanèètù Jim Sink ewu ùdi wìtabuuja Èvànjeeliyò utùdi tuyiisha ewu, Mwànà wa Nzambi, bwà kwitabuuja ne Yèyè ùdi bulelèlà Mwànà wa Nzambi mulela kùdi virgò. Mmwómò anyì, Mwanèètù Sink? [Mwanèètù Jim Sink ùdi wàmba ne: “Amen.”—Muf.] Udi wìtabuuja ne Yèyè wàkafwà ne wàkabiika ku lufù ditùkù diisátù, kucìmuna bintu byônsò, ne mmusòmbe ku dyàbalùme dyà Nzambi, mu mpwilàmàmbù wa bukolè bwà Nzambi mu Dyulu, mwikale ne mwoyi kashidi bwà kutwàkwila anyì? [“Amen.”] Udi wìtabuuja dibàtiiza dyà mu màyi mu Dìnà dyà Yesù Kilistò bwà dilekelediibwa dyà mpèkaatù anyì? [“Amen.”] Udi wìtabuuja dibàtiiza dyà Nyumà Mwìmpè ànu mùdi Nzambi mwà kuMufila amu, ne bimanyinu ne maalu à kukema bilonda mwena kwitabuuja anyì? [“Amen.”] Nyèwù wìtabuuja nànkù. Ndi ngìtabuuja ne ùvwa ne nsòmbe luwa wa kàyì ùbandiibwa kumpàlà kwà bantu. Útu ùyiisha kaaba aka mu èkèleeziyà emu, misangu mivule bwàbù bóbò mwab’ewu, ne ndi mujandule ne: “mmuntu wa Nzambi mulenga wa dikemà.”

218 Mpindyewu, bwà èkèleeziyà ewu, kùdikù dìyì kampànda mwab’ewu, muntu kampànda udi ne dìyì dyà kubengangana ne Mwanèètù Sink anyì? Dyàmbe mpindyewu cyanàànà ùpuwe kashidi kèèbè. Mbanganyi bàdi biitabuuja ne diyiisha dyà Mukenji ewu ne Dìyì edi ne Mwanèètù Sink. . . ne nudi nwtabuuja aci ku bujaadiki bwà Nyumà Mwìmpè, bwà ne Mwanèètù Sink ùdi ne cyà kujidiibwa ne kutùmiibwa ùmukila ku èkèleeziyà ewu bu mwambi wa Èvànjeeliyò, bwà kukòbola Mikenji eyi bu mùdiyi miyiishilwe mu dindà emu, kwônsò kùdiye mwà kuya mu buloba mwàmùtùmà Mukalenge amu anyì? Elàayi byanza byènù kuulu nwámbe ne: “Nênkusambidilè, Mwanèètù Sink.” Nzambi ànùbènèshè.

Twìnyikaayi mitù yètù.

219 Mwanèètù Neville, wèwè mwà kutetekelakù Mwanèètù Sink byanza paùdi ne cyanza cyèbè citenteka mu Bible apu.

220 Taatù wetù wa mu Dyulu, nyèwù tuKutwàdila, mu dindà emu, muntu udi mupatula mu cinyangu cyà buloba ebu, mmudjìngùlule ne mmufwè yèyè mwinè ne mmwitàbe Kilistò bu Musùngidi, mubàtjìbwe mu Dìna dyà Yesù Kilistò, mujuuke ne mulayi wà kupeta Nyumà Mwímpè, ne mpindyewu ùdi mu myaba yà mu Dyulu, ne ùmvwa dibìkila mu mwoyi wèndè ku mudimu wa bwambi.

221 Éyi Nzambi, bu bakùlù bàà èkèleeziyà ewu, bu disangisha ne batàngidi bàà bwónsò ne bikwàbò, bwà kutabaleela kasumbù kàà mikòòkò kàdi Nyumà Mwímpè mutwenze bandeeji bààkù, kasumbù kàà mikòòkò nkèlè cyanza muulu bwà ne nkamanye ne Mwanèètù Sink ewu ne: “mmuntu mwakàne,” ki bwà cinyi tudi tumutentekela byanza byètù, bu mùdi Mwanèètù Neville ne mèmè, bu bakùlù Bèèbè, ne ku cyòci eci tudi tusambila disambila dyà diitabuujà ne tujidila Mwanèètù Jim Sink mu mudimu wa bwambi wà Yesù Kilistò. Enzàku nàнку. Swàkù bwà ùjiiwbwè ne bukolè bwà Nzambi. Kwitabikù bwà adye cibàngà nànsha. Swàkù bwà aKupetèlèku misùùkà.

222 Nènku, Nzambi, tudi tumulaya lulamatu lwètù ne buwetù, bwà kumutwà mpàndà kwónsò kùdiye aku, mu disambila, ne mu dikwàcisha, ne mùshindù wónsò wutùdiku mwà kwenza awu. Mwakidilekù, Éyi Nzambi, bu mutùdi tuKulàmbulayè. Mu Dìna dyà Yesù Kilistò, Mwànà wa Nzambi. Amen. Amen.

223 Ne byanza byèbè byambika pa Diyì, nènku mwaba awu Mwanèètù Sink wa yààyà, ndi nkujidila wèwè mwanèètù wa balùme mu Kilistò ne bwobùmwè bwètù, mu Dìna dyà Yesù Kilistò. Amen. Nzambi àkubènèshè. Éyo. Ki disangisha kwamba ne: “Amen.” [Disangisha didi dyàmba ne: “Amen.”—Muf.] Nzambi àkubènèshè. Kùdi byàbùngi byà dyenza mu Èvànjelijò, bìdi bìkèngediibwa bikolè be, tudi paanyimà pèèbè lukàmà pa lukàmà mu byònsò bitùdi mwà kwenza bwà kukwambulwisha abi. Nzambi àkubènèshè.

224 Yèyè kí mmulenga wa dikèma bwà kwikala...Kaa, ekèlekèle! Ndi muswè kumòna muntu. Abi's mbímpè. Yèyè ùdi, bu mùndi ngumvwa mpindyewu, ùdi wàngata bumpaasàtà bwa Holiness Tabernacle ku Utica, mu Indiana, mùdiye musòmbele amu kí nnànsha kule ne mwab'awu to.

225 Mpindyewu, twànjibi kumòna. Kaa, tudi ne bânà bèètù abu anyi? Kaa, ngèèla meeji ne tudi ne babèèdi bàà kusambidila kàbidi, kí mmwómò anyi? Éyo, bàvwa. . . nudi baabànye ndambù wa twartà twà disambila anyi? Éyo, twànjibi kubìkila ndambù wa twartà twà disambila ne lukàsà mene, muntu yònsò àshaalè ànu mupùwe katanci kakesè cyanàànà. Dìbà dikaadi diye bikolè. Nudikù mwà kumpèèsha tusunsa dikumi anyi? Éyo. Twartà twà

disambila, lekèlaayi bàdì ne twartà twà... Nuvwa babangile kwabanyina penyì, ùmwè?

226 Èyo, karta kàà disambila nombà umwe, udiku mwà kulwa, nombà ibìdì, nombà isàtù, nombà inaayi, nombà itaanu. Karta kàà disambila nombà umwe, ibìdì, isàtù, inaayi, itaanu, yimànyinaayi ànu lwà apa, ne lukàsà lwènù pèènù lwónsò mpindyewu, bu nwènù mwà kujuukila kuulu. Wèwè kùyi mwà kwimana to, tumanyisha, netùlwe kukwambula. Netùteetè bwà kwangata búngì bwónsò butùdì mwà kwangata abu. Òmwè, ibìdì—ibìdì, isàtù, inaayi, itaanu, isambòmbò, mwandamutekète, mwandamukùlù, citèemà, dikumi; isambòmbò, mwandamutekète, mwandamukùlù, citèemà, dikumi; kàdì ànu bàbìdì ke bàdì bajuuke pa bwónsò abu. Dikumi, dikumi ne ùmwè, dikumi ne ibìdì, dikumi ne isàtù, dikumi ne inaayi, dikumi ne itaanu. (Huh?) Twónsò, twarta twónsò twà disambila, tentèmùkaayi nulwe luseke lukwàbò elu, lwilàayi ku elu luseke eku, ku elu luseke bu nwènù mwà kuswà.

227 Kaa, Yèyè kí mmulenga anyi? Mpindyewu, muntu yónsò ikale ànu ne kaneemu kakolè ne mwèndè pèndè mwónsò, munda mwà tusunsa tutwè ku dikumi mpindyewu, ànu mu tusunsa tutwè ku dikumi. Mpindyewu, aba bàdì ne twarta twà disambila, tuvwa bàmbè díyì dyà ne “Bantu bàdì bajinga bwà kubasambidila abu, bàlwe ne twarta twàbò twà disambila,” bwà ne katùlù... Nwamònu’s, bàtu bàtungunuka ne kwalukila, ne pashìshe bàteeta kuvwija dipà dyà Nzambì dyenze bu lumwènù lwà lubùku, kàdì katùtu—katùtu twitabuuja dyenze dyà nàнку to.

228 Twètù—twètù tudi twitabuuja mu dilekela dyà Nzambì ùDìkwacila Mudimu Wèndè. Nudi nwitabuuja nàнку anyi? Mbanganyi bàdì biitabuuja Mukenji ewu mu dindà emu bwà ne m’Bulelèlà? [Disangisha dìdì dyàmba ne: “Amen.”—Muf.] Twasàkidilaayi. Twasàkidilaayi. Nzambì ànùbènèshè. Ndi nCìitabuuja ne mwoyi wànyì wónsò, musùkà, ne meeji.

229 Mpindyewu, mbyenze ànu bu ne tudi ne bantu batwè ku makumi àtaanu kaaba aka bàà kusambidila, cintu cyà mùshindù bu nàнку awu. Mpindyewu, tèèlejàayi. Mpindyewu, umwe ne umwe wenù ùdì mu Kilistò. Udi mu Kilistò Yesù, ne bucìmunyi pa bubèèdì bwónsò. Nwènù bwónsò bàdì mu mulongo wa babèèdì abu, bàdì beena Kilistò, beena kwitabuuja balediibwe cyàkàbìdì, elàayi byanza muulu. Kaaba kèènù díbà adi mmu Kilistò. Nukàadi bamanè kucìmuna, kàdì cintu cimwèpelè cinùdì ne cyà kwenza mpindyewu nkwitaba ne kwitabuuja cìdì Nzambì mwambè ne ke Bulelèlà.

230 Ncìvwa mwà kukòokesha bwà kwangata mulongo awu bwà dijingulula to, mbifwànyine kwikala bikolè be bwà kucyènza, nebitwangàtè ntàntà mule be. Kí mbifwànyine kwikala nàнку bwànyì mèmè to, ngèèla meeji ne ndi mufwànyine kushààla

kaaba aka ditùkù dijimà, ndi ndyùmvwa ànu bîmpè. Ndi ndyùmvwa ànu bîmpè. Ndi mumanyè ne Ncilelèlè. Mukalenge àtumbè! Kàdi *mpindyewu* tudi mu Kilistò, *mpindyewu* tudi basòmbe pa kaaba kèètù mu Kilistò. Amen! Kaa, ekèlekèlè! Bintu bîndi mulongeshe ebi mBulelèlè anyi? Byôbì nànkù, dîbà adi Yèyè neàDîpatule Yèyè mwine. Ncyà bushùwà.

²³¹ Mbanganyi bàà ku nwênù bàdì mu mulongo wa babèèdì emu bàdì beenyi kùndì? Ndi mumanyè bààbùngì bàà ku nwênù, kàdi bàmwè bàà ku nwênù mbeenyi. Elà cyanza cyèbè muulu, wèwè ùdì mumanyè ne ncyèna mumanyè kantu nànsha kàmwè kàdi kàkutàcisha, elà cyanza cyèbè muulu; mu mulongo mujimà amu, uh-huh, èyo. Yèyè ùdì Kilistò anyi? Udi uCìitabuuja anyi? Udi ne cyà kwikala ne diitabuuja, udi ne cyà kuCìitabuuja. Wèwè kùyi ùCìitabuuja to, dîbà adi Kacyàkwenza bwalu to. Bikèngela ùmanyè kaaba kèèbè, bikèngela ùmanyè mwaba wèbè. Ncyà bushùwà, Mwanèètù West? Ncyà bushùwà. Manya kààba kèèbè, Kilistò wàkalaya ne: “Bintu bîNdi ngènta ebi nenùbyenzè pèènù.” Udi uCìitabuuja ne mwoyi wèbè wònsò.

²³² Muntu udi mwimane lwà paanyimà wàwa ùdì ne cintu cidì cìmutàcisha mu cifùkà cyèndè. Udi uCìitabuuja ne mwoyi wèbè wònsò's. Kwena mwà kubwela mu mulongo wa babèèdì to, kàdi udi mwà kwalukila ne kusòmbela panshì, necyùmuke. Ne kí nkànsèrè nànsha. Alukila ne utwe nyimà panshì, kwajiki. Kacya naitukù mwanji kumòna muntu awu mu lwendu lwányi to. Twètù biikàlè beenyi, mwanèètù, elà cyanza muulu. Twètù biikàlè beenyi. . . Bwalu bùdì ne, yèyè mmwondòpiibwe!

Ku cyoshelu eku, nudi witabuuja anyi?

²³³ Kàdi wèwè? Twètù tudi beenyi, ncyèna mukumanyè to. Nzambi ngudi mukumanyè. Udi witabuuja ne mèmè ndi musadidi Wendè anyi? Udi witabuuja Mukenji ùndì nyiisha ewu anyi? Amba tũng bu mèmè mwà kukwambila ne lutàtù lwèbè lwà nyimà nelùkuumùke? Udi uCìitabuuja ne mwoyi wèbè wònsò anyi? Mukalenge Burkhart, alùkilà ku Ohio, udi mwondòpiibwe. Yesù Kilistò ùdì ukusàngaja.

²³⁴ Kwèna kaaba aka bwèbè wèwè mwinè to, udi kaaba aka bwà muntu mukwàbò. Mmuntu mukàjì. Ne yèyè awu, pèndè, ngwa ku Ohio, ncyà bushùwà, dyèndè Ng'Alice McVan. Ncyà bushùwà. Mmupicile ku keelè. Ncyà bushùwà. Disaamà dyà cifù ne lutàtù lwà bwànà bukàjì ne dinyùnguluka dyà mutù. Mmwòmò anyi? Itàbùùjà ànu cyanàànà nènku yèyè neàsàngalè. Tũngunuka ne kuCìitàbùùja ne mwoyi wèbè wònsò. Cìtàbùùjè ne mwoyi wèbè wònsò, yèyè neàsàngale.

²³⁵ Wetwàwù? Ncyèna mukumanyè to, tudi beenyi. Ncyà bushùwà anyi? Udi witabuuja ne mèmè ndi musadidi Wendè anyi? Udi witabuuja ne tudi bacìmùne mu Kilistò anyi? Wèwè mwitàbùùjè, ne dinyùnguluka dyèbè dyà mutù ne ntàtù yèbè

ne bintu byûdi naabi abi, dîbà adi, Mandamu Allen, udi mwà kwalukilu kwèbè kumbèlu ne kusàngajiibwa.

²³⁶ Ngèèla meeji ne tudi beenyi, kî mmwômò anyi? Kacya ncitukù mwanji kukumòna kwònsò eku to. Ewu's ke musangu wà kumpàla utùdi tutuutakeena kacya, tudi beenyi muntu ne mukwèndè. Udi ungiitabuuja bu mupròfeta Wendè anyi? Udi uciitabuuja anyi? Udi usaama disaamà dyà twonyi. Ncyà bushùwà, kî mmwômò anyi? Kwèna wa munwemu to, udi wa kwinshì ku Sud. Udi usambidila bânà bèèbè bàdi kabàyi basungìdiibwe abu. Udi paanyimà pèèbè awu's mbàyebè. Ùdi ne muntu kampànda pa mwoyi wèndè apu mu dindà emu, mulundà udiyè ùsambidila. Twambe ne, ndi mmòna muntu kampànda, wèwè udi—wèwè udi mulundà wa mamwǎnyì ne tatwǎnyì. Muntu mulùme kampànda ùtu ùlwa kaaba aka dyèndè ne L. C. anyi S. T., anyi cintu bu nànkù, S. T. anyi cintu kampànda, awu's—awu's mmwanèèbè wa balùme. [Mwanèètù Neville ùdi wàmba ne: "J. T."—Muf.] J. T. . . Ki bwalu mbwòbù abu's, S. T. To, kî J. T. to, ndi mumanyè. Mmuntu mukèsè, wa nsuki mifike, ndi mumumòne mwimanè mwab'ewu mene mu mpàla emu mùdiye usanganyiibwa mpindyewu. Pingàna kumbèlu, wǎpeci dilòmbà dyèbè. Alukila kumbèlu.

²³⁷ Muntu awu ùdi kaaba aka mu dindà emu anyi, muntu wa ku Géorgie awu? Èyowà. T. S. Èyowà. Ncitungù mwanji kumòna tatwèbè ne mamwèbè to kacya bándela, ne udi mumanyè ne aci's ncilelèlè, kàdi ndi mukumòna umwènèka, ànu kaaba aka kumpàla kwàbò dîbà adi mene. Mémè kumba kumanya ne bìvwa nànkù. Udi upeta dilòmbà dyèbè, kwèdi mpatà to.

²³⁸ Nwènù bwònsò nudi nwitabuuja, ne mwoyi wènu wònsò anyi? Mpindyewu, mbanganyi? Yònsò wa kunùdi udi mu Kilistò. Wèwè udi wamba ne: "Aci ke Èvànjeeliyò anyi?" Ki menemene cyàkenzà Yesù Kilistò ncyòci aci. Ki cyàkenzà bàpostlò menemene ncyòci aci. Aci menemene ki cyàkenzà Irénée ne bakwàbò bwònsò. Ncyà bushùwà.

Udi witabuuja Aci anyi? Dîbà adi inyikà mutù wèbè.

²³⁹ Lwàkù kuneeku, mukùlù. Kùdi bantu bààbúngi be bàdi ne cyà kupicila mu mulongo wà babèèdi awu mùshindù awu. Tudi bangàte bàbìdi anyi bàsàtù muntwamu. Tupwekela ànu mwab'ewu. Mwanèètù Neville wanyi ewu mmuntu wa Nzambi. Ndi ngiitabuuja nànkù.

²⁴⁰ Netùpicile mu mulongo ewu kaaba aka bwà kusambidila bantu aba, kubàtentekela byanza. Nwènù bwònsò nudi nwitabuuja ne nenümvwè bìmpè, muntu ne muntu wa kunùdi anyi? Bantu bwònsò mwab'ewu nebiikalè mwà kuCiitabuuja anyi? Dîbà adi inyikaayi mutù wènù mpindyewu, tudi mu Èkèleeziyà mucimunyi.

²⁴¹ Mukalenge Yesù, ndi mumanyè mwanèètù wa balùme ewu, ki bwà cinyi ncivwa mumwambile kantu nànsha kàmwè pa bwalu

abu to. Ndi mumanyè cidiye ùjinga. Ndi ndomba bwà Wèwè kumwondopa, Mukalenge, ne kumupà dilòmbà dyèndè. Mu Dîna dyà Yesù Kilistò.

242 Taatù wa mu Dyulu, ne byanza bitentekela mwanèètù mukesè wa balùme ewu, mu dîndà emu, tudi tulòmba mu Dîna dyà Yesù bwà disùngidiibwa dyèndè. Amen.

243 Kaa, wèwè udi . . .

Taatù wa mu Dyulu, pèeshakù Mwanèètù wa bakàjì Dauch ewu, mwanèètù wa bakàjì munanga, utu mulundà wetù mulelèlà kaaba aka, bwà dîkù dyànyì ne bananga bèètù. Tudi twitabuuja ne yêyè ne bàyèndè mbâna Bèèbè. Ndi ndòmba, Nzambì, bwà Ùmwenzèlèku dilòmbà dyèndè mu dîndà emu. Mu Dîna dyà Yesù Kilistò. Amen.

244 Nzambì, mu Dîna dyà Yesù, bèeshakù Mwanèètù wa bakàjì Bruce. Tudi bamanyè, Mukalenge, ne yêyè mmusadidi Webè. Tudi tulòmba bwà Wèwè kumupèèsha dilòmbà dyèndè—dyèndè. Mu Dîna dyà Yesù Kilistò. Amen.

245 Éyì Taatù wa mu Dyulu, biikàle bamanyè ne—ne Wèwè nkààyebe udi mwà kwondopa Mwanèètù wa bakàjì Blankco, tudi tulòmba bwà Wèwè kumubèeshakù ne kumupèèsha dilòmbà edi, Mukalenge. Mu Dîna dyà Yesù Kilistò. Amen.

246 Taatù wa mu Dyulu, nyèwù tutentekela mwanèètù wa bakàjì ewu byanza mu Dîna dyà Yesù Kilistò, tulòmba disùngidiibwa dyèndè bwà butùmbì Bwèbè. Amen.

247 “Bimanyinu ebi nebifilè aba bàdì biitabuuja,” ne tudi tutentekela mwanèètù wa bakàjì ewu byanza wíkala mwà kusàngala. Mu Dîna dyà Yesù, enzàku nàнку, Mukalenge. Pàcidi mubidi mubìndùlùke, ne ùzakala ewu, mwimanè kaaba aka, Mukalenge, mu bwenzeji bwà Nyumà Mwímpè, ne mucyòke, kàdi Wèwè udi Nzambì. Ondòpàku nsongààkàjì mutekète ewu, ndi ndòmba, mu Dîna dyà Yesù.

248 Nzambì wa Bukolè bwònsò, pèeshakù mwanèètù wa balùme ewu dilòmbà dyèndè. Enzàku nàнку, Taatù. Nyèwù tumutentekela byanza ne tupiisha mwena lukuna, ewu udi mufwànyine kulùnga musùukà wèndè, anyì kutèeka ci—cimanyishilu cifùke mu mpàlà mwèndè. Swàkukù ajuuke ne bucìmunyi kumutù kwàci mu dîndà emu, Mukalenge, ne ajingululè kaaba kèndè mu Kilistò Yesù. Ne pa nàнку àpetèku cidiye ùlòmbà aci, mu Dîna dyà Yesù.

249 Taatù wetù wa mu Dyulu, ne byanza bitentekela mwanèètù wa balùme, mu Dîna dyà Yesù Kilistò, mwenzèlakù dilòmbà dyèndè. Amen.

250 Mwànà mukesè wa bakàjì munanga ewu, Taatù, mu Dîna dyà Yesù swàkù bwà Mukalenge ikalèku ne luse, bwà Butùmbì bwà Nzambì tudi tulòmba disùngidiibwa dyèndè.

251 Nzambi, tudi bamanyè lubilà lwà mu mwoyi wà maamù ewu ne lubilà lwà mwanèndè wa bakàji. Nzambi, mupèshaku diitabuuja mu dindà emu, ne pashiishe àdìtèèka mpindyewu mene, mumanyè ne yéyè ùdi ne bukolè butàmbe cintu eci. Nènku nebyenzeke, mu Dìna dyà Yesù Kìlistò.

252 Nzambi, ondòpàku mwànà mukesè wa balùme ewu, tudi tulòmba mu Dìna dyà Yesù Kìlistò.

253 Nzambi, Taatù wetù, tudi tutentekela mwanèètù wa bakàji byanza ne tulòmba mu dindà emu bwà Wèwè ùmupè dilòmba dyèndè. Mu Dìna dyà Yesù Kìlistò. Amen.

254 Taatù wetù wa mu Dyulu, pàdi inàbànzà mutekète ewu ùlwa bwà kwimana kaaba aka bwà dyondopiibwa dyèndè, tudi tumutentekela byanza ne tulòmba dyondopiibwa dyèndè. Mu Dìna dyà Yesù Kìlistò. Amen.

255 Pa mwànà mukesè mulenga ewu nyèwù tutenteka byanza, mu Dìna dyà Yesù Kìlistò, tulòmba dyondopiibwa.

256 Ku Dìna dyà Yesù Kìlistò, ne byanza byètù pambidi pàà mwanèètù wa bakàji, swàkù bwà Wèwè kumwondopaku mpindyewu.

257 Taatù wetù, Udi mu Dyulu, Dìna Dyèbè dijidiibwè, nyèwù tutentekela mwànà wa balùme ewu byanza. Mu Dìna dyà Yesù Kìlistò, swàkù bwà àCìtàbùùjè. Amen.

258 Taatù wa mu Dyulu, pa mwanèètù wa balùme wa bukitù ewu, Mukalenge, musadidi Webè, muntu wa Nzambi, nyèwù tumutentekela byanza bwà dilòmba dyèndè dyàmòna mwà kwenjiibwa. Mu Dìna dyà Yesù Kìlistò swàkù bwà àngatè kaaba kèndè mpindyewu. Mpindyewu, mwànà wa Nzambi nyéyè ewu, mu cikondo cyà butùmbi citùdi bwònsò tuya batàngile ku ndekeelu eci.

259 Taatù wa Dyulu, pa mwanèètù mukesè wa bakàji udi mupàtùke mu mîdimà menemene bwà kubwela mu Bukènkè, enzàku, Mukalenge, bwà ne musùkà wèndè mukesè wà bukitù awu ùbandishiibwe mu dindà emu, mu cyuyüya cyà mu Dyulu. Ne ùmupèèshè dilòmbà dyèndè—dyèndè, mu Dìna dyà Yesù. Amen.

260 Taatù wa mu Dyulu, pa mwanèètù wa balùme ewu nyèwù twátenteki byanza mu Dìna dyà Mukalenge Yesù, tulòmba bwà dilòmba edi bamwenzèledi. Mu Dìna dyà Mukalenge Yesù Kìlistò. Amen.

261 Taatù wetù wa mu Dyulu, nyèwù tutentekela mwànà wa mu dibòko wa Mwanèètù wa bakàji ewu byanza, ne tulòmba bwà dilòmba dyèndè difidiibwe kùdiye, Taatù, patùdi tumutentekela byanza byètù mu Dìna dyà Yesù Kìlistò apa.

262 Taatù wetù wa mu Dyulu, nyèwù tutentekela mwanèètù wa bakàji byanza, mu Dìna dyà Yesù Kìlistò. Swàkù bwà dilòmba dyèndè difidiibwe, mu Dìna dyà Yesù. Amen.

263 Taatù wetù wa mu Dyulu, pàdì mwanèètù wa bakàjì ùpìcila mu mulongo ewu ne bwà kulekela. . . tudi tumutentekela byanza byètù, swàkù bwà Kilistò wa Nzambì àseemenè pabwìpì mpindyewu ne àpiishè lutàtù lwèndè ne àmusàngèèjè. Amen.

264 Taatù wa mu Dyulu, pa mwanèètù wa balùme, tudi tumutentekela byanza ne tulòmba cyòci aci mu Dìna dyà Yesù Kilistò, bwà Wèwè kumwondopaku mu Dìna dyà Yesù. Amen.

265 Taatù wa mu Dyulu, pa mwànà wa bakàjì ewu tudi tutenteka byanza, ne tulòmba Mukalenge wetù wa mushinga mukolè. Mu Dìna dyà Yesù Kilistò, tudi tulòmba dyondopiibwa dyèndè. Amen.

266 Mukalenge wetù wa mushinga mukolè, tudi tutentekela mwanèètù wa balùme ewu byanza, mu Dìna dyà Mwànà wa Nzambì, Yesù Kilistò, KùdìYe nkutùdì batàmbe ne bacimunyi. Nènku tudi tulòmba bwà Wèwè kupèèsha mwanèètù dilòmbà dyèndè, mu Dìna dyà Yesù. Amen.

267 Taatù wetù, pa mwanààbù ne mwanèètù wa bakàjì, mùsàlaayi mukèsè wa ku nNkùrusè ewu, Ndi ndòmba, Nzambì, bwà Nyumà Webè àlwe pambidi pèndè ne àmupèèshè dilòmbà dyèndè. Mu Dìna dyà Yesù Kilistò. Amen.

268 Taatù wetù wa mu Dyulu, pa disàlaayi dyà bukitù dyà ku Nkùrusè edi, ùtu mwimane bwà Dìyì Dyèbè mu—mu bikondo byà badyùdì ne bikwàbò, kàdì nànsha nànkù mutwè ku cyà Dìyì, mmuyè kutàmba ne mucimunyi mu Kilistò Yesù. Mupèèshèkù dilòmbà dyèndè, Taatù. Ndi ndòmba disambila dyànyì bwà ùmupèèshè dibènesha Dyèbè, Mukalenge, bwà Wèwè kumwondopa ne kumupèèsha dilòmbà dyèndè. Mu Dìna dyà Yesù. Amen.

269 Taatù wa mu Dyulu, mwànà ewu kèna mwa kwikala ne mwoyi kakùyì Nzambì to, kàdì Nzambì ngudi mwà kumusàngàja. Ndi mmutentekela byanza ne mpiisha mwena lukunà, mu Dìna dyà Yesù Kilistò. Beneshaku mwànà awu, ne swàkù bwà Wèwè kumukwacisha bwà àtante mu Dìna dyà Yesù Kilistò. Amen. Batàmbe bacimunyi.

270 Taatù wa mu Dyulu, kùdì mwanèètù wa bakàjì, utùdì tutentekela byanza mu Dìna dyà Yesù Kilistò ewu, tabernacle mucimunyi wa Nzambì muvwijìlbwe mubidi ne musòmbèle munkaci mwètù. Swàkù bwà ku Dìna Dyèndè, Dìna dyakàne dyà Mwànà wa Nzambì awu adi, Yesù Kilistò, pèèshakù mwanèètù wa bakàjì dilòmbà dyèndè. Amen.

271 Mwanèètù wa bakàjì Kidd, mwoyi wèbè ùbèneshiibwè. Taatù wetù wa mu Dyulu, pàndì mukwàte muntu mukulàkàjì ewu ne mukàjèndè mu byanza byètù ebi apa, udi muyiishe Èvànjeeliyò pàncicìvwà ànu mwànà mukèsè wa balùme, kùkaadi matùkù makesè ùvwa mulààle panshì ùpùnga ne lufù bwà kànsèrè; mèmè kuya lubilu bwà kufika kùdiye, nènku bukolè bwà Nzambì kudyèlabù pa muntu mununu wa bidimu

makumi mwandamukùlù ne kumwondopa, mu mùshindù wà ne bangàngàbukà kupùwabo ku cishimà, kabàiyiku mwà kucyùmvwà to. Ndi ndomba bwà Wèwè kwenza dilòmba dyèndè mu dindà emu. Mukàjèndè mukesè mubènèshìibwe ewu, Mukalenge, uvwa usukwilanga bilàmbà bwà kutuma bàyèndè mu bwambi bwà kuyiisha Èvànjeeliyò ewu—ewu Ùzònta mashi wa Yesù Kilistò. Enzàku nàнку, Mukalenge.

²⁷² Beneshaku mwanààbò wa balùme, Junior, Mukalenge. Tudi tulòmba bwà Wèwè kumwondopa ne kumulama ne dikàndà, Mukalenge. Yèyè ke utu wàbàkwacisha bwà kubendesha mu myaba yònsò, bwà kutentekelangana mishwàlà. Nànsha mùdìbo banunùke menemene kabàyi kabàciyi kàbìdì mwà kuya mu budimi bwà bwambi, kàdì bàya ku lùpitaadi ne ku nzùbu yà bantu, bènda bantentekela babèèdì mishwàlà. Nzambi, Wèwè neùtwe aci mushinga, ndi mumanye ne Wèwè neùcitwe mushinga. Bàbènèshèku ne bàpèèshèku dikàndà bwà matùkù makwàbò àbùngì, Taatù. Mu Dìnà dyà Yesù Kilistò. Amen.

²⁷³ Àkubènèshè. Nebyènzeke, Mwanèètù Kidd, nebyènzeke. [Mwanèètù wa balùme ne Mwanèètù wa bakàji Kidd bàdì bààkula ne Mwanèètù Branham—Muf.] Nzampbì àtumbè. Amen. Èyowà, ewu utùvwà basambìdìle ku tèlèfone awu.

²⁷⁴ Muntu mulùme ne mukàji bàà bidimu makumi mwandamukùlù, ne bipìte apu, kabàciyi mwà kuya mu madimi à bwambi ne kwimana mu cyambilu, banunu menemene patùdì twakula apa bwà kuyiisha mùshindù awu, kàdì bàtungunuke ànu ne kulòmbesha mwab'ewu ne kupeta mabùkì à tulùlù twà disambila ne kutùtùmina babèèdì ne beena ntàtù, kuya naatù ku mpitaadi ne bikwàbò byònsò mùshindù awu. Bwà kutùtentekela pa . . . Kabàcyèna kàbìdì mwà kupatuka ne kutwà mudimu wà bwambi nyama ku mikòlò mu mùshindù awu to, kàdì bàdì bàtungunuka ne mwàbù mwònsò. Bìvwa ne cyà kutùfikisha twètù bansonga ku didyùmvwà bundù. Ncyà bushùwà, bènta cintu kampànda bwà Kilistò.

²⁷⁵ Vùlukàayi ne, muntu mukùlàkàji ewu kaaba aka, Mwanèètù Kidd, uvwa ùyiisha Èvànjeeliyò kumpàlà kwà mémè kulediibwa. Ncyà bushùwà, pambèlù pàpa basambidila babèèdì, musàlaayi mununu wa bukìtù. Nènku nyèyè ewu, mununu, udi ne bidimu bùngì munyi, Mwanèètù Kidd? Bidimu makumi mwandamukùlù ne cìmwè, ùcìtungunuka ne kukwàta mudimu bwà Bukalenge bwà Nzambi! Mutàmbe kununa bikolè bwà kwimana mu cyambilu ne kukwàta mukenji bu ewu, kàdì ùyaaya ku lùpitaadi, ku mpenga yà malààlu, kùvwaye ne nsongàlùmè uvwa umwendeshila kàshinyi. Nènku kabèèna mwà kwenda to, ki bwalu kaayi bàvwa ànu bàmwendesha mu kàshinyi ne baya nendè pa mwaba kampànda, nènku bwònsò bàbìdì, babàke banunu, babwela muntwamu ne batentekelangana mishwàlà.

²⁷⁶ Bàvwa ne munanga wabò wàmba kutùùla nkindà dìngà

ditùkù, nsongààkàjì, bàvwa ànu bafùmìna kudicìngambila. Twètù kubàsambidila, mwikùlwèndè, kuya ne kutentekela... Mwànà awu mmwimànyìne kuulu patùdi twakula apa. Nzambì àtumbè's wè!

²⁷⁷ Mwanèètù Kidd, bàvwa bàmbiikile kaaba aka kùkaadi cikondo kampànda, kùkaadi bidimu bitwè ku bibidi, ngèèla meeji ne, cìvwa nànkù, ne ùvwa ne kànsèrè kàà mpàci, mu bidimu makumi mwandamutekète ne mwandamukùlù, anyì makumi mwandamukùlù, wipacila ku bidimu makumi mwandamukùlù, ne kànsèrè kàà mpàci. Ngàngàbuka kulekelaye bwalu abu, kakùvwa cintu nànsha cìmwè cìvwa mwà kwenjiibwa to. Twètù kulwijakaja, Billy ne mémè kunyeemesha màshinyì ewu wèndesha ùshiila mukwende, bwà kufika kuvwàye aku. Ne Nyumà Mwímpè kutwàmbila bwà kuya mu dindà adi. Pa ciibidilu katùtu tucyenza to ànu twètù balombòdiibwe bwà kucyenza. Ke Nyumà Mwímpè kwamba ne: “Ndàayi,” nènku twètù kuyakù ne kutentekela mukùlumpe mununu byanza, bwà kumusambidila. Ne bangàngàbukà kabèèna mwà kupeta kantu kààkù mwaba nànsha wùmwe to. Butùmbi kùdi Nzambì's wè! Kaa! Bwà cinyì? Mwaba wètù wùdi mu Kilistò Yesù, wàkabànda kule kumutù kwà màsaamà wònsò ne makolè wònsò à mwena lukunà.

²⁷⁸ Kaa, kanwènaayikù ne disànkà bwà Yèyè anyì?

Kùdi bantu pàmwè ne myaba yònsò,
 Beena myoyì yìdi yìlàkuka
 Ne Kapyà kààkakùlukà dyà Mpenta aka,
 Kààkabàkezulà ne kubàvwija bakezùke aku;
 Kaa, Kàdi kàlàkuka mpindyewu munda mwà
 mwoyi wànyì,
 Kaa, butùmbi kùdi Dìna Dyèndè's wè!
 Ndi ne disànkà dyàbùngì dyà kwamba ne ndi
 umwe wabò.

Ndi umwe wabò, umwe wabò,
 Ndi ne disànkà dyàbùngì dyà kwamba ne ndi
 umwe wabò;
 Umwe wabò, umwe wabò,
 Ndi ne disànkà dyàbùngì dyà kwamba ne ndi
 umwe wabò.

Nànsha mùvwà bantu aba kabàyi bafwànyìne
 kwikala balongè to,
 Anyì bàditàmbisha bwà luumù lwà pa buloba,
 Mbapètè bwònsò Mpenta wabò,
 Babàtìjìibwe mu Dìna dyà Yesù;
 Nènku bàdi bàmba mpindyewu, ne kule ne ku
 nseke,
 Bukolè Bwèndè bùcìdi ànu bùmwebùmwe abu,

Ndi ne disànkà dyàbúngì dyà kwamba ne ndi
umwe wabò.

²⁷⁹ Mbanganyi bàdi bàmwè bàà kùdìbò? Elàayi byanza muulu
mpindyewu.

. . . wabò, umwe wabò,
Ndi ne disànkà dyàbúngì dyà kwamba ne ndi
umwe wabò;
Kaa, umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò.

Mpindyewu lwâku, mwanètù wanyi, ùkèbè
dibènesha edi
Adi nedìkezulè mwoyi wèbè ku mpèkaatù,
Adi nedìtwàdijè kudidisha ngonga yà disànkà
Ne nedilamè musùùkà wèbè wùlakuka kapyà;
Kaa, cidi cilakuka kapyà mpindyewu munda
mwà mwoyi wanyi,
Butumbi kùdi Dìna Dyèndè,
Ndi ne disànkà dyàbúngì dyà kwamba ne ndi
umwe wabò.

Ndi umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò; (Àlèluuyàh!)
Umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò.

Bàvwa badisangishe mu cibambalu cyà kuulu,
Bwònsò bàsambila mu Dìna Dyèndè,
Bàakabàtìijibwa ne Nyumà Mwîmpè,
Pashiishe bukolè bwà mudimu kulwa;
Mpindyewu cyàkabènzela Yè ditùku adi aci
Yéyè neàkwenzèlè byà mwomùmwe,
Nènku ndi ne disànkà dyàbúngì dyà kwamba
ne ndi umwe wabò.

Ndi umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò; (Àlèluuyàh!)
Umwe wabò, umwe wabò,
Kaa, ndi ne disànkà dyàbúngì dyà kwamba ne
ndi umwe wabò.

²⁸⁰ Mpindyewu patùdi tuwimbila mu matàma apa,
tùlabulanganaayi ku byanza ne mukwétù. Nwamba ne:

Umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò; (Àlèluuyàh!)
Umwe wabò, umwe wabò,

Ndi ne disànkà dyàbûngì dyà kwamba ne ndi
umwe wabò.

281 Ki mmwômò anyi? Ambàayi ne: “Amen!” [Disangisha dìdi
dyàmba ne: “Amen!”—Muf.]

Ndi umwe wabò, umwe wabò,
Ndi ne disànkà dyàbûngì dyà kwamba ne ndi
umwe wabò;
Umwe wabò, umwe wabò,
Ndi ne disànkà dyàbûngì dyà kwamba ne ndi
umwe wabò.

282 Ndiku mwà kwimba citùminyi cìmwè eci kàbìdì anyi?

Nànsha mùvwà bantu aba kabàyi bafwànyine
kwikala balongè to, (Kabèèna nànsha ne
mukàndà munène menemene wà D.D., Ph.D.,
nudi bamòne’s, kabàyi ne bintu binène
menemene to, nudi bamòne’s.)

Bantu aba bàdi mwà kwikala kabàyi balongè
to,

Anyi bàditàmbisha bwà luumù lwà buloba,
(Bulongolodi kampànda bunène.)

Mbapeté bwònsò Mpenta wabò,

Yònsò wa kùdìbo wàkabàtìijibwa mu Dîna dyà
Yesù;

Ne bàdi bàmbilangana mpindyewu ku nseke ne
ku nseke yà kule ne,

Bukolè Bwendè bùcìdì ànu bùmwebùmwe abu,
Ndi ne disànkà dyàbûngì dyà kwamba ne ndi
umwe wabò.

Umwe wabò, umwe wabò,

Ndi ne disànkà dyàbûngì dyà kwamba ne ndi
umwe wabò;

Ndi umwe wabò, umwe wabò,

Ndi ne disànkà dyàbûngì dyà kwamba ne ndi
umwe wabò.

Kaa, kabùyi bwà mìliyô yà ngòlò yà buloba
bujimà to

Ncyèna mufwànyine kuumuka mu mwaba wa
mushinga mukolè ewu to,

Nànsha muteeci mwikale ne . . . muteetè bwà
kutwishisha misangu yònsò,

Kàdi ndi mu bukùbi mu lutanda lwà Nzambì,

Ndi ne disànkà mu dinanga Dyèndè ne ngàsà,
Ne mèmè ndi ne mwoyi ku luseke lwà
Alèluuyàh!

283 Kaa, ekèlekèle! Ndi ne disànkà dyàbûngì dyà cyòcì aci.
Ki mmwômò anyi? Kanwènaayikù ne disànkà dyà kwikala
umwe wabò anyi? Ànu umwe wabò, umwe wa ku bantu

bapwekèle badi badishiye munda mutupù, bapwèke (kabiya kumpàla kwà lupingu to), kumpàla kwà Nzambi udi ne mwoyi, (kaciya kumpàla kwà bulongolodi kampànda ne kutèeka dīnà dyèbè mu mukàndà to), kumpàla kwà Nzambi udi ne mwoyi, (kī mbwà kwambulula twitabàayi to), kadi bwà kulekela Dīyi dilwa mubidi munda mwèbè. Nwamònu's, kī cyôci aci. Nènku badipwekèshe nwènù biine, ne pashiishe ku cyôci aci Yèyè kunùbàndisha kuulu, (kī mbwà kwikala ne mutù mukolè, badibàndishi, nwamba ne “Mémè ndi *cikampànda*, *cikansanga* anyi *cikakènga* to”), kadi mu didipwekesha, kalolo, ne “mmunyi mwàkasungilàYe mukèngeledi bu mémè ewu, ne mmunyi mwàkacyènzàYe?” Awu's ke mùshindù ùtù mwena Kilistò mulelèlà udyumvwa. Kanwenaayiku nwitabuujà nànkū anyi? Kaa, Yèyè's mmulelèlà wa menemene's!

Mulelèlà, mulelèlà, Yèyè mmulelèlà bwànyì
mémè!

Kaa, mulelèlà, mulelèlà, Yèyè's mmulelèlà
menemene bwànyì mémè!

Nànsha bāngà bantu baMwele mpatà, mémè
ncyèna mwà kwikala ne mwoyi Yèyè kàyiku
to,

Ki bwà cinyì ndi muMunangè, ne Yèyè ùdi
mulelèlà bwànyì mémè!

Mulelèlà, Yèyè's mmulelèlà bwànyì mémè's!

Wimbaayi!

Mulelèlà, mulelèlà, Yèyè's mmulelèlà bwànyì
mémè!

Nànsha bāngà bantu baMwele mpatà, kadi
mémè ncyèna mwà kwikala Yèyè kàyiku to,

Ki bwà cinyì ndi muMunangè, ne Yèyè ùdi
mulelèlà menemene bwànyì mémè's!

²⁸⁴ Kaa, ndi ne disànkà dyàbūngì dyà cyôci aci! Èyowà's, mukalenge. Kaa, ndi ne disànkà dyàbūngì bwà Èvànjeeliyò munène wa kale ewu, mwikàle ne mwoyi mu mùshindù wa Èvànjeeliyò wa butùmbi wa kale ewu.

²⁸⁵ Mpindyewu, balundà bàanyi, too ne patwàsangilà ku Nkwasa wa butùmbi wa Kilistò cyàkàbìdi, panùdi nusambila apu, nwàmvluka. Nènku Nzambi àbènèshèku yònsò wa kunùdi. Mémè ndi . . . Ncyèna mwà kwamba ne mfwilaaayikù luse mûndi munùlamè kaaba aka to.

²⁸⁶ Mpindyewu, bwènù nwènù badi ne mīshwālā mitèeka kaaba aka, nyèwù mfūma ku diyitentekela byanza patùvwà munkaci mwà kusambidila babèedi apu, bu nwènù mwà kuntàbaleela ndi mucyènze ànu pàvwà Nyumà mundenge apu. Ncivwa muditwe mu bikèènà-kumòna byàbūngì to, bwalu ndi muzengèle, mucyòke, nudi bamanyè's, kacya ndwa mwab'ewu kùkaadi mèbà bu àbidi anyi àsàtù mpindyewu, mumònàngàne ne

kuyiisha, ki mêmè kubanga ànu kwangata ndambù ku mulongo bwà nwamòna ne Nzambi ùdi ùshààla Nzambi. Nwamònu anyi? Cidi kaciyi mwà kwenzeka, cidikà, cyà ne bintu bidì kabiyi bikèbakeba... Dyabùlù...

²⁸⁷ Mpindyewu, vùlukàayi ne, yònsò wa kunùdi ùdi ne bukolè mu Kilistò. Nwènù kanwèna ne bukolè to, nudi ne *bukòòkeshi*, bukòòkeshi bwènù. Nudi ànu babàndishiiibwe, kuulu ndambù; kí nkwikala badibàndishe nkààyenù nànsha, kàdi Kilistò mmunùbàndishe. Pàdi Kilistò útamba kukubàndisha, ke paùdi utàmba kujinga kwikala mupwekèle, nwamònu's, neùtambe kudyumvwa mupwekèle be. Pa nàнку mmunyi mùdiYe mufwànyine kusungilaku mukengeledi bu mêmè ewu, mmunyi mwàkacyènzaYe mene's? Kàdi Yèyè wàkacyènza, ne pa nàнку ndi ne kusàkidila bwà bwalu abu. Amen! Bimpè be!

Mu Dìna dyà Yesù ndi nginama,
Mpòna mikookwela ku makàsà Èndè,
Mfùmù wa bamfùmù mu Dyulu netùMwase
cifulu cyà butùmbi,
Pààjikà lwendu lwètù.

Dìna dyà mushinga, (Dìna dyà mushinga!) Éyi
dyà bupòle be!
Ditèkemena dyà buloba ne disànkà dyà Dyulu;
Dìna dyà mushinga, (Kaa, Dìna dyà mushinga!
Yèyè kèènapù mulenga anyi?)
Ditèkemena dyà buloba ne disànkà dyà Dyulu.

²⁸⁸ Mpindyewu, tèèlejàayi, kanùpùku eci mwoyi to, nudi nwimba cipungulujidi, ndekèlaayi mêmè ngímbe citùminyi cyàwù. Nwamònu anyi? Ncyèna mumanyi ní ndi mwà kuvùluka citùminyi cyàwù cìndi njinga kwimba aci, s'ki cintu cidi cilonda aci.

Twinamina mu Dìna dyà Yesù,
Tuona mikookwela ku makàsà Èndè,
Mfùmù ne bamfùmù wa mu Dyulu netùMwase
cifulu cyà butùmbi,
Pààjikà lwendu lwètù. (Nwamònu anyi?)

Angata Dìna dyà Yesù wèndè naadi,
Bu Ngabu ku butèyi bwònsò;
Pààkunyùngulukilà mateeta,
Nungànà ànu Dìna dyà Cijila adi mu
disambila.

Kwājiki. Juula cyanza aci muulu ne ùtèèleje mùdi bitofù bikwacika's! Nwamònu anyi? Nwamònu anyi?

Nungànà Dìna dyà Cijila adi mu disambila.
Dìna dyà mushinga, Éyi dyà bupòle be!
Ditèkemena dyà buloba ne disànkà dyà Dyulu;


Dìna dyà musinga, (Kaa, Dìna dyà
musinga!) Éyì dyà bupòle be!
Ditèkemena dyà buloba ne disànkà dyà Dyulu.

²⁸⁹ Twàmbululàayi kàbìbì, twètù bwònsò pàmwè. Nudi nwamba
bìshi? Twàngatàayi ànu citùminyì aci kàbìdì, cyà ne: “Angata
Dìna dyà Yesù wéndè naadì, bu Ngabu ku butèyi bwònsò.”
Tùcìmbàayi mpindyewu ne mèsù ètù makànga.

Angata Dìna dyà Yesù wéndè naadì,
Bu Ngabu ku butèyi bwònsò; (Mpindyewu
tèelejàayi. Kwenza cinyi?)
Pààkunyùngulukila matèyi, (Cyùdì ne cyà
kwenza ncinyi?)
Nungàna Dìna dyà Cijila adi mu disambila.
Dìna dyà musinga, (Dìna dyà musinga!) (Éyì
dyà bupòle be!)
Ditèkemena dyà buloba ne . . .

[Mwanèètù Neville ùdi wàkula ne Mwanèètù
Branham—Muf.] (Ncyèna mumanyè to. To, ndi—ndi ne dīyì
dimpàte ndambù, dīyì ndimpàte ndambù, ki bwà cinyi
ncyèna ngàmba...?...Udi muswè kutangalajangana...?...
To, mbìmpè, tòngunuka wèwè ànu kumpàla, abi's mbìmpè.)

Ditèkemena dyà buloba ne . . .

Mwanèètù Neville, mpaasàtà wenù, mpindyewu. 

61-1217 Bwena Kilistò Bùlwishangana
Ne Dikuukwila Dyà Mpingu
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org